



SP

2 Bde.
D 140 in

by
over





THE UNIVERSITY OF CHINA PRESS



PVBL. TERENTIVS.

Per. imag. in Mus. Capitol.

316 Bot PVBLI TERENTI

AFRI

COMOEDIAE

IN VSVM ELEGANTIORVM HOMINVM

EDIDIT

FRIDERICVS HENRICVS BOTHE

MAGDEBVRGENSIS

P. von Winterfeld.

ACCEDIT ICON COMICI IN AES INCISA

1894.

BEROLINI

SVMTV IOANNIS FRIDERICI VNGERI

1806

23873
28/9/



25. 9/52

PRAEFATIO.

Exhibemus Terentium, studiis politum nostris, curatumque a viro elegantissimo, qui quantum in hoc genere praestare et cupierit et solitus fuerit, dudum experti sunt quicquid est hominum venustiorum.

Collati sunt in usum huius editionis codices MSS. sex, paris propemodum aetatis omnes, quorum quinque integri, alter autem Guelferbytanorum, quem posteriorem voco, ex parte tantum, ut qui fide haud comparandus videretur esse alteri, membranaceo quidem illi (nam alter chartaceus), rescripto, iudicibusque Langero et Brunsio, viris clarissimis, annos abhinc circiter sexcentos exarato. Inspexit duo Guelferbytanos vir doctissimus, Gesenius, Helmstadiensis, de quo bene sperare literatam iubeo rempublicam. Berolinensium et libri Helmstadiensis, ab Academia Iulia liberaliter nobis communicati, potiores lectiones ipsi excerpimus, itaque instructi ab externis subsidiis, via critica, quam munivit Richardus Bentleius, tutius iam ingressi, quicquid dedit vir ille incomparabilis manifesto

melius vulgatis et quasi extra omnem lectionis et coniecturae aleam positum, tacite fere id recepimus; ubi dubium relictum esset, monuimus, succurrimus; denique locos difficiliores, adhibitis poëtae interpretibus probatissimis, inprimis Donato, declaravimus, id per omnia studentes potius, ut ne quis usquam scrupulus restaret lectoribus, quam, ut eruditionem quantulamcunque nostram ostentaremus.

Designantur libri scripti literis A B C Gu. 1. Gu. 2. H. Quorum duo Berolinenses membranacei sunt, eorumque alter nitidissime scriptus, alter continue lacerusque in extrema fine; tertius vero Berolinensium chartaceus est, qui quidem in Regiam bibliothecam venit ex Georgii Fabricii, quanquam alius is liber codice eiusdem Fabricii illo, quo usus est Bentleius: Italici, ut videtur, tres libri omnes. quibus de fide ac bonitate lectionum haud concedit apographum Helmstadiense.

Ceterum hisce ego utor in annotatione scripturae compendiis: Be. Bentleius; codd. codices; em. emendatus; ex int. ex interpretatione; h. l. hoc loco; i. e. id est; intpp. interpretes; l. l. loco laudato; m. l. metro laborante; p. passim; s. sic; vett. edd. veteres editiones; v. vulgo.

Dabam Berolini, mense Aprili 1806.

P. TERENTII AFRI VITA EX
AELIO DONATO.

Publius Terentius Afer, Carthagine natus, servivit Romae Terentio Lucano senatori, a quo ob ingenium et formam non institutus modo liberaliter sed et mature est manumissus. Quidam captum esse existimant, quod fieri nullo modo potuisse, Fenestella docet, cum inter finem secundi belli Punici et initium tertii natus sit et mortuus, nec, si a Numidis aut Gaetulis captus sit, ad dominum Romanum pervenire potuisset, nullo commercio inter Italicos et Afros nisi post deletam Carthaginem coepto. Hic cum multis nobilibus familiariter vixit, sed maxime cum Scipione Africano et C. Laelio, quibus etiam corporis gratia conciliatus existimatur; quod et ipsum Fenestella arguit, contendens, utroque maiorem natu fuisse, quamvis et Cornelius Nepos aequales omnes fuisse tradat, et Porcius suspicionem de consuetudine per haec faciat:

Dum lasciviam nobilium et laudes fucosas
petit,

Dum Africani vocem divinam inhiat avidis
auribus,

Dum, se ad Furium coenare et Laelium,
pulchrum putat,

Dum, se rapi in Albanum crebro aetatis ob
florem suae:

Ipsus laetis rebus summam ad inopiam re-
dactus est;

Itaque e conspectu omnium abiit Graeciam
in terram ultimum,

Mortuust in Stymphalo, Arcadiae oppido.
nil Publius

Scipio profuit, nil eii Laelius, nil Furius,
Tres per idem tempus qui agitabant nobiles
facillume.

Eorum ille opera ne domum quidem habuit
conductitiam,

Saltem ut esset, quo referret obitum do-
mini servolus.

Scriptis comoedias sex; e quibus primam, An-
driam, cum Aedilibus daret, iussus ante Caecilio
recitare, ad coenantem cum venisset, dictus est
initium quidem fabulae, quod erat contemtiore
vestitu, subsellio iuxta lectulum residens legisse,
post paucos vero versus invitatus ut accumberet,
coenasse una, deinde cetera percurrisse, non sine
magna Caecilii admiratione. Et hanc autem et
quinque reliquas aequaliter populo probavit;
quamvis Volcatius de enumeratione omnium ita
scribat:

Sumetur Hecyra sexta ex hisce fabula.

Eunuchus quidem bis die acta est meruitque pre-
tium, quantum nulla antea cuiusquam comoedia,
octo milia nummum. propterea summa quoque
titulo adscribitur. nam Adelphorum principium
Varro etiam praefert principio Menandri.

Non obscura fama est, adiutum Terentium in
scriptis a Laelio et Scipione, quibuscum familia-

riter vixit. Eandem ipse auxit: nunquam enim nisi leviter se tutari conatur, ut in prologo Adelphorum:

Nam quod isti dicunt malevoli, homines
nobiles

Hunc adiutare adsidueque una scribere,
Quod illi maledictum vehemens esse existu-
mant,

Eam laudem hic ducit maxumam, cum illis
placet,

Qui vobis univorsis et populo placent,
Quorum opera in bello, in otio, in negotio,
Suo quisque tempore usus sine superbia.

Videtur autem se levius defendisse, quia sciebat, Laelio et Scipioni non ingratum esse hanc opinionem; quae tamen magis et magis usque ad posteriora tempora valuit. Q. Memmius in oratione pro se ait: P. Africanus, qui, a Terentio personam mutuatus, quae domi luserat ipse, nomine illius in scenam detulit. Nepos auctore certo se comperisse ait, C. Laelium quondam in Puteolano Calendis Martiis, admonitum ab uxore, temporius ut discumberet, petisse ab ea, ne interPELLARETUR; serius tandem ingressum triclinium dixisse, non saepe in scribendo magis successisse sibi; deinde rogatum, ut scripta illa proferret, pronuntiasse versus, qui sunt in Heautontimorumenos:

Satis pol proterve me Syri promissa huc
induxerunt.

Santra Terentium existimat, si modo in scribendo adiutoribus indiguerit, non tam Scipione et Laelio uti potuisse, qui tunc adolescentuli fuere, quam Sulpicio Gallo, homine docto et qui Con-

sualibus ludis initium fecerit fabularum dandarum, vel Q. Fabio Labeone et M. Popilio, consulari utroque ac poëta. Ideo ipsum non iuvenes designasse, qui se adiuvisse dicerentur, sed viros, quorum operam et in bello et in otio et in negotio populus sit expertus.

Post editas comoedias, nondum quintum atque trigesimum egressus annum, causa evitandae opinionis, qua videbatur aliena pro suis edere, seu percipiendi Graecorum instituta moresque, quos perinde exprimeret in scriptis, egressus urbem est neque amplius rediit. De morte eius Volcatius tradit:

Sed Afer ut populo sex dedit comoedias,
Iter hinc in Asiam fecit. navim cum semel
Conscendit, visus nunquam est. sic vita
vacat.

Q. Cosconius redeuntem e Graecia periisse in mari dicit cum centum et octo fabulis conversis e Menandro. Ceteri mortuum esse in Arcadiae Stymphalo sive Leucadia tradunt, Cn. Corn. Dolabella M. Fulvio Nobiliore Coss., morbo implicitum acri ex dolore ac taedio amissarum sarcinarum, quas in navi praemiserat, ac simul fabularum, quas novas fecerat.

Fuisse dicitur mediocri statura, gracili corpore, colore fusco. Reliquit filiam, quae post equiti Romano nupsit; item hortulos viginti iugerum in via Appia ad Martis villam. quo magis miror, Porcium scribere:

nil Publius

Scipio profuit, nil eii Laelius, nil Furius,
Tres per idem tempus qui agitabant nobi-
les facillume.

Eorum ille opera ne domum quidem habuit
conductitiam,
Saltem ut esset, quo referret obitum do-
mini servolus.

Hunc Afranius quidem omnibus Comicis prae-
fert, scribens in Compitalibus:

Terentio non similem dices quempiam.
Volcatius autem non solum Naevio et Plauto et
Caecilio, sed Licinio quoque, postponit. Cicero
in Limone hactenus laudat:

Tu quoque, qui solus lecto sermone, Te-
renti,
Conversum expressumque latina voce Me-
nandrum
In medio populo sedatis vocibus effers,
Quicquid come loquens atque omnia dulcia
dicens.

Item C. Caesar:

Tu quoque, tu in summis, o dimidiate Me-
nander,
Poneris, et merito, puri sermonis amator.
Lenibus atque utinam scriptis adiuncta fo-
ret vis,
Comica ut aequato virtus polleret honore
Cum Graecis, neque in hac despectus parte
iaceres!

Unum hoc maceror et doleo tibi deesse,
Terenti.

Haec Suetonius Tranquillus. Nam duos Te-
rentios poëtas fuisse scribit Metius, quorum alter
Fregellanus fuerit, Terentius Libo, alter liberti-
nus, Terentius, Afer patria, de quo nunc loqui-
mur. Scipionis fabulas edidisse Terentium, Val-
gius in Actaeone ait:

Hae quae vocantur fabulae cuiae ne sunt,
Non has, qui iura populis end' hibus dabat,
Honore summo affectus, fecit fabulas?

Duae ab Apollodoro translatae esse dicuntur
Comico, Phormio et Hecyra; quatuor reliquae a
Menandro, ex quibus magno successu et pretio
stetit Eunuchus fabula, Hecyra saepe exclusa,
vix acta, est.

A N D R I A.



C. SULPITII APOLLINARIS PERIOCHA IN ANDRIAM.

Sororem falso creditam meretriculae;
Genere Andriae, Glycerium, vitiat Pamphilus,
Gravidaque facta, dat fidem, uxorem sibi
Fore hanc: nam pater ei aliam desponsaverat,
Gnatam Chremetis, atque, amorem ut comperit,
Simulat futuras nuptias, cupiens, suus
Quid haberet animi filius, cognoscere.
Davi sūasu non repugnat Pamphilus; ;
Sed e Glycerio natum ut vidit pūerulum
Chremes, recusat nuptias, generum abdicat;
Mox filiam Glycerium insperato agnitam
Hanc Pamphilo illam dat Charino coniugem.

P. T E R E N T I
A N D R I A.

ACTA LVDIS MEGALENSIBVS M. FVLVIO
ET M'. GLABRIONE AEDILIBVS CV-
RVLIBVS. EGERVNT L. AMBIVIVS
TVRPIO, L. ATILIVS PRAENESTINVS.
MODOS FECIT FLACCVS CLAVDI TI-
BIIS PARIBVS DEXTRIS ET SINISTRIS,
ET EST TOTA GRAECA. EDITA M. MAR-
CELLO ET CN. SVLPICIO COSS.

DRAMATIS PERSONAE.

SIMO.
SOSIA.
DAVVS.
MYSIS.
PAMPHILVS.
CHARINVS.
BYRRHIA.
LESBIA.
GLYCERIVM.
CHREMES.
CRITO.
DROMO.

PROLOGVS.

Poëta, quom primum animum ad scribendum ad-
pulit,

Id sibi negoti credidit solum dari,
Populo ut placerent quas fecisset fabulas:
Verum, aliter evenire multo, intelligit:

5 Nam in prologis scribundis operam abutitur,
Non qui argumentum narret, set qui malevoli
Veteris poëtae maledicis respondeat.

Nunc, quam rem vitio dent, quaeso, animum ad-
vortite.

Menander fecit Andriam et Perinthiam;

10 Qui utramvis recte norit, ambas noverit:
Ita non sunt dissimili argumento; set tamen
Dissimili oratione sunt factae ac stilo.

Quae convenere in Andriam ex Perinthia, hiç
Fatetur transtulisse atque usum pro suis.

15 Id isti vituperant factum atque in eo disputant,
Contaminari non decere fabulas.

Faciuntne intelligendo ut nihil intendant?

Qui, cum hunc accusant, Naevium, Plautum,
Ennium

Accusant, quos hic noster auctores habet;

20 Quorum aemulari exoptat negligentiam
Potius quam istorum obscuram diligentiam.
Dehinc ut quiescant porro, moneo, et desinant
Maledicere, malefacta ne noscant sua.

Favete! adeste aequo animo et rem cognoscite,

- 25 Vt pernoscatis, ecquid spe sit reliquum,
Post hic quas faciet de integro comoedias,
Spectandae an exigendae sint vobis prius.

SIMO. SOSIA.

SIMO.

Vos istaec intro auferte! abite! Sosia, I. 1.
Adesdum: paucis te volo.

SOSIA.

Dictum puta:

Nempe, ut curentur recte haec.

SIMO.

Imo aliud.

SOSIA.

Quid est,

Quod mea tibi ars efficere hoc possit amplius?

SIMO.

- 5 Nihil istac opus est arte ad hanc rem, quam paro,
Set his, quas semper in te intellexi sitas,
Fide et taciturnitate.

SOSIA.

Exspecto, quid velis.

SIMO.

- Ego postquam te emi, a parvulo ut semper tibi
Apud me iusta et clemens fuerit servitus,
10 Scis. Feci, e servo ut esses libertus mihi,
Propterea quod servibas liberaliter;
Quod summam ego habui pretium, persolvi tibi.

SOSIA.

In memoria habeo.

SIMO.

Haud muto.

SOSIA.

Factum gaudeo,

- Si tibi quid feci, aut facio, quod placeat, Simo, et,
15 Id gratum fuisse advorsum te, habeo gratiam;

Set hoc mihi molestum est: nam istaec commem-
moratio

Quasi benefici immemoris exprobratio est.

Quin tu uno verbo dic, quid est, quod me velis.

SIMO.

Ita faciam. Hoc primum in hac re praedico tibi:

20 Quas credis esse has, non sunt verae nuptiae.

SOSIA.

Cur simulas igitur?

SIMO.

Rem omnem a principio audies:

Eo pacto et gnati vitam et consilium meum

Cognosces, et, quid facere in hac re te velim.

Nam is postquam excessit ex ephebis, Sosia, ac

25 Liberius vivendi est potestas: nam antea

Qui scire posses aut ingenium noscere,

Dum aetas, metus, magister, prohibebant?....

SOSIA.

Ita est.

SIMO.

Quod plerique omnes faciunt adolescentuli,

Vt animum ad aliquod studium adiungant, aut
equos

30 Alere, aut canes ad venandum, aut ad philosophos,

Horum ille nihil egregie praeter cetera

Studebat, et tamen omnia haec mediocriter.

Gaudebam.

SOSIA.

Non iniuria: nam id arbitror

Adprime in vita esse utile, ut ne quid nimis.

SIMO.

35 Sic vita erat: facile omnes perferre ac pati;

Cum quibus erat cunque una, iis sese dedere,

Advorsus nemini; eorum studiis obsequi,

Nunquam praeponens se illis. Ita facillume

Sine invidia laudem invenias, et amicos pares.

SOSIA.

40 Sapienter vitam instituit: namque hoc tempore

Obsequium amicos, veritas odium, parit.

SIMO.

Interea mulier quaedam abhinc triennium
Ex Andro commigravit huc vicinia,
Inopia et cognatorum negligentia

45 Coacta, egregia forma atque aetate integra.

SOSIA.

Hei, vereor, ne quid Andria adportet mali!

SIMO.

Primum haec pudice vitam, parce ac duriter,
Agebat, lana ac tela victum quaeritans;
Set postquam amans accessit, pretium pollicens,
50 Vnus et item alter, ita ut ingenium est omnium
Hominum ab labore proclive ad lubidinem,
Accepit conditionem, dein quaestum occipit.
Qui tum illam amabant, forte, ita ut fit, filium
Perduxere illuc, secum ut una esset, meum.
55 Egomet continuo mecum: Certe captus est!
Habet! Observabam mane illorum servulos
Venientes aut abeuntes; rogitabam: Heus puer,
Dic sodes, quis heri Chrysidem habuit? nam Andriae
Illud erat nomen.

SOSIA.

Teneo.

SIMO.

Phaedrum aut Cliniam aut
60 Dicebant Niceratum: nam hi tres tum simul
Amabant. Eho, quid Pamphilus? — Quid? sym-
bolam
Dedit, coenavit. — Gaudebam. Itidem alio die
Quaerebam; comperiebam, nihil ad Pamphilum
Quidquam attinere. Enimvero spectatum satis
65 Putabam et magnum exemplum continentiae:
Nam qui cum ingeniis conflictatur eiusmodi
Neque commovetur animus in ea re tamen,
Scias, posse habere iam ipsum suae vitae modum.
Cum id mihi placebat, tum uno ore omnes omnia

- 70 Bona dicere et laudare fortunas meas,
 Qui gnatum haberem tali ingenio praeditum.
 Quid verbis opus? hac fama compulsus Chreïmes
 Ultro ad me venit, unicam gnatam suam
 Cum dote summa filio uxorem ut daret;
 75 Placuit, despondi; hic nuptiis dictus dies.

SOSIA.

Quid igitur obstat, cur non fiant?

SIMO.

Audies.

Fere in diebus paucis, quibus haec acta sunt,
 Chrysis, vicina haec, moritur.

SOSIA.

O factum bene!

Beasti! metui a Chryside.

SIMO.

Ibi tum filius

- 80 Cum illis, qui amabant, una aderat frequens meus,
 Curabat una funus, tristis interim;
 Nonnunquam conlacrumabat. Placuit tum id mihi:
 Sic cogitabam: hic parvae consuetudinis
 Causa huius mortem tam fert familiariter;
 85 Quid, si ipse amasset? hic quid mihi faciet patri?
 Haec ego putabam esse omnia humani ingeni
 Mansuetique animi officia. Quid multis moror?
 Egomet quoque eius causa in funus prodeo,
 Nil suspicans etiam mali.

SOSIA.

Hem, quid id est?

SIMO.

Scies.

- 90 Effertur; imus. Interea inter mulieres,
 Quae ibi aderant, forte adspicio unam, adolescen-
 tulam,
 Forma....

SOSIA.

Bona fortasse.

SIMO.

Et voltu, o Sosia,
 Adeo modesto, adeo venusto, ut nil supra.
 Quae cum mihi lamentari praeter ceteras
 95 Visa est, et, qua erat, forma, accedo ad pedisequas;
 Quae sit, rogo. Sororem esse aiunt Chrysidis.
 Percussit illico animum. Atat, hoc illud est!
 Haec illae lacrumae! haec illa est misericordia!

SOSIA.

Quam timeo, quorsum evadas!

SIMO.

Funus interim

100 Procedit; sequimur; ad sepulcrum venimus;
 In ignem imposita est; fletur. Interea haec soror,
 Quam dixi, ad flammam accessit imprudentius,
 Satis cum periculo. Ibi tum exanimatus Pamphilus
 Bene dissimulatum amorem et celatum indicat:
 105 Adcurrit; mediam mulierem complectitur;
 Mea Glycerium, inquit, quid agis? cur te is per-
 ditum?

Tum illa, ut consuetum facile amorem cerneret,
 Reiecit se in eum, flens, quam familiariter.

SOSIA.

Quid ais?

SIMO.

Redeo inde iratus atque aegre ferens;
 110 Nec satis ad obiurgandum causae: diceret:
 Quid feci? quid commerui aut peccavi, pater?
 Quae sese iniicere in ignem voluit, prohibui,
 Servavi. Honesta oratio est.

SOSIA.

Recte putas:

Nam si illum obiurges, vitae qui auxilium tulit,
 115 Quid facias ei, qui damnum dederit aut malum?

SIMO.

Chremes postridie ad me venit, clamitans,
 Indignum facinus comperisse, Pamphilum
 Pro uxore peregrinam hanc habere. Ego sedulo

Negare, factum; ille instat, factum; denique
 120 Ita tum discedq ab illo, ut qui se filiam
 Neget daturum.

SOSIA.

Non tu ibi gnatum...?

SIMO.

Ne haec quidem
 Satis vehemens causa ad obiurgandum.

SOSIA.

Qui, cedo?

SIMO.

Tute ipse his rebus finem praescripsti, pater;
 Prope adest, quom more alieno vivendum est mihi:
 125 Nunc meo me vivere interea modo, sine.

SOSIA.

Qui igitur relictus est obiurgandi locus?

SIMO.

Si uxorem propter amorem nolet ducere,
 Ea primum ab illo animadvertunda iniuria est;
 Et nunc id operam do, ut per falsas nuptias
 130 Vera obiurgandi causa sit, si deneget;
 Simul, sceleratus Davos si quid consili
 Habet, ut consumat nunc, cum nihil obsint doli;
 Quem ego credo manibus pedibus obnixè omnia
 Facturum, magis id adeo, mihi ut incommodet,
 135 Quam ut obsequatur gnato.

SOSIA.

Quapropter?

SIMO.

Rogas?

Mala mens, malus animus! quem quidem ego si
 sensero....

Set quid opus verbis? sin eveniat, quod volo,
 In Pamphilo ut nil sit morae, restat Chremes,
 Qui mi exorandus est, et spero confore.

140 Nunc tuum est officium, has bene ut adsimules
 nuptias,
 Perterrefacias Davom, observes filium,

Quid agat, quid cum illo consili captet.

SOSIA.

Sat est;

Curabo.

SIMO.

Eamus nunc iam intro. I prae; sequar.

Non dubium est, quin uxorem nolit filius:

145 Ita Davon modo timere sensi, ubi nuptias
Futuras esse audivit. Set ipse exit foras.

SIMO. DAVVS.

DAVVS.

Mirabar, hoc si sic abiret, et heri semper le-
nitas I. 2.

Verebar quorsum evaderet; qui, postquam audierat,
filio

Vxorem non dari suo,
150 Nunquam cuiquam nostrum verbum fecit, neque
id aegre tulit.

SIMO.

At nunc faciet, neque, ut opinor, sine tuo magno
malo.

DAVVS.

Id voluit, nos sic nec opinantes duci falso gaudio,
Sperans, iam, amoto metu, interea oscitantes
opprimi,

Neque esse spatium cogitandi ad disturbandas
nuptias.

155 Astute!

SIMO.

Carnufex quae loquitur?

DAVVS.

Herus est, neque provideram.

SIMO.

Dave!

DAVVS.

Hem, quid est?

SIMO.

Ehodium, ad me!

DAVVS.

Quid hic volt?

SIMO.

Quid ais?

DAVVS.

Qua de re?

SIMO.

Rogas?

Meum gnatum rumor est amare.

DAVVS.

Id populus curat scilicet!

SIMO.

Hoccine agis, annon?

DAVVS.

Ego vero istuc.

SIMO.

Set nunc ea me exquirere,

Iniqui patris est: nam, quod antehac fecit, nihil
ad me attinet;160 Dum tempus ad eam rem tulit, sivi, animum ut
expleret suum:Nunc hic dies vitam aliam defert, alios mores
postulat.Dehinc postulo, sive aequom est, te oro, Dave,
ut redeat iam in viam.

DAVVS.

Hoc quid sit?

SIMO.

Omnes, qui amant, graviter, sibi dari
uxorem, ferunt.

DAVVS.

Ita aiunt.

SIMO.

Tum, si quis magistrum cepit ad eam
rem improbum,

165 Ipsum animum aegrotum ad deteriore[m] partem
plerumque adplicat.

DAVVS.

Non hercle intelligo.

SIMO.

Non? hem!

DAVVS.

Non: Davos sum, non Oedipus.

SIMO.

Nempe ergo aperte vis, quae restant, me loqui?

DAVVS.

Sane quidem.

SIMO.

Si sensero hodie, quidquam in his te nuptiis

Fallaciae conari, quo fiant minus,

170 Aut velle, in ea re ostendi, quam sis callidus,
Verberibus caesum te in pistrinum, Dave, dedam
usque ad necem,

Ea lege atque omine, ut, si te inde exemerim,
ego pro te molam.

Quid? hoc intellextin? an nondum etiam ne hoc
quidem?

DAVVS.

Imo callide,

Ita aperte ipsam rem modo loquutus, nil circumi-
tione usus es.

SIMO.

175 Vbivis facilius passus sim, quam in hac re, me
deludier.

DAVVS.

Bona verba, quaeso!

SIMO.

Inrides; nil me fallis; edico tibi:

Ne temere facias! neque tu haut dices, tibi non
praedictum. Cave!

DAVVS.

Enimvero, Dave, nil loci est segnitiae neque so-
cordiae,

Quantum intellexi modo senis sententiam de nuptiis,
180 Quae, si non astu providentur, me aut herum pes-
sumdabunt.

Nec, quid agam, certum est, Pamphilumne adiu-
tem, an auscultem seni.

Si illum relinquo, eius vitae timeo; sin opitulator,
huius minas,

Cui verba dare difficile est. Primum iam de amore
hoc comperit;

Me infensus servat, ne quam faciam in nuptiis fal-
laciā;

185 Si senserit, perii! aut, si lubitum fuerit, causam
ceperit:

Qua iure qua me iniuria praecipitem in pistri-
num dabit.

Ad haec mala hoc mi accedit etiam: haec Andria,
Si ista uxor, sive amica est, grāvida e Pamphilo
est;

Audireque eorum est operae pretium audaciā:
190 Nam inceptio est amentium, haut amantium:
Quidquid peperisset, decreverunt tollere;
Et fingunt quandam inter se nunc fallaciā:
Civem Atticā esse hanc. Fuit olim hinc quidam
senex

Mercator; navem is fregit apud Andrum insulam;
195 Is obiit mortem: ibi tum hanc eiectā Chrysidis
Patrem recepissee orbam, parvam. Fabulae!
Mi quidem non fit verisimile; at ipsis commen-
tum placet.

Set Mysis ab ea egreditur. At ego hinc me
ad forum,

Vt Pamphilum conveniā, ne pater opprimat.

MYSIS.

200 Audio, Archylis, iamdudum: Lesbiam adduci
iubes. I. 3.

Sane pol ea temulenta est mulier et temeraria,
Nec satis digna, cui committas primo partu mulierem;

Tamen eam adducam. — Importunitatem spectate aniculae:

Quia compotrix eius est! — Di, date facultatem,
obsecro,

205 Huic pariundi, atque illi in aliis potius peccandi
locum!

Set quidnam Pamphilum exanimatum video? vereor, quid siet.

Opperiar, ut sciam, nunquidnam haec turbae tristitia adferat.

PAMPHILVS. MYSIS.

PAMPHILVS.

Hoccine humanum factu aut inceptu? hoccine est
officium patris? I. 4.

MYSIS.

Quid illud est?

PAMPHILVS.

Proh deum fidem! quid, si hoc non,
contumelia est?

210 Vxorem decrerat dare sese mi hodie: non oportuit
Praescisse me ante? non prius communicatum oportuit?

MYSIS.

Miseram me, quod verbum audio!

PAMPHILVS.

Quid Chremes, qui denegarat, se commissurum mihi
Gnatam suam uxorem? is mutavit, quia me immutatatum videt.

Itano

215 Itane obstinate dat operam, ut me a Glycerio miserum abstrahat?

Quod si fit, pereo funditus.

Adeon' hominem esse invenustum aut infelicem,
ut ego sum, quenquam?

Proh deum atque hominum fidem!

Nullon' ego Chremetis pacto adfinitatem effugere
potero,

220 Quot modis contemptus, spretus? Facta, transacta
omnia! — Hem,

Repudiatus repetor! quamobrem? nisi si id est,
quod suspicor:

Aliquid monstri alunt; ea quoniam nemini obtrudi
potest,

Itur ad me.

MYRSIS.

Oratio haec me miseram exanimavit metu!

PAMPHILVS.

Nam quid ego nunc de patre? Vah,

225 Tantamne rem tam negligenter agere! Praeter-
iens modo

Mihi apud forum: Vxor tibi ducenda est, Pamphile,
hodie, inquit: para!

Abi domum! — Id mihi visus dicere: abi cito ac
suspende te.

Obstipui. Censen', ullum verbum me potuisse
proloqui,

Aut ullam causam, ineptam saltem, falsam, ini-
quam? obmutui.

230 Quodsi ego rescissem id prius, quid facerem, si
quis nunc me interroget,

Aliquid facerem, ut hoc ne facerem. — Set nunc
quid primum exsequar?

Tot me impediunt curae, quae meum animum
divorse trahunt:

Amor huius, misericordia, nuptiarum sollicitatio,

Tum patris pudor, qui me tam leni passus animo
est usque adhuc,

235 Quae meo cunque animo lubitum est, facere. Eine
ego ut advorser? hei mihi!

Incertum est, quid agam.

MYSIS.

Misera timeo, Incertum hoc quorsus accidat;
Set peropus nunc est, aut hunc cum ipsa, aut de
ipsa me advorsum hunc, loqui.
Dum in dubio est animus, paulo momento huc,
illuc, impellitur.

PAMPHILVS.

Quis hic loquitur? Mysis? salve.

MYSIS.

O salve, Pamphile.

PAMPHILVS.

Quid agitur?

MYSIS.

Rogas?

240 Laborat e dolore atque ex hoc misera sollicita
est, diem

Quia olim in hunc sunt constitutae nuptiae; tum
autem hoc timet,

Ne deseras se.

PAMPHILVS.

Hem, egone istuc conari queam?

Egon' propter me illam decipi miseram sinam,
Quae mihi suum animum atque omnem vitam cre-
didit,

245 Quam ego autem egregie caram pro uxore habue-
rim?

Bene et pudice eius doctum atque eductum sinam,
Coactum egestate, ingenium immutarier?

Non faciam.

MYSIS.

Haut verear, si in te sit solo situm;

Set ut vim queas ferre!

PAMPHILVS.

Adeone me ignavum putas,

250 Adeone porro ingratum, inhumanum, ferum,

Vt neque me consuetudo neque amor neque pudor
Commoveat neque commoneat, ut servem fidem?

MYSIS.

Vnum hoc scio, esse meritam, ut sis memor sui.

PAMPHILVS.

Memor sim? o Mysis, Mysis, etiam nunc mihi
255 Scripta illa sunt in animo dicta Chrysidis
De Glycerio. Iam moriens me ferme vocat;
Accessi; vos semotae; nos soli; incipit:
Mi Pamphile, huius formam atque aetatem vides,
Nec clam te est, quam illi utraeque res inutiles
260 Ad rem tutandam et ad pudicitiam sient.
Quod ego per hanc te dexteram et Genium tuum,
Per tuam fidem, perque huius solitudinem,
Te obtestor, ne abs te hanc segreges, neu deseras!
Si te in germani fratris dilexi loco,
265 Sive haec te solum semper fecit maxumi,
Seu tibi fuit morigera in rebus omnibus:
Te isti virum do, amicum, tutorem, patrem;
Bona nostra haec tibi permitto et tuae mando fide.
Ac mi in manum dat; mors continuo ipsam oc-
cupat.

270 Accepi: accepta servabo.

MYSIS.

Ita spero quidem.

PAMPHILVS.

Set cur tu abis ab ea?

MYSIS.

Obstetricem arcesso.

PAMPHILVS.

Propera. Atque (audin'?)
Verbum unum cave de nuptiis, ne ad morbum
hoc etiam.

MYSIS.

Teneo.

CHARINVS. BYRRHIA. PAMPHILVS.

CHARINVS.

Quid ais, Byrrhia? datur illa Pamphilo hodie nuptum?

BYRRHIA.

Sic est. II. 1.

CHARINVS.

Qui scis?

BYRRHIA.

Apud forum modo audî e Davo.

CHARINVS.

Vae misero mihi!

275 Vt animus in spe atque in timore usque antehac
attentus fuit,

Ita, postquam ademta spes est, lassus, cura confectus, stupet.

BYRRHIA.

Quaeso edepol, Charine, quando non potest id fieri, quod vis,

Id velis, quod possit.

CHARINVS.

Nil volo aliud nisi Philumenam.

BYRRHIA.

Ah,

Quanto satius, te id dare operam, qui istum amorem ex corde elicias,

280 Quam id loqui, quo magis libido frustra incendatur tua!

CHARINVS.

Facile omnes, quom valemus, recta consilia aegrotis damus.

Tu si hic sis, aliter sentias.

BYRRHIA.

Age, age, ut lubet.

CHARINVS.

Set Pamphilum

Video. Omnia experiri certum est prius quam
pereo!

BYRRHIA.

Quid hic agit?

CHARINVS.

Ipsum hunc orabo, huic supplicabo, amorem huic
narrabo meum;

285 Credo, impetrabo, ut aliquot saltem nuptiis pro-
dat dies:

Interea fiet aliquid, spero.

BYRRHIA.

Id aliquid nihil est.

CHARINVS.

Byrrhia,

Quid tibi videtur: adeon' ad eum?

BYRRHIA.

Quidni? si nihil impetres,
Vt te arbitretur sibi paratum moechum, si illam
duxerit.

CHARINVS.

Abin' hinc in malam rem cum suspicione istac,
scelus?

PAMPHILVS.

290 Charinum video. Salve.

CHARINVS.]

O salve, Pamphile.

Ad te advenio, spem, salutem, consilium, auxilium,
expetens.

PAMPHILVS.

Neque pol consili locum habeo, neque ad auxi-
lium copiam.

Sed istuc quidnam est?

CHARINVS.

Hodie uxorem ducis?

PAMPHILVS.

Aiunt.

CHARINVS.

Pamphile,

Si id facis, hodie postremum me vides.

PAMPHILVS.

Quid ita?

CHARINVS.

Hei mihi,

295 Vereor dicere huic! dic quaeso, Byrrhia.

BYRRHIA.

Ego dicam?

PAMPHILVS.

Quid est?

BYRRHIA.

Sponsam hic tuam amat.

PAMPHILVS.

Nae iste haud mecum sentit. —

Ehodum, dic mihi:

Num quidnam amplius tibi cum illa fuit, Charine?

CHARINVS.

Ah, Pamphile,

Nil!

PAMPHILVS.

Quam vellem!

CHARINVS.

Nunc te per amicitiam et amo-
rem obsecro,

Principio, ut ne ducas...

PAMPHILVS.

Dabo equidem operam.

CHARINVS.

Set si id non potest,

300 Aut tibi nuptiae haec sunt cordi,....

PAMPHILVS.

Cordi?

CHARINVS.

Saltem aliquot dies

Profer, dum proficiscor aliquo, ne videam.

PAMPHILVS.

Audi nunc iam:

Ego ne utiquam officium, Charine, liberi esse hominis puto,

Cum nil promereat, postulare, id gratiae adponi sibi.

Nuptias effugere ego istas malo quam tu adipiscier.

CHARINVS.

305 Redduxti animum.

PAMPHILVS.

Nunc, si quid pote, aut tute aut hic Byrrhia

Facite, fingite, invenite, efficite, qui detur tibi;

Ego id agam, qui ne mihi detur.

CHARINVS.

Sat habeo.

PAMPHILVS.

Davom optume

Video, cuius consilio fretus sum.

CHARINVS.

At tu hercle haut quidquam mihi

Nisi ea, quae nihil opus sunt sciri. Fugin' hinc?

BYRRHIA.

Ego vero, ac lubens.

DAVVS. CHARINVS. PAMPHILVS.

DAVVS.

310 Di boni, boni quid porto! set ubi inveniam Pamphilum, II. 2.

Vt metum, qui nunc est, adimam, atque expleam animum gaudio?

CHARINVS.

Laetus est, nescio quid.

PAMPHILVS.

Nihil est. Nondum haec rescivit mala.

DAVVS.

Quem ego nunc credo, si iam audierit, sibi paratas nuptias,....

CHARINVS.

Audin' tu illum?

DAVVS.

Toto me oppido exanimatum quaerere.

315 Set ubi quaeram? quo nunc primum intendam?

CHARINVS.

Cessas adloqui?

DAVVS.

Habeo.

PAMPHILVS.

Dave, ades! resiste!

DAVVS.

Quis homo est, qui me...? o Pamphile,
Te ipsum quaerebam. Euge, Charine! ambo oportune! vos volo.

PAMPHILVS.

Dave, perii!

DAVVS.

Quin tu hoc audi.

PAMPHILVS.

Interii!

DAVVS.

Quid timeas, scio.

CHARINVS.

Mea quidem hercle certe in dubio vita est!

DAVVS.

Et quid tu, scio.

PAMPHILVS.

320 Nuptiae mihi...

DAVVS.

Etsi scio?

PAMPHILVS.

Hodie...

DAVVS.

Obtundis, tametsi intelligo?

Id paves, ne ducas tu illam; tu autem, ut ducas.

CHARINVS.

Rem tenes.

PAMPHILVS.

Istuc ipsum.

DAVVS.

Atqui istuc ipsum nil pericli est; me vide!

PAMPHILVS.

Obsecro te, quam primum hoc me libera miserum
metu!

DAVVS.

Hem, libero: uxorem tibi non dat Chremes.

PAMPHILVS.

Qui scis?

DAVVS.

Scies:

325 Tuus pater modo me adprehendit; ait, tibi uxorem dare

Hodie; item alia multa, quae nunc non est nar-
randi locus.Continuo ad te properans percurro ad forum, ut
dicam haec tibi.Vbi te non invenio, escendo in quendam ibi ex-
celsum locum;Circumspicio; nusquam. Forte ibi huius video
Byrrhiam;330 Rogo; negat vidisse. Mihi molestum; quid agam,
cogito.Redeunti interea ex ipsa re mi incidit suspicio:
Hem,Paululum obsoni; ipse tristis; de improvise nu-
ptiae; —

Non cohaerent.

PAMPHILVS.

Quorsumnam istuc?

DAVVS.

Ego me continuo ad Chremem.

Quom illo advenio, solitudo ante ostium. Iam id
gaudeo.

CHARINVS.

335 Recte dicis.

PAMPHILVS.

Perge.

DAVVS.

Maneo. Interea introire neminem
Video, exire neminem; matrona nulla in aedibus;
Nil ornati, nil tumulti; accessi, introspexi, scio.

CHARINVS.

Magnum signum!

DAVVS.

Num videntur convenire haec nuptiis?

PAMPHILVS.

Non opinor, Dave.

DAVVS.

Opinor narras? non recte accipis:
340 Certa res est. Etiam, inde abiens, puerum conveni
Chremis,
Olera et pisciculos minutos ferre in coenam obolo
seni.

CHARINVS.

Liberatus sum hodie, Dave, tua opera.

DAVVS.

Ac nullus quidem.

CHARINVS.

Quid ita? nempe huic prorsus illam non dat.

DAVVS.

Ridiculum caput!

Quasi necesse sit, si huic non dat, te illam uxorem ducere,
345 Nisi vides, nisi senis amicos oras, ambis.

CHARINVS.

Bene mones:

Ibo, etsi hercle saepe iam me spes haec frustrata
est. Vale.

PAMPHILVS.

Quid igitur sibi volt pater? cur simulat?

DAVVS.

Ego dicam tibi:

Si id succenseat nunc, quia non det tibi uxorem
Chremes,

Priusquam tuum, ut sese habeat, animum ad nu-
ptias perspexerit,

350 Ipse sibi esse iniurius videatur, neque id iniuria;
Set si tu negaris ducere, ibi culpam in te trans-
feret omnem;

Tum illae turbae fient.

PAMPHILVS.

Quidvis patiar...

DAVVS.

Pater est, Pamphile:

Difficile est. Tum haec sola est mulier: dictum
ac factum invenerit

Aliquam causam, quamobrem eam oppido eiciat.

PAMPHILVS.

Eiciat?

DAVVS.

Ac cito.

PAMPHILVS.

355 Cedo igitur, quid faciam, Dave?

DAVVS.

Dic te ducturum.

PAMPHILVS.

Hem!

DAVVS.

Quid est?

PAMPHILVS.

Egon' dicam?

DAVVS.

Cur non?

PAMPHILVS.

Nunquam faciam.

DAVVS.

Ne nega.

PAMPHILVS.

Suadere noli.

DAVVS.

Ex ea re quid fiat, vide.

PAMPHILVS.

Vt ab illa excludar, huc concludar!

DAVVS.

Non ita est.

Nempe hoc sic esse opinor: dicturum patrem:

360 Ducas volo hodie uxorem; tu, Ducam, inquires:

Cedo, quid iurgabit tecum? hic reddes omnia

Quae certa ei nunc sunt consilia ut incerta sint

Sine omni periculo: nam hoc haut dubium est, quin

Chremes

Tibi non det gnatam, ne tu ea causa minueris

365 Haec, quae facis, ne is mutet suam sententiam.

Patri dic, velle, ut, cum velit, tibi iure irasci non
queat:Nam quod tu speres, propulsabo facile: „Vxorem
his moribusDabit nemo!” — Inveniet inopem potius quam
te corrumpi sinat.Set si aequo te animo ferre accipiet, negligentem
feceris;370 Aliam otiosus quaeret; interea aliquid acciderit
boni.

PAMPHILVS.

Itan' credis?

DAVVS.

Haut dubium id quidem est.

PAMPHILVS.

Vide, quo me inducas!

DAVVS.

Quin taces?

PAMPHILVS.

Dicam. Puerum autem ne resciscat mi esse ex illa,
cantio est:

Nam suscepturum sum pollicitus.

DAVVS.

O audax facinus!

PAMPHILVS.

Hanc fidem

Sibi me obsecravit, qui se sciret non desertum
iri, ut darem.

DAVVS.

375 Curabitur. Set pater adest. Cave tristem te esse
sentiat.

SIMO. DAVVS. PAMPHILVS.

SIMO.

Reviso, quid agant, aut quid captent consili. II. 3.

DAVVS.

Hic nunc non dubitat, quin te ducturum neges;

Meditatus venit alicunde ex solo loco;

Orationem sperat invenisse se,

380 Qui differat te: proin tu fac apud te sies.

PAMPHILVS.

Vt possim modo!

DAVVS.

Crede hoc mihi, inquam, Pamphile,

Nunquam hodie tecum commutaturum patrem

Vnum esse verbum, si te dices ducere.

BYRRHIA. SIMO. DAVVS.
PAMPHILVS.

BYRRHIA.

Herus me, relictis rebus, iussit Pamphilum II. 4.

385 Hodie observarem, quid ageret de nūptiis.

Ipsum adeo praesto video cum Davo: hoc agam.

SIMO.

Vtrumque adesse video.

DAVVS.

Hem, serva!

SIMO.

Pamphile!

DAVVS.

Quasi de improvviso respice ad eum.

PAMPHILVS.

Ehem, pater!

DAVVS.

Probe.

SIMO.

Hodie uxorem ducas, ut dixi, volo.

BYRRHIA.

390 Nunc nostrae timeo parti, quid hic respondeat.

PAMPHILVS.

Neque istic neque alibi tibi erit usquam in me
mora.

BYRRHIA.

Hem...

DAVVS.

Obmutuit.

BYRRHIA.

Quid dixit?

SIMO.

Facis, ut te decet,

Quom istuc, quod postulo, impetro cum gratia.

DAVVS.

Sum verus?

BYRRHIA.

Herus, quantum audio, uxore excidit.

SIMO.

395 I nunc iam intro, ne in mora, cum opus sit, sies.

PAMPHILVS.

Eo.

BYRRHIA.

Nullane in re cuipiam esse homini fidem!

Verum illud verbum est, volgo quod dici solet:

Omnes sibi esse melius malle quam alteri.

Ego illam vidi virginem; forma bona

400 Memini videri: quo aequior sum Pamphilo,

Si sese in somnis, quam illum, amplecti maluit.

Renuntiabo, ut pro malo mihi det malum.

DAVVS.

Hic nunc me credit aliquam sibi fallaciam

Portare, et ea me hic restitisse gratia.

SIMO.

405 Quid Davos narrat?

DAVVS.

Aequae quidquam nunc quidem.

SIMO.

Nilne? hem!

DAVVS.

Nil prorsus.

SIMO.

Atqui expectabam quidem.

DAVVS.

Praeter spem evenit, sentio; hoc male habet vi-
rum.

SIMO.

Potin' est, te dicere verum mihi?

DAVVS.

Nil facilius.

SIMO.

Num illi molestae quidpiam sunt nuptiae

410 Haec propter hospitae huius consuetudinem?

DAVVS.

Nihil hercle; aut si adeo, bidui est aut tridui

Haec sollicitudo; nosti; deinde desinet:

Etenim ipse eam rem recta reputavit via.

SIMO.

Sic laudo.

DAVVS.

Dum ei licitum est, dumque aetas tulit,

415 Amavit; tum id clam; cavit, ne unquam infamiae
 Ea res sibi esset, ut virum fortem decet:
 Nunc uxore opus est: animum ad uxorem adpulit.

SIMO.

Subtristis esse visust aliquantum mihi.

DAVVS.

Nil propter hanc rem, sed, quod succenset tibi,
 420 Puerile quiddam est.

SIMO.

Quid id est?

DAVVS.

Nil.

SIMO.

Quin dic, quid est?

DAVVS.

Ait, parce nimium facere sumtum.

SIMO.

Mene?

DAVVS.

Te.

Vix, inquit, drachmis est obsonatus decem.

Num filio videtur uxorem dare?

Quem, inquit, vocabo ad coenam meorum aequalium

425 Potissimum nunc? Et, quod dicundum hic siet,
 Tu quoque perparce nimium. Non laudo.

SIMO.

Tace.

DAVVS.

Commovi.

SIMO.

Ego, istaec recte ut fiant, videro. —

Quidnam hoc est re? quid hic volt veterator
 sibi?

Nam si hic mali est quidquam, hem illic est huic
 re caput.

MYSIS. LESBIA. SIMO. DAVVS.
GLYCERIVM.

MYSIS.

430 Ita pol quidem res est, ut dixi, Lesbia: III. 1.
Fidelem haut ferme mulieri invenias virum;...

SIMO.

Ab Andria est ancilla haec.

DAVVS.

Quid narras?

SIMO.

Ita est.

MYSIS.

Sed hic Pamphilus...

SIMO.

Quid dicit?

MYSIS.

Firmavit fidem:...

SIMO.

Hem!

DAVVS.

Vtinam aut hic surdus aut haec muta facta sit!

MYSIS.

435 Nam, quod peperisset, tolli iussit.

SIMO.

Iupiter,

Quid ego audio? actum est, vera quidem haec si
praedicat!

LESBIA.

Ingenium narras adolescentis...

MYSIS.

Optimum.

Set sequere me intro, ne in mora sies.

LESBIA.

Sequor.

DAVVS.

Quod remedium nunc huic malo inveniam?

SIMO.

440 Adeon' est demens? ex peregrina? — Iam scio!
 ah,

Vix tandem sensi stolidus!

DAVVS.

Quid hic sensisse ait?

SIMO.

Haec primum adfertur iam mi ab hoc fallacia:
 Hanc parere simulant, quo Chremetem abster-
 reant!

GLYCERIVM.

Iuno Lucina, fer opem serva me, obsecro!

SIMO.

445 Hui, tam cito? ridiculum! postquam ante ostium
 Me audivit stare, adproperat! non sat commodis
 Divisa sunt temporibus tibi, Dave, haec.

DAVVS.

Mihin'?

SIMO.

Num immemores discipuli?

DAVVS.

Quid narras, nescio.

SIMO.

Hiccinē me si imparatum in veris nuptiis
 450 Adortus esset, quos me ludos redderet!
 Nunc huius periculo fit; ego in portu navigo.

LESBIA.

Adhuc, Archylis, quae adsolent, quaeque oportet

Signa esse ad salutem, omnia huic esse video.

Nunc primum fac istaec lavet; post deinde,

453 Quod inssi ei dari bibere, et, quantum imperavi,
 Date! mox huc revortor. —

Per ecaster scitus puer est natus Pamphilo.

Deos quaeso, ut sit superstes, quandoquidem ipse
 est ingenio bono,

Cumque huic est veritus optumae adolescenti facere iniuriam.

SIMO.

460 Vel hoc quin credat, qui te norit, abs te esse ortum?

DAVVS.

Quidnam id est?

SIMO.

Non imperabat coram, quid opus facto esset puerperae,
Set postquam egressa est, illis, quae sunt intus,
clamat de via.

O Dave, itan' contemnor abs te? aut itane tandem idoneus

Tibi videor esse, quem tam aperte fallere incipias dolis?

465 Saltem adcurate, ut metui videar certe, si resciverim!

DAVVS.

Certe hercle nunc hic se ipse fallit, haut ego.

SIMO.

Edixi tibi,
Interminatus sum: num facere veritus? ecquid retulit?

Credon' tibi hoc nunc, peperisse hanc e Pamphilo?

DAVVS.

Teneo, quid erret: habeo, quid agam.

SIMO.

Quid taces?

DAVVS.

470 Quid credas? quasi non tibi renunciata sint haec, sic fore!

SIMO.

Min' quidquam?

DAVVS.

Eho, an tute intellexi hoc adsimulari?

SIMO.

Inrideor?

DAVVS.

Renuntiatum est: nam qui istaec tibi incidit suspicio?

SIMO.

Qui? quia te noram.

DAVVS.

Quasi tu dicas, factum id consilio meo.

SIMO.

Certe enim scio.

DAVVS.

Non satis pernosti me etiam, qualis sim, Simo,...

SIMO.

475 Egon' te?

DAVVS.

Set si quid enarrare occoeper, continuo dari Tibi verba censes;...

SIMO.

Falson'?

DAVVS.

Itaque nil iam muttire audeo.

SIMO.

Hoc ego scio unum, neminem peperisse hic.

DAVVS.

Intellexi;

Set nihilo secius mox puerum huc deferent ante ostium.

Id ego iam nunc renuntio tibi, here, futurum, ut sis sciens,

480 Ne tu hoc posterius Davi factum dicas consilio aut dolis.

Prorsus a me opinionem hanc esse ego amotam volo.

SIMO.

Vnde id scis?

DAVVS.

Audiui et credo: multa concurrunt simul,
Qui coniecturam hanc nunc facio. Iam primum
haec se e Pamphilo
Gravidam dixit esse; inventum est falsum. Nunc,
postquam videt,

485 Nuptias domi adparari, missa est ancilla illico
Obstetricem arcessitum ad eam et puerum ut ad-
ferret simul.

Hoc ni sit, tu puerum ut videas, nil moventur
nuptiae.

SIMO.

Quid aisti? cum intellexeras id consili
Capere, cur non extemplo dixi Pamphilo?

DAVVS.

490 Quis igitur eum ab illa abstraxit, nisi ego? nam
omnes nos quidem

Scimus, quam misere hanc amarit; nunc sibi uxore
rem expetit.

Postremo id da mihi negoti; tu tamen idem has
nuptias

Perge facere ita ut facis; et id spero adiuturos
deos.

SIMO.

Imo abi intro; ibi me opperire, et, quod parato
opus, para. —

495 Non impulit me, haec nunc omnino ut crederem;
Set parvi pendo: illuc mihi multo maxumum est,
Quod mihi pollicitus ipse gnatus. Nunc Chremem
Conveniam; orabo gnato uxorem; id si impetro,
Quando alias malim, quam hodie, has fieri nu-
ptias?

500 Nam gnatus, quod pollicitus, haut dubium id mihi
Si nolit, quin eum merito possim cogere,
Atque adeo in ipso tempore eccum ipsum obviam.

SIMO. CHREMES.

SIMO.

Iubeo Chremetem.

III. 2.

CHREMES.

Oh, te ipsum quarebam.

SIMO.

Et ego te.

CHREMES.

Optato advenis:

Aliquot ad me adiere, ex te auditum qui aibant,
hodie filiam

505 Meam tuo nubere gnato; id viso, tunc an illi in-
saniant?

SIMO.

Ausculda paucis, et, quid te ego velim, et, quod
tu quaeris, scies.

CHREMES.

Ausculdo; loquere, quid velis?

SIMO.

Per te ego deos oro et nostram amicitiam, Chreme,
Quae, incepta a parvis, cum aetate adcrevit simul,
510 Perque unicam gnatam tuam et gnatum meum,
Cuius tibi potestas summa servandi datur,
Ut me adiuves in hac re atque ita uti nuptiao
Fuerant futurae, fiant.

CHREMES.

Ah, ne me obseca,

Quasi hoc te orando a me impetrare oporteat:

515 Alium me censes nunc atque olim, cum dabam?

Si in rem est utrique ut fiant, arcessi iube;

Set si ex ea re plus mali est quam commodi

Utrique, id oro te in commune ut consulás,

Quasi illa tua sit Pamphilique ego sim pater.

SIMO.

520 Imo ita volo itaque postulo ut fiat, Chreme,

Neque postulem abs te, ni ipsa res moneat.

CHREMES.

Quid est?

SIMO.

Irae sunt inter Glycerium et gnatum....

CHREMES.

Audio.

SIMO.

Ita magnae, ut sperem, avelli posse.

CHREMES.

Fabulae!

SIMO.

Profecto sic est.

CHREMES.

Sic hercle, ut dicam tibi:

525 Amantium irae amoris integratio est.

SIMO.

Hem, id te oro ut ante eamus, dum tempus datur,

Dumque eius lubido occlusa est contumeliis!

Priusquam harum scelera et lacrumae confictae
dolus

Reducunt animum aegrotum ad misericordiam,

530 Vxorem demus! spero, consuetudine et

Coniugio liberali devinctum, Chreme,

Dein facile ex illis sese emersurum malis.

CHREMES.

Tibi ita videtur; at ego non posse arbitror

Neque eum hanc perpetuo habere, neque me per-
peti.

SIMO.

535 Qui scis ergo istuc, nisi periculum feceris?

CHREMES.

At istuc pericli in filia fieri, grave est.

SIMO.

Nempe incommoditas denique huc omnis redit,

Si eveniat, quod di prohibeant, discessio;

At si corrigitur, quot commoditates, vide:

540 Principio amico filium restitueris;

Tibi generum firmum et filiae invenias virum.

CHREMES.

Quid istic? si ita istuc animum induxti esse utile,
Nolo tibi ullum commodum intercludier.

SIMO.

Merito te semper maximi feci, Chreme.

CHREMES.

545 Set quid ais?

SIMO.

Quid?

CHREMES.

Qui scis, eos nunc discordare inter se?

SIMO.

Ipsus mihi Davos, qui intimus consiliis eorum,
dixit;

Et is mihi suadet, nuptias quantum queam ut ma-
turem.

Num censes faceret, filium nisi sciret eadem haec
velle?

Tute adeo iam eius verba audies. — Heus, evo-
cate huc Davom!

550 Atque eccum video ipsum foras exire.

DAVVS. SIMO. CHREMES.

DAVVS.

Ad te ibam.

III. 5.

SIMO.

Quidnam est?

DAVVS.

Cur uxor non arcessitur? Iam advesperascit.

SIMO.

Audin'?

Ego dudum nonnil veritus sum abs te, Dave, ne
faceres idem,

Quod volgus servorum solet, dolis ut me deluderes,

Propterea quod amat filius.

DAVVS.

Egon' istuc facerem?

SIMO.

Credidi,

555 Idque adeo metuens vos celavi, quod nunc dicam.

DAVVS.

Quid?

SIMO.

Scies:

Nam propemodum habeo iam fidem.

DAVVS.

Tandem cognosti, qui siem.

SIMO.

Non fuerant nuptiae futurae,....

DAVVS.

Quid? non?

SIMO.

Sed ea gratia

Simulavi, vos ut pertentarem.

DAVVS.

Quid ais?

SIMO.

Sic res est.

DAVVS.

Vide!

Nunquam istuc ego quivi intelligere. Vah, consilium callidum!

SIMO.

560 Hoc audi. Vt hinc te introire iussi, opportune
hic fit mi obviam.

DAVVS.

Hem,

Numnam periimus?

SIMO.

Narro huic, tu quae dudum narrasti mihi,...

DAVVS.

Quidnam audiam?

SIMO.

Gnatam oro uti det, vixque id exoro.

DAVVS.

Occidi!

SIMO.

Hem, quid dixti?

DAVVS.

Optume, inquam, factum.

SIMO.

Nunc per hunc nulla est mora.

CHREMES.

Domum modo ibo; ut adparetur, dicam, atque
huc renuntio.

SIMO.

565 Nunc te oro, Dave, quoniam solus mi effecisti has
nuptias,....

DAVVS.

Ego vero solus!

SIMO.

Gnatum mihi corrigere porro enitere.

DAVVS.

Faciam hercle sedulo.

SIMO.

Potes nunc, dum animus inritatus est.

DAVVS.

Quiescas.

SIMO.

Age igitur. Ubi nunc est ipse?

DAVVS.

Mirum, ni domi.

SIMO.

Ibo ad eum atque eadem haec, tibi quae dixi, di-
cam itidem illi.

DAVVS.

Nullus sum!

570 Quid causae est, quin hinc in pistrinum recta
proficiscar via?

Nilil est preci loci relictum, tam perturbavi omnia:

Herum fefelli; in nuptias conieci herilem filium;
Feci, hodie ut fierent, insperante hoc atque in-
vito Pamphilo.

Hem astutias! quodsi quiessem, nihil evenisset
mali!

575 Set eccum video ipsum. Occidi!

Vtinam mi esset aliquid hic, quo nunc me prae-
cipitem darem!

PAMPHILVS. DAVVS.

PAMPHILVS.

Vbi illic est scelus, qui me hodie...? Perii! atque
hoc confiteor iure III. 4.

Mi obtigisse, quandoquidem tam iners, tam nulli
consili.

Servone fortunas meas me commisisse futili?

580 En pretium ob stultitiam fero; set inultum id nun-
quam a me auferet.

DAVVS.

Posthac incolumem sat scio fore me, si devito hoc
malum.

PAMPHILVS.

Nam quid ego nunc dicam patri? negabon' velle
me, modo

Qui ducere sum pollicitus? qua fiducia id facere
audeam?

Nec, quid me nunc faciam, scio.

DAVVS.

Nec, quid me; at id ago sedulo:

585 Dicam, aliquid iam inventurum, ut huic malo ali-
quam producam moram.

PAMPHILVS.

Oh!

DAVVS.

Visus sum!

PAMPHILVS.

Ehodum, bone vir, quid ais? viden',
me consiliis tuis

Misere impeditum esse?

DAVVS.

At iam expediam.

PAMPHILVS.

Expedies?

DAVVS.

Certe, Pamphile.

PAMPHILVS.

Nempe, ut modo!

DAVVS.

Ino melius, spero.

PAMPHILVS.

Oh, tibi ego ut credam, furcifer?

Tu rem impeditam et perditam restituas? hem,
quo fretus sim,

590 Qui me hodie ex tranquillissima re coniecisti in
nuptias!

Annon, futurum hoc esse, dixi?

DAVVS.

Dixti.

PAMPHILVS.

Quid meritus?

DAVVS.

Crucem.

Set paululum sine ad me redeam! iam aliquid
dispiciam.

PAMPHILVS.

Hei mihi,

Cum non habeo spatium, ut de te sumam suppli-
cium, ut volo!

Namque hoc tempus praecavere mihi me, haut te
ulcisci sinit.



CHARINVS. PAMPHILVS. DAVVS.

CHARINVS.

595 Hoccine credibile aut memorabile, IV. 1.

Tanta vecordia innata cuiquam ut siet,

Vt malis gaudeant, atque ab incommodis

Alterius sua ut comparent commoda? ah! —

Idne vero? imo id est pessimum hominum genus,

600 De negando modo quís pudor paulum adest;

Post, ubi tempu', promissa iam perfici,

Tum, coacti, necessario se aperiunt:

Et timent, et tamen res premit denega-

re: Ibi tum eorum impudentissima oratio est:

605 Tu quis es? quis mihi es? cur tibi meam? heus,
mili

Proxumus sum egomet! — Attamen ubinam fides?

Si roges, nil pudent.

Hic, ubi opus est, non verentur; illi, ubi nil opus,
ibi verentur.Set quid agam? adeamne ad eum, aut cum eo
iniuriam hanc expostulem?610 Ingeram mala multa? — Atqui aliquis dicat: nil
promoveris. —Multum molestus certe ei fuero atque animo mo-
rem gessero.

PAMPHILVS.

Charine, et me et te imprudens, nisi quid di re-
spiciunt, perdidisti.

CHARINVS.

Itane imprudens? Tandem inventa est causa? —
Solvisti fidem!

PAMPHILVS.

Qui tandem?

CHARINVS.

Etiam nunc me dictis ducere istis postulas?

PAMPHILVS.

615 Quid istuc est?

CHARINVS.

Postquam me amare dixi, complacita est tibi.
 Heu me miserum, qui tuum animum ex animo
 spectavi meo.

PAMPHILVS.

Falsus es.

CHARINVS.

Non sat tibi esse hoc solidum visum
 est gaudium,
 Nisi me lactasses amantem et falsa spe produceres.
 Habeas!

PAMPHILVS.

Habeam? ah, an nescis, quantis in malis
 vorser miser,
 620 Quantasque hic suis consiliis mihi confecit solli-
 citudines,
 Meus carnufex?

CHARINVS.

Quid istuc tam mirum, de te si
 exemplum capit?

PAMPHILVS.

Haut istuc dicas, si cognoris vel me vel amorem
 meum.

CHARINVS.

Scio: cum patre altercasti dudum, et is nunc
 propterea tibi
 Succenset, nec te quivit hodie cogere, illam ut
 duceres!

PAMPHILVS.

625 Imo etiam, quo tu minus scis aerumnas meas,
 Haec nuptiae non adparabantur mihi,
 Nec postulabat nunc quisquam uxorem dare.

CHARINVS.

Scio: tu coactus tua voluntate es.

PAMPHILVS.

Mane:

Nondum scis.

CHARINVS.

Equidem, ducturum illanc esse te.

PAMPHILVS.

630 Cur me enicas? hoc audi: nunquam destitit

Instare, ut, me ducturum, patri dicerem;

Suadere, orare, usque adeo donec perpulit.

CHARINVS.

Quis homo istuc interturbat?

PAMPHILVS.

Davos.

CHARINVS.

Davos? quamobrem?

PAMPHILVS.

Nescio,

Nisi deos satis mihi scio fuisse iratos, qui auscul-
taverim.

CHARINVS.

635 Factum hoc est, Dave?

DAVVS.

Factum est.

CHARINVS.

Hem, quid ais, scelus?

At tibi di dignum factis exitium duint!

Eho dic mihi, si omnes hunc coniectum in nuptias

Inimici vellent, quidni hoc consilium darent?

DAVVS.

Deceptus sum, at non defetigatus.

PAMPHILVS.

Scio!

DAVVS.

640 Hac non successit, alia adgrediemur via,

Nisi si id putas, quia primo processit parum,

Non posse iam ad salutem converti hoc malum.

PAMPHILVS.

Imo etiam: nam sat credo, si advigilaveris,

Ex unis geminas mihi conficies nuptias.

DAVVS.

645 Ego, Pamphile, hoc tibi pro servitio debeo,

Conari manibus pedibus, noctes et dies,
 Capitis periculum adire, dum prosim tibi:
 Tuum est, si quid praeter spem, mihi te igno-
 scere.

Parum succedit quod ago: at facio sedulo.
 650 Vel melius tute reperi, me missum face.

PAMPHILVS.

Cupio; restitue, quem a me accepisti, locum.

DAVVS.

Faciemus.

PAMPHILVS.

At iam hoc opus est.

DAVVS.

Hem!... Set mane: concrepuit ostium.

PAMPHILVS.

Nihil ad te.

DAVVS.

Quaero....

PAMPHILVS.

Hem, nuncne demum?

DAVVS.

At iam hoc tibi inventum dabo.

MYSIS. PAMPHILVS. CHARINVS.

DAVVS.

MYSIS.

Iam, ubiubi erit, inventum tibi curabo et mecum
 adductum IV. 2.
 655 Tuum Pamphilum: modo tu, anime mi, noli te
 macerare.

PAMPHILVS.

Mysis!

MYSIS.

Quis est? — Hem, te optume mihi, Pam-
 phile, offers!

PAM-

PAMPHILVS.

Quid id est?

MYSIS.

Orare iussit, si se ames, hera, iam ut ad sese venias:

Videre ait te cupere.

PAMPHILVS.

Vah, perii! hoc malum integrascit!

Siccine me atque illam opera tua nunc miseros sollicitari!

660 Nam idcirco arcessor, nuptias quod mi adparari sensit.

CHARINVS.

Quis quidem quam facile potuerat quiesci, si hic quiesset!

DAVVS.

Age, si hic non insanit satis sua sponte, instiga!

MYSIS.

Atque edepol

Ea res est, proptereaue nunc misera in moerore est.

PAMPHILVS.

Mysis,

Per omnes tibi adiuro deos, nunquam eam me deserturum,

665 Non, si capiundos mihi sciam esse inimicos omnes homines.

Hanc mi expetivi; contigit; conveniunt mores: valeant,

Qui inter nos discidium volunt! hanc, nisi mors, mi adimet nemo!

MYSIS.

Resipisco.

PAMPHILVS.

Non Apollinis magis verum atque hoc responsum est:

Si poterit feri, ut ne pater per me stetisse credat,

D

670 Quo minus hae fierent nuptiae, volo; set si id
non poterit,

Id faciam, in proclivi quod est, per me stetisse
ut credat. —

Quis videor?

CHARINVS.

Miser aequae atque ego.

DAVVS.

Consilium quaero.

PAMPHILVS.

Fortis!

Scio, quid conare!

DAVVS.

Hoc ego tibi profecto effectum reddam.

PAMPHILVS.

Iam hoc opus est.

DAVVS.

Quin iam habeo.

CHARINVS.

Quid est?

DAVVS.

Huic, non tibi, habeo, ne erres.

CHARINVS.

675 Sat habeo.

PAMPHILVS.

Quid facies? cedo.

DAVVS.

Dies satis sit vereor

Ad agendum, ne vacuum me nunc ad narrandum
esse credas.

Proinde hinc vos amolimini: nam mi impedimento
estis.

PAMPHILVS.

Hanc visam ego.

DAVVS.

Quid tu? quo hinc te agis?

CHARINVS.

Verum vis dicam?

DAVVS.

Imo etiam

Narrationis initium incipit mihi!

CHARINVS.

Quid me fiet?

DAVVS.

680 Eho tu impudens, non satis habes, quod tibi die-
culam addo,

Quantum huic promoveo nuptias?

CHARINVS.

Dave, attamen....

DAVVS.

Quid ergo?

CHARINVS.

Vt ducam!

DAVVS.

Ridiculum!

CHARINVS.

Huc face ad me venias, si quid poteris!

DAVVS.

Quod veniam, nil habeo.

CHARINVS.

Attamen, si quid....

DAVVS.

Age, veniam.

CHARINVS.

Si quid,

Domi ero.

DAVVS.

Tu, Mysis, dum exeo, parumper opperire hic.

MYSIS.

685 Quapropter?

DAVVS.

Ita facto est opus.

MYSIS.

Matura.

DAVVS.

Iamiam hic adero.

MYSIS.

Nilne esse proprium cuiquam! Di, vostram fidem,
Summum bonum esse herae hunc putabam Pam-
philum,

Amicum, amatorem, virum, in quovis loco
Paratum; verum ex eo nunc misera quem capit
690 Laborem! facile hic plus mali est, quam illic boni.
Set Davos exit. Mi homo, quid istuc, obsecro,
est?

Quo puerum portas?

DAVVS.

Mysis, nunc opus tua
Mihi ad hanc rem exprompta malitia atque astutia.

MYSIS.

Quidnam incepturus?

DAVVS.

Accipe a me hunc ocus
695 Atque ante nostram ianuam adpone.

MYSIS.

Obsecro,

Humine?

DAVVS.

Ex ara hinc sume verbenas tibi,
Atque ei substerne.

MYSIS.

Quamobrem tute id non facis?

DAVVS.

Quin, si forte opus sit ad herum iurato mihi,
Non adposuisse, ut liquido possim.

MYSIS.

Intelligo:

700 Nova nunc in te istaec religio incessit! — Cedo!

DAVVS.

Movo ocus te, ut, quid agam, porro intelligas! —
Proh Iupiter....

MYSIS.

Quid?

DAVVS.

Sponsae pater intervenit:
Quod primum intendi, iam consilium repudio.

MYSIS.

Nescio, quid narres.

DAVVS.

Ego quoque hinc ab dextera
705 Venire me adsimulabo; tu subservias
Orationi, utcunque opus, verbis vide!

MYSIS.

Quid agas, ego nil intelligo; set si quid est,
Quod opus sit opera vobis mea, ut tu plus vides,
Manebo, ne quod vestrum remorer commodum.

CHREMES. MYNIS. DAVVS.

CHREMES.

710 Revortor, postquam, quae opus fuere ad nu-
ptias IV. 3.

Gnatae, paravi, ut iubeam arcessi. — Set quid hoc?
Puer hercle est! — Mulier, tun' adposuisti?

MYSIS.

Vbi illic est?

CHREMES.

Non mihi respondes?

MYSIS.

Nusquam est. Vae miserae mihi!
Reliquit me homo atque abiit!

DAVVS.

Di, vestram fidem,
715 Quid turbae apud forum est! quid hominum liti-
gant!

Tum annona cara est! — Quid dicam aliud,
nescio.

MYSIS.

Cur tu, obsecro, hic me solam...?

DAVVS.

Hem, quae haec est fabula? —
Eho, puer hic unde est, Mysis? quisve huc attulit?

MY SIS.

Satin' sanus, qui me id rogites?

DAVVS.

Quem ego igitur rogem,
720 Qui hic neminem alium video?

CHREMES.

Miror, unde sit.

DAVVS.

Dicturan', quod rogo?

MY SIS.

Au!

DAVVS.

Concede ad dexteram.

MY SIS.

Deliras! non tute ipse...?

DAVVS.

Verbum unum mihi
Praeterea quam quod te rogo faxis, cave.

MY SIS.

Malè dicis?

DAVVS.

Vnde est? — Clare!

MY SIS.

A nobis.

DAVVS.

Ha ha he! —

725 Mirum vero, impudenter mulier si facit
Meretrix?

CHREMES.

Ab Andria haec est, quantum intelligo.

DAVVS.

Adeon' videmur vobis esse idonei,
In quibus sic inludatis?

CHREMES.

Veni tempore.

DAVVS.

Propera adeo puerum tollere hinc ab ianua! —

730 Mane! cave quoquam ex istoc excessis loco! —

MYSIS.

Di te eradicent, ita me miseram territas!

DAVVS.

Tibi dico ego, annon?

MYSIS.

Quid vis?

DAVVS.

At etiam rogas?

Cedo, cuium puerum hic adposuisti? dic mihi.

MYSIS.

Tu nescis?

DAVVS.

Mitte id, quod scio; dic, quod rogo.

MYSIS.

735 Vostri....

DAVVS.

Cuius nostri?

MYSIS.

Pamphili.

CHREMES.

Hem!

DAVVS.

Quid? Pamphili?

MYSIS.

Eho, annon est?

CHREMES.

Recte has fugi semper nuptias!

DAVVS.

O animadvertendum facinus!

MYSIS.

Quid? quid clamitas?

DAVVS.

Quemne ego heri vidi ad vos adferri vesperi?

MYSIS.

O hominem audacem!

DAVVS.

Verum: vidi Cantharam

740 Suffarcinatam!

MYSIS.

Dīs pol habeo gratiam,

Cum in pariundo aliquot adfuerunt liberae.

DAVVS.

Nae illa illum haut novit, cuius causa haec incipit.

Chremes, si positum puerum ante aedes viderit,

Suam gnatam non dabit? — Tanto hercle magis
dabit.

CHREMES.

745 Non hercle faciet!

DAVVS.

Nunc adeo, ut tu sis sciens,

Nisi puerum tollis, iam ego hunc in mediam viam

Provolvam, teque ibidem pervolvam in luto.

MYSIS.

Tu pol homo non es sobrius.

DAVVS.

Fallacia

Alia aliam trudit: iam susurrari audio,

750 Civem Atticam esse hanc.

CHREMES.

Hem!

DAVVS.

Coactus legibus

Eam uxorem ducet!

MYSIS.

Eho, obsecro, annon civis est?

CHREMES.

Iocularium in malum insciens pene incidi!

DAVVS.

Quis hic loquitur? — O Chreme, per tempus ad-
venis.

Ausculda.

CHREMES.

Audiui iam omnia.

DAVVS.

Anne haec tu omnia....

CHREMES.

755 Audivi, inquam, a principio.

DAVVS.

Audistin', obsecro? Hem
Scelera! Hanc iam oportet in cruciatum hinc ab-
ripi. —

Hic ille est! non te credas Davom ludere!

MYSIS.

Me miseram! nil pol falsi dixi, mi senex.

CHREMES.

Novi omnem rem. Est Simo intus?

DAVVS.

Est.

MYSIS.

Ne me attigas,

760 Scelestes! Si pol Glycerio non omnia haec....

DAVVS.

Eho, inepta, nescis, quid sit actum?

MYSIS.

Quid sciam?

DAVVS.

Hic socer est; alio pacto haud poterat fieri,
Vt sciret haec, quae voluimus.

MYSIS.

Praediceres.

DAVVS.

Paulum interesse censes, ex animo omnia,
765 Natura uti fert, facias, an de industria?

CRITO. MYSIS. DAVVS

CRITO.

In hac habitasse platea dictum est Chrysidem, IV.4.
Quae inhoneste parere se hic optavit divitias

Potius quam in patria honeste pauper viveret.

. Eius morte ea ad me lege redierunt bona.

770 Set, quos perconter, video. Salvete!

MY SIS.

Obsecro,

Quem video? estne hic re consobrinus Chrysidis?

Is est!

CRITO.

O Mysis, salve!

MY SIS.

Salvos sis, Crito!

CRITO.

Itan' Chrysis? — Hem!

MY SIS.

Nos quidem pol miseras perdidit.

CRITO.

Quid vos? quo pacto hic? Satine recte?

MY SIS.

Nosne? sic!

775 Vt quimus, aiunt, quando, ut volumus, non licet.

CRITO.

Quid Glycerium? Iam hic suos parentes repperit?

MY SIS.

Vtinam!

CRITO.

Ah! nondum etiam? haut auspicato huc
me adpuli;

Nam pol si id scissem, nunquam huc tetulissem
pedem:

Haec semper esse dicta est atque habita est soror;

780 Illius quae fuerunt, possidet; nunc me, hospitem,

Lites sequi, quam id mihi sit facile atque utile,

Aliorum exempla commonent; simul arbitror,

Iam esse aliquem amicum et defensorem ei: nam
fere

Grandiuscula iam profecta est illinc; clamitent,

785 Me sycophantam hereditatem persequi,

Mendicum; tum ipsam despoliare non lubet.

MY SIS.

O optume hospes! pol, Crito, antiquom obtines!

CRITO.

Duc me ad eam, quando huc-veni, ut videam.

MY SIS.

Maxume.

DAVVS.

Sequar hos: nolo hoc in tempore me videat senex.

CHREMES. SIMO.

CHREMES.

790 Satis iam, satis, Simo, spectata erga te amicitia
est mea; V. I.

Satis pericli incepti adire: orandi iam finem face:
Tibi dum obsequier studeo, pene inlusi vitam
filiae.

SIMO.

Imo enim nunc quam maxume abs te postulo at-
que oro, Chreme,
Vt beneficium, verbis initum dudum, re nunc
comprobes.

CHREMES.

795 Vide, quam iniquos sis prae studio! dum id effi-
cias, quod cupis,
Neque modum benignitatis, neque, quid me ores,
cogitas:

Nam si cogites, remittas iam me onerare iniuriis.

SIMO.

Quibus?

CHREMES.

At rogitas? perpulisti me, ut homini ado-
lescentulo

In alio occupato amore, abhorrenti ab re uxoria,
800 Filiam darem in seditionem atque incertas nu-
ptias,

Eius labore atque eius dolore gnato ut medicarer
tuo;

Impetrasti inceptum, res dum tetulit; nunc non
fert: feras.

Civem hinc illam esse aiunt; natus puer est: nos
missos face.

SIMO.

Per ego te deos oro, ut ne illis animum inducas
credere,

805 Quibus id maxime utile est, illum esse quam de-
terrimum.

Nuptiarum gratia haec sunt ficta atque incepta
omnia;

Vbi ea causa, quamobrem haec faciunt, erit adempta
iis, desinent.

CHREMES.

Erras: cum Davo egomet vidi iurgantem ancillam.

SIMO.

Scio.

CHREMES.

Ac

Vero vultu, cum, ibi me adesse, neuter tum prae-
senserat.

SIMO.

810 Credo; et id facturas, Davos dudum praedixit
mihi, et

Nescio, qui id tibi sum oblitus hodie, ut volui,
dicere.

DAVVS. CHREMES. SIMO. DROMO.

DAVVS.

Animo nunc iam otioso esse impero.... V. 2.

CHREMES.

Hem Davom tibi!

SIMO.

Vnde egreditur?

DAVVS.

Meo praesidio atque hospitis.

SIMO.

Quid illud mali?

DAVVS.

Commodiorem ego hominem, adventum, tempus
non vidi.

SIMO.

Scelus

815 Quemnam hic laudat?

DAVVS.

Omnis res est iam in vado.

SIMO.

Cesso adloqui?

DAVVS:

Herus est; quid agam?

SIMO.

O salve, bone vir.

DAVVS.

Hem Simo! o noster Chreme!

Omnia adparata iam sunt intus.

SIMO.

Curasti probe!

DAVVS.

Vbi voles, arcesse.

SIMO.

Bene sane: id enimvero hinc nunc abest.

Etiam tu hoc responde: quid istic tibi negoti est?

DAVVS.

Mihin'?

SIMO.

Ita.

DAVVS.

820 Mihin'?

SIMO.

Tibi ergo.

DAVVS.

Modo ego introivi....

SIMO.

Quasi ego, quam dudum, rogem?

DAVVS.

Cum tuo gnato una.

SIMO.

Anne est intus Pamphilus? Crucior miser!
Eho, non tu dixisti esse inter eos inimicitias, car-
nufex?

DAVVS.

Sunt.

SIMO.

Cur igitur hic est?

CHREMES.

Quid illum censes? cum illa litigat.

DAVVS.

Imo vero indignum, o here, iam facinus saxo ex
me audies:

825 Nescio qui senex modo venit, illum, confidens,
catus;

Faciem cum videas, videtur esse quantivis preti;
Tristis severitas inest in vultu atque in verbis fides.

SIMO.

Quidnam adportas?

DAVVS.

Nil quidem, nisi quod eum audiui dicere....

SIMO.

Quid ait tandem?

DAVVS.

Glycerium esse civem scire se Atticam.

SIMO.

Hem

830 Dromo! Dromo!

DAVVS.

Quid est?

SIMO.

Dromo!

DAVVS.

Audi!

SIMO.

Verbum si addideris.... Dromo!

DAVVS.

Audi, obsecro!

DROMO.

Quid vis?

SIMO.

Sublimem hunc intro rape, quantum potes!

DROMO.

Quem?

SIMO.

Davom.

DAVVS.

Quamobrem?

SIMO.

Quia lubet. — Rape, inquam!

DAVVS.

Quid feci?

SIMO.

Rape!

DAVVS.

Si quidquam inuenies me mentitum, occidito.

SIMO.

Nihil audio.

Ego iam te commotum reddam.

DAVVS.

Tamenetsi hoc verum est?

SIMO.

Tamen. —

835 Cura adservandum vinctum, atque (audin?) quadrupedem constringito!

Age, nunc iam ego pol hodie, si vivo, tibi
Herum quid sit pericli ostendam fallere
Et patrem illi!

CHREMES.

Ah ne saevi tantopere.

SIMO.

O Chreme,

Pietatem gnati nonne te miseret mei?

840 Tantum laborem ob talem capere filium!

Age, Pamphile! exi, Pamphile! ecquid te pudet?

PAMPHILVS. SIMO. CHREMES.

PAMPHILVS.

Quis me volt? — Perii! pater est.

V. 3.

SIMO.

Quid ais, omnium...?

CHREMES.

Ah,

Rem potius ipsam dic, ac mitte male loqui.

SIMO.

Quasi quidquam in hunc iam gravius dici possiet.

845 Ain' tandem? civis Glycerium est?

PAMPHILVS.

Ita praedicant.

SIMO.

Ita praedicant? O ingentem confidentiam!

Num cogitat, quid dicat? num facti piget?

Num color enim pudoris signum usquam indicat?

Adeo impudenti esse animo, ut praeter civium

850 Morem atque legem et sui voluntatem patris

/ Tamen hanc habere studeat cum summo probro?

PAMPHILVS.

Me miserum!

SIMO.

Hem, modone id demum sensi, Pamphile?

Olim istuc, olim, cum ita animum induxti tuum,

Quod cuperes aliquo pacto efficiundum tibi,

855 Eodem die istuc verbum vere in te accidit!

Set quid ego me autem excrucio? cur me macero?

Cur meam senectutem huius sollicito amentia?

An,

An, pro huius peccatis ego supplicium ut sufferam?

Imo habeat, valeat, vivat cum illa!

PAMPHILVS.

Mi pater...

SIMO.

860 Quid mi pater? quasi tu huius indigeas patris!
Domus, uxor, liberi inventi, invito patre;
Adducti, qui illam civem hinc dicant: viceris!

PAMPHILVS.

Pater, licetne pauca?

SIMO.

Quid dices mihi?

CHREMES.

At

Tandem, Simo, audi.

SIMO.

Egon' audiam? quid ego audiam,

865 Chreme?

CHREMES.

Attamen dicat sine.

SIMO.

Age, dicat: sino.

PAMPHILVS.

Ego, me amare hanc, fateor; si id peccare est,
fateor id quoque.

Tibi, pater, me dedo: quidvis oneris impone! im-
pera!

Vis, me uxorem ducere? hanc vis mittere? ut
potero, feram.

Hoc modo te obsecro, ut ne credas, a me adlega-
tum hunc senem.

870 Sine me expurgem atque illum huc coram addu-
cam!

SIMO.

Adducas?

PAMPHILVS.

Sine, pater!

E

CHREMES.

Aequom postulat: da veniam.

PAMPHILVS.

Sine te hoc exorem!

SIMO.

Sino.

Quidvis cupio, dum ne ab hoc me falli comperiar,
Chreme.

CHREMES.

Pro peccato magno paulum supplici est satis patri.

CRITO. CHREMES. SIMO.
PAMPHILVS.

CRITO.

Mitte orare: una harum quaevis causa me, ut fa-
ciam, monet, V. 1.
875 Vel tu, vel, quod verum est, vel, quod ipsi cupio
Glycerio.

CHREMES.

Andrium ego Critonem video? — Is certe est.

CRITO.

Salvos sis, Chreme.

CHREMES.

Quid tu Athenas insolens?

CRITO.

Evenit. Set hiccine est Simo?

CHREMES.

Hic.

CRITO.

Simo, men' quaeris?

SIMO.

Eho, tu Glycerium esse hinc civem ais?

CRITO.

Tu negas?

SIMO.

Itane huc paratus advenis?

CRITO.

Qua re?

SIMO.

Rogas?

880 Tune impune haec facias? tune hic homines ad-
lescentulos,

Imperitos rerum, eductos libere, in fraudem in-
licis,

Sollicitando et pollicitando eorum animos lactas...?

CRITO.

Sanun' es?

SIMO.

Ac meretricios amores nuptiis conglutinas?

PAMPHILVS.

Perii! metuo, ut substet hospes.

CHREMES.

Si, Simo, hunc noris satis,

885 Non ita arbitrere: bonus est hic vir.

SIMO.

Hic vir sit bonus?

Itane adtemperate evenit, hodie in ipsis nuptiis

Vt veniret, antehac nunquam? est vero huic cre-
dendum, Chreme?

PAMPHILVS.

Patrem ni metuam, habeo, pro illa re illum quod
moneam probe.

SIMO.

Sycophanta!

CRITO.

Hem!

CHREMES.

Sic, Crito, est hic: mitte.

CRITO.

Videat, qui siet! .

890 Mihi si perget, quae volt, dicere, ea, quae non
volt, audiet. —

Ego istaec moveo aut curo? non tu tua, malum,
animo aequo feres?

Nam ego quae dico, vera an falsa audieris, iam
sciri potest.

Atticus quidam olim, navi fracta, ad Andrum eie-
ctus est,

Et istaec una parva virgo. Tum ille egens forte
adplicat

895 Chrysidis se ad patrem primo.

SIMO.

Fabulam inceptat!

CHREMES.

Sine.

CRITO.

Itane vero obturbat?

CHREMES.

Perge tu.

CRITO.

Is mihi cognatus fuit.

Qui eum recepit; ibi ego audiui ex illo, civem
esse Atticum.

Is ibi mortuus est.

CHREMES.

Eius nomen?

CRITO.

Nomen? tam cito. Phani —

CHREMES.

Hem,

Perii!

CRITO.

Verum hercle opinor fuisse Phanium. Hoc
certo scio,

900 Rhamnusium se aiebat esse.

CHREMES.

O Iupiter!

CRITO.

Eadem haec, Chreme,

Multi alii in Andro audivere.

CHREMES.

Vtinam id sit, quod spero! Eho, dic mihi,
Quid eam tum esse aibat? suamne?

CRITO.

Non.

CHREMES.

Cuiam igitur?

CRITO.

Fratris filiam.

CHREMES.

Certe mea est!

PAMPHILVS.

Quid ais?

SIMO.

Quid tu autem?

PAMPHILVS.

Ehem, arrige aures, Pamphile!

SIMO.

Qui credis?

CHREMES.

Phania ille frater meus fuit.

[SIMO.

Noram et scio.

CHREMES.

Is

905 Hinc, bellum fugiens meque in Asiam persequens,
proficiscitur;

Tum veritus hic relinquere eam est. Postilla nunc
primum audio,

Quid illo sit factum.

PAMPHILVS.

Vix sum apud me: ita animus commotus metu,
Spe, gaudio, mirando hoc tanto, tam repentino,
bono!

SIMO.

Nae tuam multimodis inveniri eam gaudeo.

CHREMES.

Credo.

PAMPHILVS.

Pater,....

CHREMES.

910 At mi unus etiam scrupulus restat, qui me male
habet.

PAMPHILVS.

Dignus es

Cum tua religione, odium...! Nodum in scirpo
quaeris.

CRITO.

Quid istuc est?

CHREMES.

Nomen non convenit.

CRITO.

Fuit hercle huic aliud parvae.

CHREMES.

Quod, Crito?

Numquid meministi?

CRITO.

Id quaero.

PAMPHILVS.

Egone huius memoriam patiar meae
Voluptati obstare, cum egomet possim in hac re
medicari mihi?

915 Non patiar. Heus, Chreme, quod quaeris, Pasi-
bula....

CRITO.

Ipsa est.

CHREMES.

Ea est.

PAMPHILVS.

Ex ipsa audiui milies.

SIMO.

Omnes nos gaudere hoc, Chreme,
Te credo credere.

CHREMES.

Ita me di ament, credo.

PAMPHILVS.

Quid restat, pater?

SIMO.

Iamdudum res reduxit me ipsa in gratiam.

PAMPHILVS.

O lepidum patrem! —

De uxore, ita ut possedi, nil mutat Chremes?

CHREMES.

Causa optuma est,

920 Nisi si quid pater ait aliud.

SIMO.

Nempe id scilicet.

CHREMES.

Dos, Pamphile, est

Decem talenta.

PAMPHILVS.

Accipio.

CHREMES.

Propero ad filiam. Elio mecum, Crito:

Nám illam me credo haut nosse.

SIMO.

Cur non illam huc transferri iubes?

PAMPHILVS.

Recte admones; Davo istuc dedam iam negoti.

SIMO.

Non potest.

PAMPHILVS.

Qui?

SIMO.

Quia habet aliud magis ex sese et maius.

PAMPHILVS.

Quidnám?

SIMO.

Vinctus est.

PAMPHILVS.

925 Pater, non recte vinctus.

SIMO.

At ita iussi.

PAMPHILVS.

Iube solvi, obsecro!

SIMO.

Age fiat.

PAMPHILVS.

At mature.

SIMO.

Eo intro.

PAMPHILVS.

O faustum et felicem diem!

CHARINVS. PAMPHILVS.

CHARINVS.

Proviso, quid agat Pamphilus; atque eccum. V. 5.

PAMPHILVS.

Aliquis forsân me putet

Non deputare hoc verum; at mihi nunc sic esse
hoc verum liquet:Deorum vitam propterea ego sempiternam esse
arbitror,930 Voluptates eorum propriæ quod sunt: nam mi
immortalitasEst parta, si nulla ægritudo huic gaudio inter-
cesserit.Set quem ego mihi potissimum optem, cui nunc
hæc narrem, dari?

CHARINVS.

Quid illud gaudi est?

PAMPHILVS.

Davom video. Nemo est, quem malim, omnium:
Nam hunc scio mea solide solum gavisurum gau-
dia.

DAVVS. PAMPHILVS. CHARINVS.

DAVVS.

955 Pamphilus ubinam est?

V. 6.

PAMPHILVS.

Hic est, Dave.

DAVVS.

Quis homo est?

PAMPHILVS.

Ego sum Pamphilus.

Nescis, quid mi obtigerit?

DAVVS.

Certe non;...

PAMPHILVS.

Non?

DAVVS.

Set quid mihi, scio.

PAMPHILVS.

Et quidem ego.

DAVVS.

More hominum evenit, ut, quod
sim ego nactus mali,Prius rescisceres tu, quam ego, tibi quod evenit
boni.

PAMPHILVS.

Glycerium mea suas parentes reperit!

DAVVS.

O factum bene!

CHARINVS.

Hem!

PAMPHILVS.

940 Pater amicus summus nobis...

DAVVS.

Quis?

PAMPHILVS.

Chremes.

DAVVS.

Narras probe.

PAMPHILVS.

Nec mora ulla est, quin iam uxorem ducam.

CHARINVS.

Num ille somniat

Ea, quae vigilans voluit?

PAMPHILVS.

Tui de puero, Dave....

DAVVS.

Ah desine!

Solutus es, quem diligunt di!

CHARINVS.

Salvos sum, si haec vera sunt.

Conloquar.

PAMPHILVS.

Quis homo est? Charine, in tempore
ipso mi advenis.

CHARINVS.

945 Bene factum!

PAMPHILVS.

Audisti?

CHARINVS.

Omnia. Age, me in tuis secundis respice.
Tuus est nunc Chremes: facturum, quae voles,
scio omnia.

PAMPHILVS.

Memini; atque adeo longum est, nos illum ex-
pectare, dum exeat:

Sequere hac me, intus apud Glycerium nunc est.

Tu, Dave, abi domum:

Propere arcesse, hinc qui auferant eam! Quid
stas? quid cessas?

DAVVS.

Eo. —

950 Ne expectetis, dum exeant hinc: intus despondebitur,
Intus transigetur, si quid est quod restet.

CANTOR.

Plaudite.



E V N V C H V S.



C. SVLPITII APOLLINARIS PERIOCHA
IN EVNVCHVM.

Sororem falso dictitatam Thaidis,
Id ipsum ignorans, miles advexit Thraso,
Illique donat. Civis erat haec Attica.
Eidem eunuchum, quem emerat, tradi iubet
Alius amator, Phaedria, ac rus ipse abit,
Thrasoni oratus biduum concederet.
Ephebus frater Phaedriae puellulam
Cum deperiret dono missam Thaidi,
Eunuchi ornatum induitur: suadet Parmeno;
Introivit, vitiat virginem. Sed Atticus
Civis repertus frater eius collocat
Vitiatam ephebo. Phaedriam exorat Thraso.

P. T E R E N T I
E V N V C H V S.

ACTA LVDIS MEGALENSIBVS L. POSTV-
MIO ALBINO, L. CORNELIO MERVLA
AEDILIBVS CVRVLIBVS. EGERE L. AM-
BIVIVS TVRPPIO, L. ATILIVS PRAE-
NESTINVS. MODOS FECIT FLACCVS
CLAVDI TIBIIS DVABVS DEXTRIS.
GRAECA MENANDRV. ACTA IL. M. VA-
LERIO, C. FANNIO, COSS. PRETIVM
MERVIT OCTO M. NVMMVM.

DRAMATIS PERSONAE.

PHAEDRIA.
PARMENO.
THAIS.
GNATHO.
CHAEREA.
THRASO.
PYTHIAS.
CHREMES.
ANTIPHO.
DORIAS.
DORVS.
SANGA.
SOPHRONA.
LACHES.

P R O L O G V S.

- Si quisquam est, qui placere se studeat bonis
Quam plurimis, et minime multos laedere,
In his poëta hic nomen profitetur suum;
Tamen si quis est, qui in se dictum inclementius
5 Existimarit esse, sic existimet:
Responsum, non dictum, esse: quia laesit prior.
Qui bene vertundo et eadem scribundo male, ex
Graecis bonis Latinas fecit non bonas:
Item ut Menandri Phasma nuper perdidit;
10 Atque in Thesauro scripsit, causam dicere
Prius, unde petitur, aurum quare sit suum,
Quam illunc, qui petit, unde is sit thesaurus sibi,
aut
Vnde in monumentum patrum pervenerit.
Dehinc, ne frustretur ipse se, aut sic cogitet:
15 Defunctus iam sum: nihil est quod dicat mihi:
Is ne erret, moneo, et desinat lacessere:
Habeo alia multa, nunc quae condonabitur,
Quae proferentur post, si perget laedere
Ita, ut facere instituit. Quam nunc acturi sumus,
20 Menandri Eunuchum postquam Aediles emerunt
Magistratus, cum ibi adesset, cum octepta est agi,
Perfecit, sibi ut inspicundi esset copia.
Exclamat, furem, non poëtam, fabulam
Dedissee, et nil dedisse verborum tamen:
25 Colacem esse Naeui aut Plauti veterem fabulam:
Parasiti personam inde ablatam et militis.

- Si peccatum est id, peccatum imprudentia est
 Poëtae, non quo furtum facere studuerit.
 Id ita esse, vos iam iudicare poteritis.
- 30 Colax Menandri est; in ea est parasitus Colax,
 Et miles gloriosus; eas se hic non negat
 Personas transtulisse in Eunuchum suam
 Ex Graeca, set eas fabulas factas prius
 Latinas scisse sese, id vero pernegat.
- 35 Quodsi personis iisdem uti aliis non licet,
 Qui in age licet currentem servom scribere,
 Bonas matronas facere, meretrices malas,
 Puerum supponi, falli per servom senem,
 Amare, odisse, suspicari? denique .
- 40 Nullum est iam dictum, quod non dictum sit prius.
 Quare aequom est, vos cognoscere, atque igno-
 scere,
 Quae veteres factitarunt, si faciunt novi.
 Date operam et cum silentio animum attendite,
 Vt pernoscat, quid sibi Eunuchus velit.

PHAEDRIA. PARMENO.

PHAEDRIA.

Quid igitur faciam? non eam? ne nunc quidem, I. i.
 Cum arcessor ultro? an potius ita me comparem,
 Non perpeti meretricum contumelias?
 Exclusit; revocat; redeam? — non, si me obse-
 cret!

PARMENO.

- 5 Siquidem hercle possis, nil prius, nil fortius;
 Verum si incipies neque pertendes naviter,
 Atque, ubi pati non poteris, cum nemo expetet,
 Infecta pace ultro ad eam venies, indicans,
 Te amare et ferre non posse: actum est; ilicet;
 10 Peristi; eludet, ubi te victum senserit.

Proin

Proin tu, dum est tempus, etiam atque etiam hoc
cogita,

Here: quae res in se neque consilium neque mo-
dum

Habet ullum, eam consilio regere non potes.

In amore haec omnia insunt vitia, iniuriae,

15 Suspiciones, inimicitiae, induciae,

Bellum, pax rursum; incerta haec si tu postules

Ratione certa facere, nihilo plus agas,

Quam si des operam, ut cum ratione insanias.

Et quod nunc tute tecum iratus cogitas:

20 Egone illam? quae illum? quae me? quae non?
sine modo!

Mori me malim! sentiet, qui vir siem!

Haec verba, mehercule, una falsa lacrimula,

Quam, oculos terendo, misera vix expresserit,

Restinguet, et te ultro accusabit, et ei dabis

25 Ultro supplicium.

PHAEDRIA.

O indignum facinus! nunc ego et

Illanc scelestam et miserum me esse sentio!

Et taedet, et amore ardeo! prudens, sciens,

Vivos vidensque pereo, nec, quid agam, scio!

PARMENO.

Quid agas, nisi ut te redimas captum quam queas

30 Minumo; si nequeas paululo, at quanti queas;

Et ne te adfflictos....

PHAEDRIA.

Itane suades?

PARMENO.

Si sapis,

Neque, praeterquam quas ipse amor molestias

Habet, addas, illas, quas habet, recte feras?

Set ecca ipsa egreditur nostri fundi calamitas:

35 Nam nos quod capere oportet, haec intercipit.

THAIS. PHAEDRIA. PARMENO.

THAIS.

Miseram me! vereor, ne illud gravius Phaedria I. 2.
Tulerit, neve aliorum atque ego feci acceperit,
Quod heri intromissus non est.

PHAEDRIA.

Totus, Parmeno,
Tremo horreoque, postquam adspexi hanc.

PARMENO.

Bono animo es:
40 Accede ad ignem hunc: iam calesces plus satis.

THAIS.

Quis hic loquitur? Ehem, tun' hic eras, mi Phae-
dria?

Quid hic stabas? cur non recta introibas?

PARMENO.

Ceterum

De exclusione verbum nullum!

THAIS.

Quid taces?

PHAEDRIA.

Sane quia vero hae mihi patent semper fores,
45 Aut quia sum apud te primus!

THAIS.

Missa istaec face.

PHAEDRIA.

Quid missa? — O Thais, Thais, utinam esset
mihi

Pars aequa amoris tecum ac pariter fieret,
Aut tibi hoc uti doleret itidem ut mihi dolet,
Aut ego istuc abs te factum nihili penderem!

THAIS.

50 Ne crucia nimium te, obsecro, mi Phaedria!
Non pol, quo quenquam plus amem aut plus di-
ligam,
Eo feci, set ita erat res: faciundum fuit.

PARMENO.

Credo: ut fit, misera prae amore exclusi hunc
foras!

THAIS.

Siccine ais, Parmeno? Age. Set huc qua gratia
55 Te arcessi iussi, ausculta.

PHAEDRIA.

Fiat.

THAIS.

Dic mihi

Hoc primum: potin' est hic tacere?

PARMENO.

Egone? — optume;

Verum heus tu: lege tibi hac meam adstringo
fidem:

Quae vera audiui, taceo et contineo optume;
Sin falsum aut vanum aut fictum, continuo pa-
lum est:

60 Rimarum plenus sum, hac atque illac perpluo:
Proin tu, si vis taceri, vera dicito.

THAIS.

Samia mihi mater fuit. Ea habitabat Rhodi.

PARMENO.

Potest taceri hoc.

THAIS.

Ibi tum matri parvolam

Puellam dono quidam mercator dedit,

65 Ex Attica hinc abreptam.

PHAEDRIA.

Civemne?

THAIS.

Arbitror;

Certum non scimus: matris nomen et patris

Dicebat ipsa, patriam et signa cetera

Neque scibat neque per aetatem etiam potuerat.

Mercator hoc addebat: e praedonibus,

70 Vnde emerat, se audisse, abreptam e Sunio.

Mater ubi accepit, studio coepit omnia

Docere, educere, ita uti si esset filia;
 Sororem plerique esse credebant meam.
 Ego cum illo, quicum tum uno rem habebam, ho-
 spite,

75 Abii huc, qui mihi reliquit haec, quae habeo,
 omnia.

PARMENO.

Vtrumque hoc falsum est: effluet.

THAIS.

Qui istuc?

PARMENO.

Rogas?

Neque tu uno eras contenta, neque is solus dedit:
 Nam hic quoque bonam magnamque partem ad
 te attulit.

THAIS.

Ita est; set sine me pervenire, quo volo.

80 Interea miles, qui me amare occeperat,
 In Cariam est profectus. Te interea loci
 Cognovi. Tute scis, postilla quam intumum
 Habeam te, et mea consilia ut tibi credam omnia.

PHAEDRIA.

Num hoc quidem tacebit Parmeno?

PARMENO.

Oh, dubiumne id est?

THAIS.

85 Hoc agite, amabo. Mater mea illic mortua est
 Nuper. Ei frater aliquantum ad rem est avidior:
 Is ubi hanc honesta virginem forma videt,
 Et fidibus scire, pretium sperans, illico
 Producit, vendit. Forte fortuna adfuit
 90 Hic meus amicus; emit eam dono mihi,
 Imprudens harum rerum ignarusque omnium.
 Is venit. Postquam sensit, me tecum quoque
 Rem habere, fingit causas, ne det, sedulo;
 Ait, si fidem habeat, se iri praepositum tibi
 95 Apud me, ut non id metuat, ne, ubi acceperim,
 Sese relinquam, velle se mi illanc dare;

Verum id vereri. Set, ego quantum suspicor,
Ad virginem animum adiecit.

PHAEDRIA.

Etiamne amplius?

THAIS.

Nil: nam quaesivi. Nunc ego eam, mi Phaedria,
100 Multae sunt causae quamobrem cupio abducere:
Primum, quod dicta soror est; praeterea, ut suis
Restituam ac reddam: sola sum; habeo hic ne-
minem

Neque amicum neque cognatum; quamobrem,
Phaedria,

Cupio aliquos parere amicos beneficio meo.

105 Id, amabo, adiuta me quo fiat facilius:
Sine illunc priores partes hosce aliquot dies
Apud me habere. — Nil respondes? —

PHAEDRIA.

Pessuma,

Ego quidquam cum istis factis tibi respondeam?

PARMENO.

Eu, noster, laudo! tandem perdoluit! vir es!

PHAEDRIA.

110 At ego nescibam, quorsum tu ires: „parvola
„Hinc est abrepta; eduxit mater pro sua;
„Soror dicta est; cupio abducere, ut reddam suis.”
Nempe omnia haec nunc verba huc redeunt deni-
que:

Excludor ego, ille recipitur. Qua gratia,
115 Nisi si illum plus amas, et nunc istam times,
Quae advecta est, ne illum, talem, praeripiat tibi?

THAIS.

Ego idne?

PHAEDRIA.

Quid te ergo aliud sollicitat? cedo.

Num solus ille dona dat? num tibi meam
Benignitatem sensisti intercludier?

120 Nonne, ubi mihi dixti, cupere te ex Aethiopia
Ancillulam, relictis rebus omnibus

- Quaesivi? Porro eunuchum dixi velle te,
 Solae quia his reginae utuntur: repperi;
 Heri minas viginti pro ambobus dedi;
 125 Contentus abs te, tamen haec habui in memoria.
 Ob haec facta abs te spernor!

THAIS.

Quid istic, Phaedria?

Quanquam illam cupio abducere atque hac re arbitror

Id fieri posse maxime, verumtamen,
 Potius quam te habeam inimicum, faciam, ut iusseris.

PHAEDRIA.

- 130 Utinam istuc verbum ex animo ac vere diceret:
 „Potius quam te habeam inimicum!” si istuc crederem

Sincere dici, quidvis possem perpeti.

PARMENO.

Labascit, victus uno verbo, quam cito!

THAIS.

- Ego non ex animo misera dico? — quam ioco
 135 Rem voluisti a me tandem, quin perfeceris?
 Ego impetrare nequeo hoc abs te, biduum
 Saltem ut concedas solum.

PHAEDRIA.

Siquidem biduum;

Verum ne fiant isti viginti dies!

THAIS.

Profecto non plus biduum aut....

PHAEDRIA.

Aut? nil moror.

THAIS.

- 140 Non fiet; sine modo hoc te exorem!

PHAEDRIA.

Scilicet

Faciendum est, quod vis.

THAIS.

Merito te amo.

PHAEDRIA.

Bene facis.

Rus ibo; illi hoc me macerabo biduum!
 Ita facere certum est! mos gerundus Thaidi!
 Tu deducantur huc fac illi!

PARMENO.

Maxume.

PHAEDRIA.

145 In hoc biduum, Thais, vale!

THAIS.

At, mi Phaedia,

Et tu! numquid vis aliud?

PHAEDRIA.

Egone quid velim?

Cum milite isto praesens absens ut sies,
 Dies noctesque me ames, me desideres,
 Me somnies, me exspectes, de me cogites,
 150 Me speres, me te oblectes, mecum tota sis,
 Mea fac sis postremo omnis, quando ego sum
 iuus!

THAIS.

Me miseram! forsan parvam mi habeat hic fidem,
 Atque aliarum ex ingeniis nunc me iudicet.
 Ego pol, quae mihi sum conscia, hoc certo scio,
 155 Neque me finxisse falsi quidquam, neque meo
 Cordi esse quenquam cariorum hoc Phaedia;
 Et quidquid huius feci, causa virginis
 Feci: nam me eius fratrem spero propemodum
 Iam repperisse, adolescentem adeo nobilem, et
 160 Is se hodie venturum ad me constituit domum.
 Concedam hinc intro atque expectabo, dum venit.

PHAEDRIA. PARMENO.

PHAEDRIA.

Fac, ita ut iussi, deducantur isti.

PARMENO.

Faciam.

PHAEDRIA.

At diligenter. II. 1.

PARMENO.

Fiet.

PHAEDRIA.

At mature.

PARMENO.

Fiet.

PHAEDRIA.

Satin' hoc mandatum?

PARMENO.

Ah, rogitare!

Vtinam tam aliquid invenire facile possis, quam
hoc peribit!

PHAEDRIA.

165 Ego quoque una pereo, quod mi est carius, ne
istuc tam iniquo

Patiare animo.

PARMENO.

Minime. Quin effectum dabo. Sed
numquid me aliud?

PHAEDRIA.

Munus nostrum ornato verbis, quam pote, et istum
pellito ab ea!

PARMENO.

Memini, tametsi nullus moneas.

PHAEDRIA.

Ego rus ibo atque ibi manebo.

PARMENO.

Censeo.

PHAEDRIA.

Set heus in!

PARMENO.

Quid vis?

PHAEDRIA.

Censen', posse me obfirmare et

170 Perpeti, ne redeam interea?

PARMENO.

Tene? non hercle arbitror:

Nam aut iam revortere, aut mox noctu te adiget
horsum insomnia.

PHAEDRIA.

Opus faciam, ut defetiger usque, ingratiis ut dormiam.

PARMENO.

Vigilabis lassus; hoc plus facies.

PHAEDRIA.

Ah, nil dicis, Parmeno:

Eiiciunda hercle haec est mollities animi! nimis
me indulgeo.

175 Tandem ne ego illa caream, si sit opus, vel totum triduum?

PARMENO.

Hui,

Vnivorsum triduum? vide, quid agas.

PHAEDRIA.

Stat sententia.

PARMENO.

Di boni, quid hoc morbi est? adeon' homines
immutarier

Ex amore, ut non cognoscas eundem esse? hoc
nemo fuit

Minus ineptus, magis severus, quisquam, nec magis
continens.

180 Set quis hic est, qui huc pergit? — Attat! hic
quidem est parasitus Gnatho

Militis; ducit secum una virginem dono huic. —

Papae,

Facie honesta! mirum, ni ego me turpiter hodie
hic dabo

Cum meo decrepito eunucho: haec superat ipsam
Thaidem.

GNATHO. PARMENO.

GNATHO.

- Di immortales, homini homo quid praestat stulto
intelligens! II. 2.
- 185 Conveni hodie, adveniens, quendam mei loci hinc
atque ordinis,
Hominem haud impurum, itidem patria qui abli-
gurrierat bona.
Video sentum, squalidum, aegrum, pannis annis
obsitum.
Quid istuc, inquam, ornati est? — „Quoniam
„miser, quod habui, perdidi, en
„Quo redactus sum: omnes noti me atque amici
„deserunt!”
- 190 Hic ego illunc contemsi prae me: quid, homo,
inquam, ignavissime?
Itan' parasti te, spes nulla ut reliquā in te sit
tibi?
Simul consilium cum re amisti? viden' me, ex eo-
dem ortum loco,
Qui color nitor vestitus, quae habitudo est cor-
poris?
Omnia habeo, neque quidquam habeo; nil cum
est, nil deficit tamen. —
- 195 „At ego infelix neque ridiculus esse neque pla-
„gas pati
„Possum!” — Quid? tu his rebus credis fieri?
tota erras via!
Olim isti fuit generi quondam quaestus apud se-
clum prius;
Hoc novum est aucupium; ego adeo hanc primus
inveni viam.
Est genus hominum, primos qui esse se omnium
rerum volunt,
- 200 Nec sunt; hos consector; hisce ego non paro me,
ut rideant,

Set eis nltro adrideo et eorum ingenia admiror
 simul;
 Negat quis? nego; ait? aio; postremo imperavi
 egomet mihi
 Omnia adsentari. Is quaestus nunc est multo uber-
 rumus.

PARMENO.

Scitum hercle hominem! hic homines prorsum ex
 stultis insanos facit.

GNATHO.

205 Dum haec loquimur, interea loci ad macellum ubi
 advenimus,
 Concurrunt laeti mi obviam cupedinarii omnes,
 Cetarii, lanii, coqui, fartores, piscatores,
 Quibus et re salva et perdita profueram et pro-
 sum saepe;
 Salutant, ad coenam vocant, adventum gratulan-
 tur.

210 Ille ubi miser famelicus videt me tanto ho-
 nore et
 Tam facile victum quaerere, ibi homo coepit me
 obsecrare,
 Vt sibi liceret discere id de me: sectari iussi,
 Si potis est, tanquam philosophorum habent disci-
 puli ex ipsis
 Vocabula, parasiti item ut Gnathonici vocentur.

PARMENO.

215 Vide otium, et, quid cibus facit alienus!

GNATHO.

Set ego cesso
 Ad Thaidem hanc deducere et rogare, ad coe-
 nam ut veniat.

Set Parmenonem ante ostium meretricis video
 tristem,

Rivalis servom. Salva res! Nimirum hice homines
 frigent.

Nebulonem hunc certum est ludere.

PARMENO.

Hic hoc munere arbitrantur

220 Suam Thaidem esse.

GNATHO.

Plurima salute Parmenonem,
Suum suum, impertit Gnatho. Quid agitur?

PARMENO.

Statur?

GNATHO.

Video.

Numquidnam, quod nolis, vides?

PARMENO.

Te.

GNATHO.

Credo; at numquid aliud?

PARMENO.

Quidum?

GNATHO.

Quia tristis.

PARMENO.

Nil quidem.

GNATHO.

Ne sis. Set quid videtur

Tibi hoc mancipium?

PARMENO.

Non malum hercle.

GNATHO.

Vro hominem.

PARMENO.

Vt falsus animi es...!

GNATHO.

225 Quam hoc gratum munus Thaidi arbitrare esse?

PARMENO.

Hoc nunc dicis,

Eiectos hinc nos. Omnium rerum heus vicissitudo
est.

GNATHO.

Sex ego te totos, Parmeno, hos menses quietum
reddam,

Ne sursum deorsum cursites, neve usque ad lucem
vigiles:

Ecquid beo te?

PARMENO.

Men' ? papae!

GNATHO.

Sic soleo amicos.

PARMENO.

Laudo.

GNATHO.

230 Detineo te fortasse? tun' profectus alio fueras?

PARMENO.

Nusquam.

GNATHO.

Tum tu igitur paululum da mi operae:
fac ut admittar.

PARMENO.

Age modo! nunc tibi haec patent fores, quia il-
lam ducis. —

GNATHO.

Num quem evocari hinc vis foras?

PARMENO.

Sine biduum hoc praetereat:
Qui mihi nunc uno digitulo forem aperis fortu-
natus,

235 Nae tu istam faxo calcibus saepe insultabis fru-
stra. —

GNATHO.

Eho, etiam tu hic stas, Parmeno? numnam hic re-
lictus custos,

Ne quis forte internuntius clam a milite ad istam
curset?

PARMENO.

Facete dictum! Mira vero, militi quae placeant!
Set herilem video filium minorem huc advenire.

240 Miror, quid Piraeo abierit: nam ibi custos publice
est nunc.

Non temere est. Et properans venit. Nescio quid
circumspectat.

CHAEREA. PARMENO.

CHAEREA.

Occidi!

Neque virgo est usquam neque ego, qui illam e
conspectu amisi meo! II. 3.

Vbi quaeram? ubi investigem? quem perconter?
qua insistam via?

245 Incertus sum. Una haec spes est, ubiubi est, diu
celari non potest.

O faciem pulcram! deleo omnes dehinc ex animo
mulieres:

Taedet quotidianarum harum formarum.

PARMENO.

Ecce autem alterum!

Nescio quid de amore loquitur. O infortunatum
senem!

Hic vero est, qui si occeperit, ludum iocumque
dicas,

250 Praeut huius rabies quae dabit, illum alterum
fuisse.

CHAEREA.

Vt illunc di deae omnes senium perdant, qui ho-
die me remoratus est,

Meque adeo, qui restiterim, tum autem, qui illum
flocci fecerim!

Set eccum Parmenonem. Salve.

PARMENO.

Quid tu es tristis? quidve es alacris?

Vnde is?

CHAEREA.

Egone? nescio hercle, neque, unde eam,
neque, quorsum eam.

255 Ita oblitus prorsus mei sum.

PARMENO.

Qui, quaeso?

CHAEREA.

Amo.

PARMENO.

Hem!

CHAEREA.

Parmeno, nunc te ostendes, qui vir sis!
Scis, te mihi saepe pollicitum esse: Chaerea, ali-
quid inveni,
Quod ames, modo: utilitatem in ea re faciam ut
cognoscas meam:
Cum in cellulam ad te patris penum omnem con-
gerebam clanculum.

PARMENO.

260 Age, inepte.

CHAEREA.

Hoc hercle nunc, sis, nunc, fac pro-
missa ipsa appareant,....

PARMENO.

Sine.

CHAEREA.

Si adeo res est digna, tu nervos ubi inten-
das tuos.

Haud similis virgo est virginum nostrarum, quas
matres student

Demissis humeris esse, victo pectore, ut gracilae
sient;

Si quae habitior paulo, aiunt esse pugilem, dedu-
cunt cibum;

265 Tamenetsi bona natura est, reddunt curatura iun-
ceam;

Itaque ergo amantur!

PARMENO.

Quid tua istaec?

CHAEREA.

Nova figura oris,....

PARMENO.

Papae!

CHAEREA.

Color verus, corpus solidum et succi plenum.

PARMENO.

Anni?

CHAEREA.

Anni? sedecim.

PARMENO.

Flos ipsus.

CHAEREA.

Hanc vel vi mihi, vel clam tu, vel precario
Fac tradas; mea nil refert, dum potiar modo.

PARMENO.

270 Quid? virgo cuius est?

CHAEREA.

Nescio hercle.

PARMENO.

Vnde est?

CHAEREA.

Tantundem.

PARMENO.

Vbi habitat?

CHAEREA.

Ne id quidem.

PARMENO.

Vbi vidisti?

CHAEREA.

In via.

PARMENO.

Qua ratione amisisti?

CHAEREA.

Id equidem adveniens, mecum stomachabar modo,
Nec

Nec quenquam ego hominem esse arbitror, cui
mage bonae

Felicitates omnes adversae sient.

PARMENO.

275 Quid hoc est sceleris?

CHAEREA.

Perii!

PARMENO.

Quid factum est?

CHAEREA.

Rogas?

Patris cognatum atque aequalem Archidemidem
Nostine?

PARMENO.

Quidni?

CHAEREA.

Is, dum hanc sequor, fit mi obviam.

PARMENO.

Incommode hercle.

CHAEREA.

Imo enimvero infelicititer:

Nam incommoda alia sunt dicenda, Parmeno.

280 Illum liquet mihi deierare his mensibus

Sex, septem, prorsus non vidisse proxumis,

Nisi nunc, cum minime vellem, minime opus fuit.

Eho, monstrine hoc est simile? quid ais?

PARMENO.

Maxime.

CHAEREA.

Continuo adcurrit ad me quam longe quidem,

285 Incurvos, tremulus, labiis demissis, gemens:

Heus, heus, tibi dico, Chaerea! inquit; restiti; —

Scin', quid ego te volebam? — Dic. — Cras est
mihi

Iudicium. — Quid tum? — Vt diligenter nunties
Patri, advocatus mane mi esse ut meminerit.

290 Dum haec loquitur, abiit hora; rogo, numquid
velit;

G

Recte, inquit; abeo; cum huc respicio ad virginem,
 Illaec se interea commodum huc advorterat
 Hanc nostram in plateam.

PARMENO.

Mirum, ni hanc dicit, modo
 Data huic quae dono est.

CHAEREA.

Huc cum advenio, nulla erat.

PARMENO.

295 Comites secuti scilicet sunt virginem?

CHAEREA.

Verum, parasitus cum ancilla.

PARMENO.

Ipsa est; ilicet;

Desine: iam conclamatum est!

CHAEREA.

Alias res agis.

PARMENO.

Istuc ago equidem.

CHAEREA.

Nostin' (quaeso, dic mihi) aut

Vidistin'?

PARMENO.

Vidi; novi; scio, quo abducta sit.

CHAEREA.

300 Eho, Parmeno mi, nostin'?

PARMENO..

Novi.

CHAEREA.

Et, ubi siet?

PARMENO.

Huc deducta est ad meretricem Thaidem; ei dono
 data est.

CHAEREA.

Quis is est tam potens cum tanto munere hoc?

PARMENO.

Miles Thraso,

Phaedriae rivalis.

CHAEREA.

Duras fratris partes praedicas.

PARMENO.

Ino enim si scias, quod donum huic dono contra comparet,

305 Magis id dicas.

CHAEREA.

Quòdnam, quaeso, hercle?

PARMENO.

Eunuchum.

CHAEREA.

Illumne, obsecro,
Inhonestum hominem, quem mercatus est here,
senium mulierem?

PARMENO.

Istunc ipsum.

CHAEREA.

Homo quatietur certe cum dono foras.
Set istanc Thaidem non scivi nobis vicinam.

PARMENO.

Haud diu est.

CHAEREA.

Perii, nunquamne etiam me illam vidisse? eho-
dum dic mihi:

510 Estne, ut fertur, forma?

PARMENO.

Sane.

CHAEREA.

At nihil ad nostram hanc?

PARMENO.

Alia res.

CHAEREA.

Obsecro hercle, Parmeno, fac, ut potiar.

PARMENO.

Faciam sedulo,
Dabo operam, adiutabo. Numquid me aliud?

CHAEREA.

Quo nunc is?

PARMENO.

Domum,
Vt mancipia haec, ita uti iussit frater, ducam ad
Thaidem.

CHAEREA.

O fortunatum istum eunuchum, qui quidem in
hanc detur domum!

PARMENO.

315 Quid ita?

CHAEREA.

Quid? rogitas? summa forma semper con-
servam domi
Videbit; conloquetur; aderit una in unis aedibus;
Cibum nonnunquam capiet cum ea; interdum pro-
pter dormiet.

PARMENO.

Quid si nunc tute is fortunatus fias,...

CHAEREA.

Qua re, Parmeno?

Responde.

PARMENO.

Capias tu illius vestem?

CHAEREA.

Vestem? quid tui postea?

PARMENO.

320 Pro illo te deducam;...

CHAEREA.

Audio.

PARMENO.

Te esse illum dicam;...

CHAEREA.

Intelligo.

PARMENO.

Tu illis fruare commodis, quibus illum dicebas modo:
Cibum una capias, adsis, tangas, ludas, propter
dormias:

Quandoquidem illarum neque te quisquam novit
neque scit, qui sis;

Praeterea forma et aetas ipsa est, facile ut pro
eunucho probes.

CHAEREA.

325 Dixti pulchre! nunquam vidi melius consilium dari!
Age, eamus intro nunc iam! orna me! abduc! duc,
quantum potest!

PARMENO.

Quid agis? iocabar equidem.

CHAEREA.

Garris.

PARMENO.

Perii, quid ego egi miser?
Quo tridis? Iam perculeris tu me! tibi equidem
dico: mane!

CHAEREA.

Eamus.

PARMENO.

Pergin'?

CHAEREA.

Certum est.

PARMENO.

Vide, ne nimium calidum hoc sit, modo!

CHAEREA.

530 Non est profecto: sine!

PARMENO.

At enim istaec in me cudetur faba!

CHAEREA.

Ah!

PARMENO.

Flagitium facis!

CHAEREA.

An id est flagitium, si in domum meretriciam
Deducar et illis crucibus, quae nos nostramque
adolescentiam
Despectam habent, et quae nos semper omnibus
cruciant modis,
Nunc referam gratias, atque itidem eas fallam ut
ab eis fallimur?

335 An potius aequom est, patri haec fieri, ut a me
ludatur dolis?

Quod qui rescierint, culp' ent, illud merito factum
omnes putent.

PARMENO.

Quid istic? si certum est facere, facias; verum
ne post conferas

Culpam in me!

CHAEREA.

Non. Fac iam....!

PARMENO.

Iubesne?

CHAEREA.

Iubeo cogo atque impero!

Nunquam defugiam auctoritatem.

PARMENO.

Sequere. Di vortant bene!

THRASO. GNATHO. PARMENO.

THRASO.

340 Magnas vero agere gratias Thais mihi? III. 1.

GNATHO.

Ingentes.

THRASO.

Ain' tu? laeta est?

GNATHO.

Non tam ipso quidem

Dono, quam, abs te datum esse; id vero serio
Triumphat.

PARMENO.

Huc proviso, ut, ubi tempus siet,

Deducam. Set eccum militem!

THRASO.

Est istuc datum

345 Profecto, ut grata mihi sint, quae facio, omnia.

GNATHO.

Advorti hercle animum.

THRASO.

Rex vel semper maxumas

Mihi agebat, quidquid feceram; aliis non item.

GNATHO.

Labore magnam alieno partam gloriam

Verbis saepe in se transmovet, qui sal habet;

350 Quod in te est.

THRASO.

Habes.

GNATHO.

Rex te ergo in oculis...

THRASO.

Scilicet.

GNATHO.

Gestare?

THRASO.

Verum; credere omnem exercitum,

Consilia.

GNATHO.

Mirum!

THRASO.

Tum, sicubi eum satietas

Hominum aut negoti si odium quando ceperat,

Requiescere ubi volebat, quasi.... nostin'?

GNATHO.

Scio:

355 Quasi ubi illam expueret miseriam ex animo.

THRASO.

Tenes.

Tum me convivam solum abducebat sibi.

GNATHO.

Hui,

Regem elegantem narras!

THRASO.

Imo, sic homo est:

Perpaucorum hominum est.

GNATHO.

Imo nullorum arbitror,

Si tecum vivit.

THRASO.

Invidere omnes mihi,

- 360 Mordere clanculum; ego non flocci pendere;
 Illi invidere misere. Verum unus tamen
 Impense, elephantis quem Indicis praefecerat.
 Is ubi molestus magis est: quaeso, inquam, Strato,
 Eone es ferox, quia imperium habes in beluas?

GNATHO.

- 365 Pulchre mehercle dictum et sapienter! papae,
 Ingularas hominem! quid ille?

THRASO.

Mutus illico.

GNATHO.

Quidni esset?

PARMENO.

Di vostram fidem, hominem perditum
 Miserumque, et illum sacrilegum!

THRASO.

Quid? illud, Gnatho,

- Quo Rhodium pacto tetigerim in convivio,
 370 Nunquam tibi dixi?

GNATHO.

Nunquam. Set narra, obsecro! —
 Plus milies audivi.

THRASO.

Una in convivio

Erat hic, quem dico, Rhodius adolescentulus.
 Forte habui scortum; coepit ad id adludere
 Et me inridere: quid agis, inquam, homo impu-
 dens?

- 375 Lepus tute pulpamentum quaeris?

GNATHO.

Ha, ha, he!

THRASO.

Quid est?

GNATHO.

Facete! lepide! laute! nil supra!
 Tuum, obsecro, ne hoc? vetus hoc dictum credidi.

THRASO.

Audieras?

GNATHO.

Saepe, et fertur in primis.

THRASO.

Meum est.

GNATHO.

Dolet, dictum imprudenti adolescenti et libero?

PARMENO.

380 At te di perdant!

GNATHO.

Quid ille quaeso?

THRASO.

Perditus;

Risu omnes, qui aderant, emoriri. Denique
 Metuebant omnes me iam.

GNATHO.

Non iniuria.

THRASO.

Set heus tu, purgon' ego me de istac Thaidi,
 Quod eam me amare suspicata est?

GNATHO.

Nil minus;

385 Imo auge magis suspicionem.

THRASO.

Cur?

GNATHO.

Rogas?

Scin', si quando illa mentionem Phaedriae
 Facit aut si laudat, te ut male urat?

THRASO.

Sentio.

GNATHO.

Id ut ne fiat, haec res sola est remedio:
 Vbi nominabit Phaedriam, tu Pamphilam

390 Continuo; si quando illa dicet: „Phaedriam
Intromittamus: comis est;” tu: „Pamphilam
Cantatum provocemus!” si laudabit haec
Illius formam, tu huius contra; denique
Tu par pari referto, quod eam mordeat.

THRASO.

395 Siquidem me amaret, tum istuc prodesset, Gna-
tho.

GNATHO.

Quam dudum, quod tu des, expectat atque amat,
Tam dudum te amat, tam dudum illi facile fit,
Quod doleat: metuet semper, quem ipsa nunc
capit,

Fructum ne quando tu alio iratus conferas.

THRASO.

400 Bene dixti; ac mi istuc non in mentem venerat.

GNATHO.

Ridiculum: non enim cogitaras; ceterum
Id tute melius quanto invenisses, Thraso!

THAIS. THRASO. PARMENO.
GNATHO. PYTHIAS.

THAIS.

Audire visa vocem modo sum militis; III. 2.
Atque eccum. Salve, mi Thraso!

THRASO.

O Thais mea,

405 Meum suavius, quid agitur? ecquid nos amas
De fidicina istac?

PARMENO.

Quam venuste! quod dedit
Principium, adveniens!

THAIS.

Plurimum merito tuo.

THRASO.

Eamus ergo ad coenam. Quid stas?

PARMENO.

Hem alterum!

Ex homine hunc natum dicas?

THAIS.

Vbi vis, non moror.

PARMENO.

410 Adibo atque adsimulabo, quasi nunc exeam.

Ituran', Thais, quopiam es?

THAIS.

Ehem, Parmeno,

Bene fecisti. Hodie itura....

PARMENO.

Quo?

THAIS.

Quo? hunc non vides?

PARMENO.

Video et me taedet. — Vbi vis, dona adsunt tibi
A Phaedria.

THRASO.

Quid stamus? cur non imus hinc?

PARMENO.

415 Quaeso hercle, ut liceat, pace quod fiat tua,
Dare huic, quae volumus, convenire et conloqui.

THRASO.

Perpulchra credo dona, haut nostris similia!

PARMENO.

Res indicabit. Heus, iubete istos foras

Exire, quos iussi, ocius! — Procede tu huc!

420 Ex Aethiopia est usque haec.

THRASO.

Hic sunt tres minae.

GNATHO.

Vix.

PARMENO.

Vbi tu es, Dore? accede huc. Hem Eunuchum tibi.

Quam liberali facie, quam aetate integra!

THAIS.

Ita me di ament, honestus est!

PARMENO.

Quid tu ais, Gnatho?

Numquid habes, quod contemnas? quid tu autem,

Thraso?

425 Tacent; satis laudant. Fac periculum in literis,
Fac in palaestra, in musicis, quae liberum
Scire aequom est adolescentem, solertem dabo.

THRASO.

Ego illum eunuchum, si opus siet, vel sobrius...

PARMENO.

Neque, haec qui misit, postulat, soli sibi
430 Te vivere et sua causa excludi ceteros,
Neque pugnās narrat, neque cicatrices suas
Ostentat, neque tibi obstat, quod quidam facit:
Verum, ubi molestum non erit, ubi tu voles,
Vbi tempus tibi erit, sat habet, si tum recipitur.

THRASO.

435 Adparet, servom hunc esse domini pauperis
Miserique.

GNATHO.

Nam hercle nemo posset, sat scio,
Qui haberet, qui pararet alium, hunc perpeti.

PARMENO.

Tace tu, quem ego infra esse infimos omnes puto
Homines: nam, qui huic adsentari animum indu-
xeris,

440 E flamma petere te cibum posse arbitror.

THRASO.

Iamne imus?

THAIS.

Hos prius introducā, et, quae volo,
Simul imperabo; post huc continuo exeo.

THRASO.

Hinc abeo. Tu istanc opperire.

PARMENO

Haut convenit,

Vna ire cum amica inperatorem in via.

THRASO.

445 Quid tibi ego multa dicam? domini simia es.

GNATHO.

Ha ha he!

THRASO.

Quid rides?

GNATHO.

Istuc, quod dixti modo, et

De Rhodio dictum mi illud in mentem venit.

Set Thais exit.

THRASO.

Abi, praeccurre, ut sint domi

Parata.

GNATHO.

Fiat.

THAIS.

Diligenter, Pythias,

450 Fac cures, si Chremes huc forte advenerit,

Vt ores, primum, ut redeat; si id non commo-
dum est,

Vt maneat; si id non poterit, ad me adducito.

PYTHIAS.

Ita faciam.

THAIS.

Quid.... quid aliud volui dicere? —

Ehem, curate istam diligenter virginem!

455 Domi adsitis facite!

THRASO.

Eamus.

THAIS.

Vos me sequimini.



CHREMES. PYTHIAS.

CHREMES.

Profecto, quanto magis magisque cogito, III. 3.
Nimirum dabit haec Thais mihi magnum malum,
Ita me astute ab ea video labefactarier.

- Iam tum, cum primum iusserat me ad se domum,
460 Roget quis: quid tibi cum illa? ne noram quidem.
Vbi veni, causam, ut ibi manerem, repperit:
Ait, rem divinam fecisse, et rem seriam
Velle agere mecum. Iam tum erat suspicio,
Dolo malo haec fieri omnia. Ipsa accumbere
465 Mecum, mihi sese dare, sermonem quaerere;
Vbi friget, huc evasit: quam pridem pater
Mi et mater mortui essent? — dico: iam diu. —
Rus Sunio ecquod habeam? et, quam longe a mari?
(Credo, ei placere hoc; sperat, se a me avellere;)
470 Postremo: ecqua inde parva periisset soror?
Ecquis cum ea una? ecquid habuisset, cum perit?
Ecquis eam posset noscere? — Haec cur quaeritet,
Nisi si illa forte, quae olim periit parvula,
Eam sese intendit esse, ut est audacia?
475 Verum ea, si vivit, annos nata est sedecim,
Non maior; Thais quam ego sum maiuscula est.
Misit porro orare, ut venirem, serio.
Aut dicat quid volt, aut molesta ne siet.
Non hercle veniam tertio. Heus, heus!

PYTHIAS.

Ecquis hic?

CHREMES.

- 480 Ego sum Chremes.

PYTHIAS.

O capitulum lepidissimum!

CHREMES.

Dico ego, mihi fieri insidias?

PYTHIAS.

Thais maximo

Te orabat opere, ut cras redires.

CHREMES.

Rus eo.

PYTHIAS.

Fac, amabo!

CHREMES.

Non possum, inquam.

PYTHIAS.

At tu apud nos hic mane,

Dum redeat ipsa.

CHREMES.

Nil minus.

PYTHIAS.

Cur, mi Chreme?

CHREMES.

485 Malam rem hinc ibis?

PYTHIAS.

Si istuc ita certum est tibi,

Amabo ut illuc transeas, ubi illa est.

CHREMES.

Eo.

PYTHIAS.

Abi, Dorias; cito hunc deduc ad militem!

ANTIPH O.

Heri aliquot adolescentuli coimus in Piraeo, III. 4.

In hunc diem ut de symbolis essemus; Chaeream

ei re

490 Praefecimus; dati annuli; locus, tempus constitu-
tum est.

Praeteriit tempus; quo in loco dictum est, parati
nil est;

Homo ipse nusquam; neque scio, quid dicam aut
quid coniectem.

Nunc mi hoc negoti ceteri dedere, ut illum quae-
ram;

Idque adeo visam, si domi est. Set quisnam a
 Thaide exit?
 495 Is est, annon est? ipse est! quid hoc hominis?
 Quid hoc ornati est?
 Quid illud mali est? nequeo satis mirari neque
 conicere,
 Nisi, quidquid est, procul hinc lubet prius, quid
 sit, sciscitari.

CHAEREA. ANTIPHO.

CHAEREA.

Num quis hic? — Nemo. — Num me quis hinc? —
 Nemo homo est. — III. 5.
 Iam rumpere hocne mihi licet? — Prohi Jupiter,
 500 Nunc est profecto, interfici cum perpeti me pos-
 sum,
 Ne hoc gaudium contaminet vita aegritudine ali-
 qua!
 Set neminemne curiosum intervenire nunc mihi
 Qui me sequatur quoquo eam, rogitando obtun-
 dat, enicet,
 Quid gestiam aut quid laetus sim, quo pergam,
 unde emergam, ubi siem
 505 Vestitum hunc nactus, quid mihi quaeram, sanus
 sim ane insaniam?

ANTIPHO.

Adibo atque ab eo gratiam hanc, quam video
 velle, inibo.
 Chaerea, quid est, quod gestis? quid sibi hic ve-
 stitus quaerit?
 Quid laetus es? quid vis tibi? satin' sanus? quid
 me adspectas?
 Taces quid?

CHAEREA.

O festus dies hominis, amice, salve!

510 Nemo omnium est, quem ego nunc magis videre
quam te cupiam.

ANTIPHO.

Narra istuc, quaeso, quid sit.

CHAEREA.

Imo ego te obsecro hercle, ut audias.
Nostine hanc, quam amat frater?

ANTIPHO.

Novi; nempe, opinor, Thaidem.

CHAEREA.

Istam ipsam.

ANTIPHO.

Sic commemineram.

CHAEREA.

Hodie quaedam est ei dono data
Virgo. Quid ego tibi eius nunc faciem praedi-
cem aut laudem, Antipho,

515 Cum ipse me noris, quam elegans formarum spe-
ctator siem?

In hac commotus sum.

ANTIPHO.

Ain' tu?

CHAEREA.

Primam dices, scio, si videris.
Quid multa verba? amare coepi. Forte fortuna
domi

Erat quidem eunuchus, quem mercatus frater fue-
rat Thaidi,

Neque is deductus tum etiam ad eam; me summo-
nuit Parmeno

520 Ibi servos, quod ego arripui.

ANTIPHO.

Quid id est?

CHAEREA.

Tacitus citius audies:
Vt vestem cum illo mutem, ut pro illo iubeam
me illoc ducier.

H

ANTIPHO.

Pro eunuchon'?

CHAEREA.

Sic est.

ANTIPHO.

Quid ut ex ea re tandem caperes commodi?

CHAEREA.

Rogas? viderem, audirem, essem una, quicum cupiebam, Antipho.

Num parva causa aut prava ratio est? — Traditus sum mulieri.

525 Illa illico, ubi me accepit, vero, lacta ad se abducit domum;

Commendat virginem....

ANTIPHO.

Cui? tibine?

CHAEREA.

Mihi.

ANTIPHO.

Satis tuto tamen!

CHAEREA.

Edicit, ne vir quisquam ad eam adeat, et mihi, ne abscedam, imperat,

In interiore parte ut maneam solus cum sola.
Adnuo,

Terram intuens modeste.

ANTIPHO.

Miser!

CHAEREA.

Ego, inquit, ad coenam hinc eo.

530 Abducit secum ancillas; paucae, quae circum illam essent, manent,

Novitiae puellae. Continuo haec adornant, ut lavet;

Adhortor, properent. Dum adparatur, virgo in conclavi sedet,

Suspectans tabulam quandam pictam, ubi inerat pictura haec: Iovem

Quo Danaës pacto in gremium quondam immisce
imbrem aiunt aureum.

535 Egom et quoque id spectare coepi, et quia consi-
mitem luserat

Iam olim ille ludum, impendio magis animus gau-
debat mihi.

Deum se in hominem convertisse et per alienas
tegulas

Venisse clanculum, per pluviam fucum factum
mulieri?

At quem deum? qui templa coeli summa sonitu
concutit!

540 Ego homuncio hoc non faxim? ego illud vero
item feci, ac lubens.

Dum haec mecum reputo, arcessitur lavatum in-
terea virgo;

Iit; lavit; rediit; deinde in lectum eam illae con-
locarunt;

Sto expectans, si quid mi imperent; venit una:
heûs tu, inquit, Dore,

Cape hoc flabellum et ventulum huic sic facito,
dum lavamur;

545 Vbi nos laverimus, si voles, lavato! Accipio tristis.
ANTIPHO.

Tum equidem istuc os tuum impudens videre ni-
mium vellem,

Qui status erat, flabellulum tenere te, asinum
tantum.

CHAEREA.

Vix elocuta est hoc, foras simul omnes proruunt se,
Abeunt lavatum, perstrepunt, ita ut sit, domini
ubi absunt.

550 Interea somnus virginem opprimit; ego limis
specto

Sic per flabellum clanculum; simul alia circum-
specto,

Satin' explorata sint; video esse; pessulum ostio
obdo.

ANTIPHO.

Quid tum? quid tum?

CHAEREA.

Quid, fatue?

ANTIPHO.

Fateor.

CHAEREA.

An ego occasionem

Mi ostentam tantam, tam brevem, tam optatam,
tam insperatam,555 Amitterem? tum pol ego is essem vere, qui adsi-
mulabar.

ANTIPHO.

Sane hercle, ut dicis. — Set interim de symbolis
quid actum est?

CHAEREA.

Paratum est.

ANTIPHO.

Frugi es. Vbi? domin'?

CHAEREA.

Imo apud libertum Discum.

ANTIPHO.

Perlonge est. Sed tanto ocius properemus. Muta
vestem.

CHAEREA.

Vbi mutem? perii! nam exulo domo nunc: metuo
fratrem,560 Ne intus sit; porro autem, pater ne rure redierit
iam.

ANTIPHO.

Eamus ad me: ibi proximum est, ubi mutes.

CHAEREA.

Recte dicis:

Eamus: et de istac simul, quo pacto porro possim
Potiri, consilium volo capere una tecum.

ANTIPHO.

Fiat.



DORIAS.

Ita me di ament, quantum ego illum vidi, nonnil
timeo misera, IV. 1.

565 Ne quam ille hodie insanus turbam faciat aut vim
Thaidi.

Nam postquam iste advenit Chremes, rogat mili-
tem, illum admitti

Vt iubeat; is continuo irasci, neque negare au-
dere;

Haec porro instare; invitat tristis; mansit; sermo-
nem occipit;

Miles vero, adductum sibi putans ante oculos ae-
mulum,

570 Huic contra voluit aegre facere: Heus, inquit,
puere, Pamphilam

Arcesse, ut hic delectet nos! Haec clamat: Minu-
me gentium!

In convivium illam? Miles tendere inde ad iur-
gium;

Interea aurum clam sibi mulier demit, dat mi ut
auferam;

Hoc est signi: ubi primum poterit, se illinc sub-
ducet, scio.

PHAEDRIA.

575 Dum rus eo, coepi egomet mecum inter vias, IV. 2.

Ita ut sit, ubi quid in animo est molestiae,

Aliam rem ex alia cogitare et ea omnia

Peiorem in partem. Quid opus verbis? dum haec
puto,

Praeterii imprudens villam. Longe iam abieram,

580 Cum sensi: redeo rursus, male me vero habens.

Vbi ad ipsum venio deverticulum, constitui;

Ocepi mecum cogitare: Hem, biduum hic

Manendum est soli sine illa? — Quid tum postea?

Nihil est. — Quid? nil? tangendi si non copia est,
 585 Eho ne quidem erit videndi? si illud non potest,
 Saltem hoc licebit. Certe extrema linea
 Amare haud nihil est! — villam praetereo sciens.
 Set quid hoc, quod timida subito egreditur Py-
 thias?

PYTHIAS. PHAEDRIA. DORIAS.

PYTHIAS.

Vbi ego illunc scelerosum misera atque impium
 inveniam aut ubi quaeram? IV. 3.
 590 Hoccine tam audax facinus facere esse ausum!
 perii!

PHAEDRIA.

Hoc quid sit, vereor.

PYTHIAS.

Quin etiam scelus insuper, postquam ludificatus
 virginem,
 Vestem omnem miserae discidit, tum ipsam, ca-
 pillos, conscidit.

PHAEDRIA.

Hem!

PYTHIAS.

Qui nunc si detur mihi,
 Vnguibus ut in oculos facile ego involem venefico!

PHAEDRIA.

595 Nescio quid profecto, absente nobis, turbatum est
 domi.

Adibo. Quid istuc? quid festinas aut quem quae-
 ris, Pythias?

PYTHIAS.

Ehem, Phaedria! egon' quem quaeram? in' hinc,
 quo dignus, cum donis tuis
 Tam lepidis?

PHAEDRIA.

Quid istuc est rei?

PYTHIAS.

Rogan' ? Eunuchum quem dedisti nobis, quas tur-
bas dedit!

600 Virginem, quam heræ donavit miles, vitiauit.

PHAEDRIA.

Quid ais?

PYTHIAS.

Perii!

PHAEDRIA.

Temulenta es.

PYTHIAS.

Vtinam sic sint, mihi qui male volunt!

DORIAS.

Au, obsecro, mea Pythias, quid istuc nam mon-
stri fuit?

PHAEDRIA.

Insanis: qui ista eunuchus facere potuit?

PYTHIAS.

Ego illum nescio,

Qui fuerit; hoc, quod fecit, res ipsa indicat:

605 Virgo ipsa lacrimat neque, cum rogites, quid sit,
audet dicere;

Ille autem bonus vir nusquam adparet. Etiam hoc
misera suspicor,

Aliquid domo abeuntem abstulisse.

PHAEDRIA.

Nequeo mirari satis,

Quo ignavos ille abire possit longius, nisi si do-
mum

Forte ad nos rediit.

PYTHIAS.

Vise, amabo, num sit.

PHAEDRIA.

Iam faxo scies.

DORIAS.

610 Perii, obsecro! tam infandum facinus, mea tu, ne
audivi quidem.

PYTHIAS.

At mulierum pol ego amatores audieram esse eos
maximos,

Sed nil potesse; verum miserae non in mentem
venerat:

Nam illum aliquo conclusissem neque illi commi-
sissem virginem.

PHAEDRIA. DORVS. PYTHIAS.
DORIAS.

PHAEDRIA.

Exi foras, scelestes! at etiam restitas, IV. 4.
615 Fugitive? prodi, male conciliate!

DORVS.

Obsecro!

PHAEDRIA.

Eho, illuc vide, os ut sibi distorsit carnufex! —

Quid reeditio est tibi? vestis quid mutatio?

Quid narras? Paulum si cessassem, Pythias,

Domi ne offendissem, ita iam adornarat lugam.

PYTHIAS.

620 Haben' hominem, amabo?

PHAEDRIA.

Quidni habeam?

PYTHIAS.

O factum bene!

DORIAS.

Istuc pol vero bene!

PYTHIAS.

Vbi est?

PHAEDRIA.

Rogitas? non vides?

PYTHIAS.

Videam, obsecro? quem?

PHAEDRIA.

Hunc scilicet.

PYTHIAS.

Quis hic homo est?

PHAEDRIA.

Qui ad vos deductus hodie est.

PYTHIAS.

Hunc oculis suis

Nostrarum nunquam vidit quisquam, Phaedria.

PHAEDRIA.

625 Non vidit?

PYTHIAS.

An tu hunc credidisti esse, obsecro,

Ad nos deductum?

PHAEDRIA.

Nam alium quem habui neminem.

PYTHIAS.

Ah,

Ne comparandus hic quidem ad illum est: ille erat
Honestae facie et liberali.

PHAEDRIA.

Ita visus est

Dudum, quia varia veste exornatus fuit.

PYTHIAS.

630 Tace, obsecro: quasi vero paulum intersiet.

Ad nos deductus hodie est adolescentulus,

Quem tu videre velles vero, Phaedria;

Hic est vietus, vetus, veterosus senex,

Colore mustelino.

PHAEDRIA.

Hem, quae haec est fabula?

635 Eo rediges me, ut, quid egerim, egomet nesciam! —

Eho tu, emin' ego te?

DORVS.

Emisti.

PYTHIAS.

Iube mihi denuo

Respondeat.

PHAEDRIA.

Roga.

PYTHIAS.

Venisti hodie ad nos? — Negat.

At ille alter venit, annos natus sedecim,
 Quem secum adduxit Parmeno.

PHAEDRIA.

640 Primum: istam, quam habes, unde habes vestem? — taces,
 Monstrum hominis? non dicturus?

DORVS.

Venit Chaerea....

PHAEDRIA.

Fraterne?

DORVS.

Ita.

PHAEDRIA.

Quando?

DORVS.

Hodie.

PHAEDRIA.

Quamdudum?

DORVS.

Modo.

PHAEDRIA.

Quicum?

DORVS.

Cum Parmenone.

PHAEDRIA.

Norasne eum prius?

DORVS.

Non.

PHAEDRIA.

Vnde, meum esse fratrem, scibas?

DORVS.

Parmeno

645 Dicebat esse; is mi hanc dedit vestem....

PHAEDRIA.

Occidi!

DORVS.

Meam ipse induit; post una ambo abierunt foras.

PYTHIAS.

Iam satis credis, sobriam esse et nil me mentitam
tibi?

Iam satis certum est, vitiatam esse virginem?

PHAEDRIA.

Age nunc, belua....

— Credis huic, quod dicit?

PYTHIAS.

Quidni credam? res ipsa indicat.

PHAEDRIA.

650 Concede istuc paululum! — audin'? — etiam
nunc paulum! — sat est.Diedum hoc rursus: Chaerean' tuam vestem de-
traxit tibi?

DORVS.

Factum.

PHAEDRIA.

Et eam est indutus?

DORVS.

Factum.

PYTHIAS.

Et pro te huc deductust?

DORVS.

Ita.

PHAEDRIA.

Iupiter magne! o scelestum et audacem hominem!

PYTHIAS.

Vae mihi!

Etiam non indignis credes nos esse irrisas modis?

PHAEDRIA.

655 Mirum, ni tu credis, quod iste dicit. — Quid
agam, nescio. —Heus, negato rursus! — Possumne hodie ego ex
te exsculpere

Verum? vidistine fratrem Chaeream?

DORVS.

Non.

PHAEDRIA.

Non potest

Sine malo fateri, video: sequere hac. — Modo
ait, modo negat. —

Ora me.

DORVS.

Obsecro te vero, Phaedria!

PHAEDRIA.

In' intro?

DORVS.

Oi, eĩ!

PHAEDRIA.

660 Alio pacto honeste quomodo abierim hinc ego,
nescio. —

Actum est, siquidem tu me hic etiam, nebulo,
ludificabere!

PYTHIAS.

Parmenonis tam scio esse hanc technam, quam,
me vivere.

DORIAS.

Sic est.

PYTHIAS.

Inveniam pol hodie, parem ubi referam
gratiam.

Set nunc quid faciundum censes, Dorias?

DORIAS.

De istac rogas

665 Virgine?

PYTHIAS.

Ita; utrum praedicemne an taceam?

DORIAS.

Tu pol, si sapis,

Quod scis, nescis, neque de emucho, neque de
vitio virginis:

Hac re et te omni turba evolves, et illi gratum
feceris;

Id modo dic, abisse Dorum.

PYTHIAS.

Ita faciam. Set videon' Chremem?

DORIAS.

Thais iam aderit.

PYTHIAS.

Quid ita?

DORIAS.

Quia, cum inde abeo, iam tum inceperat

670 Turba inter eos.

PYTHIAS.

Tu aufer aurum hoc; ego scibo ex
hoc, quid siet.

CHREMES. PYTHIAS.

CHREMES.

Attat, data hercle verba mihi sunt! vicit vinum,
quod bibi! IV. 5.

Ac, dum accubabam, quam videbar mi esse pul-
chre sobrius!

Postquam surrexi, neque pes neque mens satis
suum officium facit.

PYTHIAS.

Chreme!

CHREMES.

Quis est? ehem Pythias! Vah, quanto nunc
formosior

675 Videre mihi quam dudum!

PYTHIAS.

Certe tu quidem pol multo hilarior.

CHREMES.

Verbum hercle hoc verum erit: sine Cerere et
Libero friget Venus.

Set Thais multo me antevenit?

PYTHIAS.

An abiit iam a milite?

CHREMES.

Iamdudum, aetatem!

PYTHIAS.

Eho!

CHREMES.

Lites factae sunt inter eos maxumae.

PYTHIAS.

Nil dixit, tu ut sequerere sese?

CHREMES.

Nil, nisi abiens mi innuit.

PYTHIAS.

680 Eho, nonne id sat erat?

CHREMES.

At nescibam, id dicere illam, nisi quia
Correxit miles, quod intellexi minus: nam me ex-
trusit foras.

Set eccam ipsam! miror, ubi ego huic antevor-
terim.

THAIS. CHREMES. PYTHIAS.

THAIS.

Credo equidem, illum iam adfuturum, ut illam a
me eripiat. Sine veniat! IV. 6.

Si illanc uno digito attigerit, oculi ei illico effo-
dientur!

685 Vsque adeo illius ferre ego possum ineptiam et
magnifica verba,

Verba dum sint; verum enim si ad rem conferen-
tur, vapulabit.

CHREMES.

Thais, ego iamdudum hic adsum.

THAIS.

O mi Chreme, te ipsum expeto.

Scin' tu, turbam hanc propter te esse factam et
adeo ad te attinere hanc
Omnem rem?

CHREMES.

Ad me? qui, quaeso, istuc?

THAIS.

Quia, dum tibi sororem studeo
690 Reddere ac restituere, haec atque huiusmodi sum
multa passa.

CHREMES.

Vbi ea est?

THAIS.

Domī apud me.

CHREMES.

Hem!

THAIS.

Quid est?

Educta ita uti teque illaque dignum est.

CHREMES.

Quid ais?

THAIS.

Id quod res est.

Hanc tibi dono do neque repeto pro illa quid-
quam abs te preti.

CHREMES.

Et habetur et referetur, Thais, ita uti merita es,
gratia.

THAIS.

695 At enim cave, ne priusquam hanc a me accipias
amittas, Chreme:

Namque haec ea est, quam miles a me vi nunc
ereptum venit.

Abi tu, cistellam, Pythias, domo effer cum monu-
mentis.

CHREMES.

Viden' tu illum, Thais....

PYTHIAS.

Vbi sita est?

THAIS.

In risco. Odiosa, cessas?

CHREMES.

Militem secum ad te quantas copias adducere?

700 Attat!

THAIS.

Num formidolosus, obsecro, es, mi homo?

CHREMES.

Apage sis!

Egon' formidolosus? nemo est hominum, qui vivat, minus.

THAIS.

Atque ita opus.

CHREMES.

Ah, metuo, qualem tu me esse hominem existumes.

THAIS.

Imo hoc cogitato: quicum res tibi est, peregrinus est,

Minus potens quam tu, minus notus, minus amicorum hic habens.

CHREMES.

705 Scio istuc; set, cavere tu quod possis, stultum admittere est;

Malo ego nos prospicere, quam hunc ulcisci accepta iniuria.

Tu abi atque obsera ostium intus, dum ego hinc transcurro ad forum:

Volo ego adesse hic advocatos nobis in turba hac.

THAIS.

Mane.

CHREMES.

Melius est.

THAIS.

Mane.

CHREMES.

Mitte: iam adero.

THAIS.

THAIS.

Nil opus est istis, Chreme;
 710 Hoc modo dic, sororem esse illam tuam, te par-
 vam virginem
 Amisisse, nunc cognosse; signa ostende.

PYTHIAS.

Adsunt.

THAIS

Cape:
 Vim si faciet, in ius ducito hominem. Intellexin'?

CHREMES.

Probe.

THAIS.

Fac animo haec praesenti ut dicas.

CHREMES.

Faciam.

THAIS.

Attolle pallium.

— Perii, huic ipsi patrono opus est, quem de-
 fensorem paro!

THRASO. GNATHO. SANGA.

CHREMES. THAIS.

THRASO.

715 Hancine ego ut contumeliam tam insignem in me
 accipiam, Gnatho? IV. 7.

Mori me satius! Simalio, Donax, Syrisce, sequi-
 mini!

Primum aedes expugnabo;....

GNATHO.

Recte!

THRASO.

Virginem eripiam;....

GNATHO.

Probe!

THRASO.

Male mulcabo ipsam.

GNATHO.

Pulchre!

THRASO.

In medium huc agmen cum vecti, Donax!

Tu, Simalio, in sinistrum cornu! tu, Syrisce, in
dexterum!720 Cedo alios! ubi centurio est Sanga et manipulus
furum?

SANGA.

Eccum adest!

THRASO.

Quid, ignave? peniculon' pugnare, qui istum huc
portes, cogitas?

SANGA.

Egone? imperatoris virtutem noveram et vini mi-
litum:Sine sanguine hocne posse fieri? qui abstergerem
volnera?

THRASO.

Vbi alii?

SANGA.

Qui, malum, alii? solus Sannio servat domi.

THRASO.

725 Tu hosce instrue; ego ero post principia: inde
omnibus signum dabo.

GNATHO.

Illuc est sapere! — Vt hosce instruxit, ipse sibi
cavit loco.

THRASO.

Item Pyrrhus hoc iam factitavit.

CHREMES.

Viden' tu, Thais, quam hic rem agit?

Nimirum consilium illud rectum est de occluden-
dis aedibus.

THAIS.

Sane, qui tibi nunc vir videtur esse, hic nebulo
magnus est:

730 Ne metuas.

THRASO.

Quid videtur?

GNATHO.

Nunc tibi fundam nimis vellem dari,
Vt procul hinc ex occulto tu illos caederes! face-
rent fugam.

THRASO.

Set eccam Thaidem ipsam video.

GNATHO.

Quam mox inruimus?

THRASO.

Mane:

Omnia prius experiri, quam arma, sapientem decet.
Qui scis, an sine vi, quae iubeam, faciat?

GNATHO.

Di, vostram fidem,

735 Quanti est sapere! nunquam accedo, quin abs te
abeam doctior.

THRASO.

Thais, primum hoc mihi responde: cum tibi do
istam virginem,
Dixtin', hos dare mihi dies te soli?

THAIS.

Quid tum postea?

THRASO.

Rogitas, quae mi ante oculos coram amatorem
adduxti tuum,....

THAIS.

Quid cum illoc agas?

THRASO.

Et cum eo clam te subduxti mihi?

THAIS.

740 Lubuit.

THRASO.

Pamphilam ergo huc redde, nisi si mavis
eripi.

CHREMES.

Tibi illam reddat? tu illam tangas, omnium....?

GNATHO.

Ah, quid agis?

CHREMES.

Tace!

THRASO.

Quid tu tibi vis? ego non tangam meam?

CHREMES.

Tuam autem, furcifer?

GNATHO.

Cave sis! nescis, cui maledicas nunc viro.

CHREMES.

Non tu hinc abis? —

Scin' tu, ut tibi res se habeat? si quidquam hodie
hic turbæ coeperis,

745 Faciam, ut huius loci dieque meique semper me-
mineris.

GNATHO.

Miseret tui me, qui hunc tantum hominem facias
inimicum tibi.

CHREMES.

Diminuam ego caput tibi hodie, nisi abis!

GNATHO.

Ain' vero, canis?

Siccine agis?

THRASO.

Quis tu homo es? quid tibi vis? quid
cum illa re tibi est?

CHREMES.

Scibis: principio esse dico liberam,....

THRASO.

Hem!

CHREMES.

Civem Atticam,....

THRASO.

Hui!

CHREMES.

750 Meam sororem.

THRASO.

Os durum!

CHREMES.

Miles, nunc adeo edico tibi,
Vim ne facias ullam in illam. Thais, ego eo ad
Sophronam

Nutricem, ut eam adducam et signa ostendam haec.

THRASO.

Tun' me prohibeas,
Meam ne tangam?

CHREMES.

Prohibeo, inquam.

GNATHO.

Audin' tu? hic furti se adligat.
Satis tibi est?

THRASO.

Idem hoc tu, Thais?

THAIS.

Quaere, qui respondeat.

THRASO.

755 Quid nunc agimus?

GNATHO.

Quin redimus? iam haec tibi aderit
supplicans

Vltro.

THRASO.

Credin'?

GNATHO.

Imo certe: novi ingenia mulierum:
Nolunt, ubi velis; ubi nolis, cupiunt ultro.

THRASO.

Bene putas.

GNATHO.

Iam dimitto exercitum?

THRASO.

Vbi vis.

GNATHO.

Sanga, ita ut fortes decet
Milites, domi focique fac vicissim ut memineris.

SANGA.

760 Iamdudum animus est in patinis.

GNATHO.

Frugi es.

THRASO.

Vos me hac sequimini.

THAIS. PYTHIAS.

THAIS.

Pergin', scelestas, mecum perplexe loqui: V. r.
„Scio — nescio — abiit — audiui — ego non
ad fui” — ?

Non tu istuc mihi dictura aperte es quidquid est?
Virgo conscissa veste lacrimans obticet;

765 Eunuchus abiit. Quamobrem? quid factum est?
taces?

PYTHIAS.

Quid tibi ego dicam misera? illum eunuchum ne-
gant

Fuisse.

THAIS.

Quis fuit igitur?

PYTHIAS.

Iste Chaerea....

THAIS.

Qui Chaerea?

PYTHIAS.

Iste ephebus frater Phaedriae.

THAIS.

Quid ais, venefica?

PYTHIAS.

Atqui certo comperi.

THAIS.

770 Quid is, obsecro, ad nos? quamobrem adductus?

PYTHIAS.

Nescio,

Nisi amasse credo Pamphilam.

THAIS.

Hem miserum! Occidi

Infelix, si quidem vera tu istaec praedicas!

Num id lacrumat virgo?

PYTHIAS.

Id, opinor.

THAIS.

Quid ais, sacrilega?

Istucne interminata sum hinc abiens tibi?

PYTHIAS.

775 Quid facerem? ita, ut tu iusti, soli credita est.

THAIS.

Scelestas! ovem lupo commisi! disputet,

Sic mihi data esse verba.

PYTHIAS.

Quid illuc hominis est?

Hera mea, tace, tace, obsecro: salvae sumus:

Hominem ipsum habemus.

THAIS.

Vbi is est?

PYTHIAS.

Hem, ad sinisteram.

780 Viden'?

THAIS.

Video.

PYTHIAS.

Comprehendi iube quantum potest!

THAIS.

Quid illoc faciemus, stulta?

PYTHIAS.

Quid facias, rogas?

Vide, amabo, si, cum adspicias, non os impudens
Videtur...

THAIS.

Non.

PYTHIAS.

Tum, quae eius confidentia est!

CHAEREA. THAIS. PYTHIAS.

CHAEREA.

Apud Antiphonem uterque mater et pater, V. 2.
785 Quasi dedita opera, domi erant, ut nullo modo
Introire possem, quin viderent me. Interim,
Dum ante ostium sto, notus mihi quidam obviam
Venit; ubi vidi, ego me in pedes quantum queo
In angiportum quoddam desertum, inde item
790 In aliud, inde in aliud: ita miserrimus
Fui fugitando, ne quis me cognosceret.
Set, quam video, estne haec Thais? ipsa est.

Haereo,

Quid faciam. Quid mea autem? quid faciet mihi?

THAIS.

Adeamus. Bone vir, Dore, salve! dic mihi,
795 Aufugistine?

CHAEREA.

Hera, factum.

THAIS.

Satin' id tibi placet?

CHAEREA.

Non.

THAIS.

Credin', te impune habiturum?

CHAEREA.

Vnam hanc noxiam
Amitte: si aliam admisero 'unquam, occidito.

THAIS.

Num meam saevitiam veritus?

CHAEREA.

Non.

THAIS.

Non? quid igitur?

CHAEREA.

Hanc metui, ne me criminaretur tibi.

THAIS.

800 Quid feceras?

CHAEREA.

Paulum quiddam.

PYTHIAS.

Eho paulum, impudens?

An paulum hoc esse tibi videtur, virginem

Vitiare civem?

CHAEREA.

Conservam esse credidi.

PYTHIAS.

Conservam? vix contineo me, quin involem in

Capillum monstro. Etiam ultro derisum advenit!

THAIS.

805 Abin' hinc, insana?

PYTHIAS.

Quid ita vero? debeam,

Credo, isti quidquam furcifero, id si fecerim,

Praesertim cum se servom fateatur tuum!

THAIS.

Missa haec faciamus. Non te dignum, Chaerea,

Fecisti: nam si ego digna hac contumelia

810 Sum maxime, at tu indignus, qui faceres, tamen.

Neque edepol, quid nunc consili capiam, scio,

De virgine istac, ita conturbasti mihi

Rationes omnes, ut eam non possim suis,

Ita ut aequom fuerat atque ut studui, tradere,

815 Vt solidum hoc parerem mihi beneficium, Chaerea.

CHAEREA.

At nunc dehinc spero aeternam inter nos gratiam

Fore, Thais: saepe ex huiusmodi re quapiam et
 Malo principio magna familiaritas
 Conflata est. Quid, si quispiam hoc voluit deus?

THAIS.

820 Equidem pol in eam partem accipioque et volo.

CHAEREA.

Imo ita quaeso. Vnum hoc scito: contumeliae
 Me non fecisse causa, set amoris.

THAIS.

Scio,

Et pol propterea magis nunc ignosco tibi:
 Non adeo inhumano ego sum ingenio, Chaerea,
 825 Neque tam imperita, ut, amor quid valeat, ne-
 sciam.

CHAEREA.

Te quoque iam, Thais, ita me di bene ament,
 amo.

PYTHIAS.

Tum pol ab istoc tibi, hera, cavendum intelligo.

CHAEREA.

Non ausim.

PYTHIAS.

Nil tibi quidquam credo.

THAIS.

Desinas.

CHAEREA.

Nunc ego te in hac re mi oro ut adiutrix sies:
 830 Ego me tuac commendo et committo fide;
 Te mihi patronam capio, Thais; te obsecro.
 Emoriar, si non hanc uxorem duxero.

THAIS.

Si pater tamen quid....

CHAEREA.

Alì volet, certo scio,

Civis modo haec sit.

THAIS.

Paululum opperirier

835 Si vis, iam hic ipse frater aderit virginis.

Nutricem arcessitum iit, quae illam aluit parvolam.
In cognoscendo tute ipse aderis, Chaerea.

CHAEREA.

Ego maneo vero.

THAIS.

Visne interea, dum venit,
Domi opperiamur potius quam hic ante ostium?

CHAEREA.

840 Imo percupio.

PYTHIAS.

Quam tu rem actura, obsecro, es?

THAIS.

Nam quid ita?

PYTHIAS.

Rogitas? hunc tu in aedes cogitas
Recipere posthac?

THAIS.

Cur non?

PYTHIAS.

Crede hoc meae fide,
Dabit pugnam hic aliquam denuo.

THAIS.

Ah, tace obsecro.

PYTHIAS.

Parum perspexisse eius videre audaciam.

CHAEREA.

845 Non faciam, Pythias.

PYTHIAS.

Non pol credo, Chaerea,
Nisi si commissum non erit.

CHAEREA.

Quin, Pythias,

Tu me servato.

PYTHIAS.

Neque pol servandum tibi
Quidquam dare ausim, neque te servare. Apage te!

THAIS.

Adest optume ipse frater.

CHAEREA.

Perii hercle! obsecro,

850 Abeamus intro, Thais: nolo me in via
Cum hac veste videat.

THAIS.

Quamobrem tandem? an quid pudet?

CHAEREA.

Id ipsum.

PYTHIAS.

Id ipsum! virgo vero...!

THAIS.

I prae; sequor.

Tu istic mane, ut Chremem introducas, Pythias.

PYTHIAS. CHREMES. SOPHRONA.

PYTHIAS.

Quid, quid, venire in mentem nunc possit mihi, V.3.

855 Quidnam, qui referam sacrilego illi gratiam,
Hunc qui supposuit nobis?

CHREMES.

Move vero ocius,

Nutrix, te.

SOPHRONA.

Moveo.

CHREMES.

Video, set nil promotes.

PYTHIAS.

Iamne ostendisti signa nutrici?

CHREMES.

Omnia.

PYTHIAS.

Amabo, quid ait? cognoscitne?

CHREMES.

Ac memoriter.

PYTHIAS.

- 860 Bene edepol narras: nam illi faveo virgini.
 Ite intro: iamdudum hera vos exspectat domi.
 — Virum bonum eccum Parmenonem incedere
 Video. Vide, ut otiosus it, si dīs placet!
 Spero, me habere, meo qui hunc excruciem modo.
- 865 Ibo intro, de cognitione ut certum sciam;
 Post exeo atque hunc perterrebo sacrilegum.

 PARMENO. PYTHIAS.

PARMENO.

- Reviso, quidnam Chaerea hic rerum gerat. V. 4.
 Quodsi astu rem tractavit, di, vostram fidem,
 Quantam, quam veram, laudem capiet Parmeno!
- 870 Nam ut mittam, quod ei amorem difficillimum et
 Carissimum, a meretrice avāra virginem
 Quam amabat, eum confeci sine molestia,
 Sine sumtu, sine dispendio; tum hoc alterum
 Id vero est, quod ego mihi puto palmarium:
- 875 Me repperisse, quomodo adolescentulus
 Meretricum ingenia et mores posset noscere,
 Mature ut cum cognorit perpetuo oderit:
 Quae dum foris sunt, nil videtur mundius;
 Neque magis compositum quidquam nec magis
 elegans,
- 880 Quam cum amatore coenam quom ligurriunt:
 Harum videre inluviem, sordes, inopiam;
 Quam inhonestae sint solae domi atque avidae
 cibi;
 Quo pacto ex iure hesterno panem atrum vorent:
 Nosse omnia haec, saluti est adolescentulis.
- PYTHIAS.
- 885 Ego pol te pro istis dictis et factis, scelus,
 Vliscar, ut ne impune in nos inluseris.

— Proh fidem deum, facinus foedum! o infelicem
adolescentulum!

O scelestum Parmenonem, qui istum huc adduxit!

PARMENO.

Quid est?

PYTHIAS.

Miseret me: itaque, ut ne viderem, misera huc
effugi foras,

890 Quae futura exempla dicunt in eum indigna.

PARMENO.

O Iupiter,

Quae illaec turba est? numnam ego perii? adibo.

— Quid istuc, Pythias,

Quod ais? in quem exempla fient?

PYTHIAS.

Rogitas, audacissime?

Perdidisti illunc, quem adduxti pro eunucho, ado-
lescentulum,

Dum studes dare verba nobis.

PARMENO.

Quid ita, aut quid factum est? cedo.

PYTHIAS.

895 Dicam: virginem istam, Thaidi hodie quae dono
data est,

Scisne hinc esse civem, et fratrem ei esse ad-
prime nobilem?

PARMENO.

Nescio.

PYTHIAS.

Atqui sic inventa. Eam iste vitiavit miser.

Ille ubi rescivit factum frater violentissimus...

PARMENO.

Quidnam fecit?

PYTHIAS.

Conligavit primum eum miseris modis,...

PARMENO.

Hem,

900 Conligavit?

PYTHIAS.

Et quidem orante, ut ne id faceret, Thaide.

PARMENO.

Quid ais?

PYTHIAS.

Nunc minatur porro, sese id, quod moe-
chis solet,

Quod ego nunquam vidi fieri, neque velim....

PARMENO.

Qua audacia

Tantum facinus audet?

PYTHIAS.

Quid ita tantum?

PARMENO.

Annon hoc maxumum est?

Quis homo unquam pro moechno, vidit in domo
meretrice

905 Prendi quenquam?

PYTHIAS.

Nescio.

PARMENO.

At, ne hoc nesciatis, Pythias,
Dico, edico vobis, nostrum esse illum herilem
filium,....

PYTHIAS.

Hem,

Obsecro, an is est?

PARMENO.

Ne quam in illum Thais fieri vim sinat.
Atque adeo autem cur non egomet intro eo?

PYTHIAS.

Vide, Parmeno,

Quid agas, ne neque illi prosis, et tu pereas:
nam hoc putant,

910 Quidquid factum est, a te esse ortum.

PARMENO.

Quid igitur faciam miser,

Quidve incipiam? — Ecce autem video rure redeuntem senem.

Dicam huic, annon dicam? — dicam hercle, etsi mihi magnum malum

Scio paratum; set necesse est, huic ut subveniat.

PYTHIAS.

Sapis:

Abeo; tu isti narrato ordine omne, uti factum siet.

LACHES. PARMENO.

LACHES.

915 Ex meo propinquo rure hoc capio commodi: V. 5.
Neque agri neque urbis odium me unquam percipit:

Vbi satias coepit fieri, commuto locum.

Set estne ille noster Parmeno? et certe ipse est.

Quem praestolare, Parmeno, hic ante ostium?

PARMENO.

920 Quis homo est? ehem! salvum te advenisse gaudeo.

LACHES.

Quem praestolare?

PARMENO.

Perii, lingua haeret metu!

LACHES.

Hem,

Quid est, quod trepidas? satine salvae? dic mihi.

PARMENO.

Here, primum te arbitrari id, quodd res est, velim:

Huius quidquid factum est, culpa non factum est mea.

LACHES.

925 Quid?

PARMENO.

Recte sane interrogasti; oportuit

Rem praenarrasse me. Emit quendam Phaedria

Eunu-

Eunuchum, quem dono huic daret.

LACHES.

Cui?

PARMENO.

Thaidi.

LACHES.

Emit? perii hercle! quanti?

PARMENO.

Viginti minis.

LACHES.

Actum est!

PARMENO.

Tum quandam fidicinam amat hinc Chaerea...

LACHES.

Hem,

930 Quid? amat? an iam scit ille, quid meretrix siet?
An in astu venit? aliud ex alio malum!

PARMENO.

Here, ne me spectes: me impulsore haec non facit.

LACHES.

Omitte de te dicere. — Ego te, furcifer,
Si vivo...! — Sed istuc, quidquid est, primum expedi.

PARMENO.

935 Is pro ille eunucho ad Thaidem huc deductus est.

LACHES.

Pro eunuchon'?

PARMENO.

Sic est. Hunc pro moecho postea
Comprehendere intus et constrinxere.

LACHES.

Occidi!

Audaciam meretricum specta! Numquid est
Aliud mali damnive, quod non dixeris,

940 Relictum?

PARMENO.

Tantum est.

LACHES.

Cesso huc introrumpere?

K

PARMENO.

Non dubium est, quin mihi magnum ex hac re sit
malum,

Nisi quia fuit necessum, hoc facere. Id gaudeo,
Me propter aliquid hisce eventurum mali:

Nam iamdiu aliquam causam quaerebat senex,

945 Quamobrem insigne aliquid faceret iis; nunc reperit.

PYTHIAS. PARMENO.

PYTHIAS.

Nunquam edepol quidquam iamdiu, quod magis
vellem evenire, V. 6.

Mi evenit, quam, senex quod intro ad nos modo
venit errans.

Mihi solae ridiculo fuit, quae, quid timeret, scibam....

PARMENO.

Quid hoc autem est?

PYTHIAS.

Nunc id prodeo ut conveniam Parmenonem.

950 Set ubi, obsecro, est?

PARMENO.

Me quaerit haec.

PYTHIAS.

Atque eccum video: adibo.

PARMENO.

Quid, inepta, id est? quid vis tibi? quid rides?
pergin'?

PYTHIAS.

Perii!

Defessa iam sum misera te ridendo.

PARMENO.

Quid ita?

PYTHIAS.

Rogitas?

Nunquam pol hominem stultioremi vidi nec videbo. Ah,

Non pote satis narrari, quos ludos praebueris intus.

955 At te etiam primo callidum et disertum credidi hominem.

Quid? illicone credere ea, quae dixi, oportuit te?

An poenitebat flagiti, te auctore quod fecisset

Adolescens, miserum patri ni insuper etiam indicares?

Nam quid illi credis animi tum fuisse, ubi vestem vidit

960 Illam esse eum indutum pater? quid? iam scis te perisse?

PARMENO.

Ehem, quid dixisti, pessuma? an mentita es? etiam rides?

Itan' lepidum tibi visum est, scelus, nos inridere?

PYTHIAS.

Nimium!

PARMENO.

Siquidem istuc impune habueris!

PYTHIAS.

Verum.

PARMENO.

Reddam hercle!

PYTHIAS.

Credo;

Set in diem istuc, Parmeno, est fortasse, quod minare:

965 Tu iam pendebis, stulte, qui adolescentulum nobilitas

Flagitiis et patri indicas: uterque exempla in te edent.

PARMENO.

Nullus sum!

PYTHIAS.

Hic pro illo munere tibi honos est habitus.

Abeo.

PARMENO.

Egomet meo indicio miser, quasi sorex, hodie
perii!

GNATHO. THRASO.

GNATHO.

Quid nunc? qua spe aut quo consilio huc imus?
quid coeptas, Thraso? V. 7.

THRASO.

970 Egone? ut dedam Thaidi me et faciam, quod
iubeat.

GNATHO.

Quid ais?

THRASO.

Qui minus quam Hercules servivit Omphalae?

GNATHO.

Exemplum placet. —

Vtinam tibi committigari videam sandalio caput! —
Set fores crepuerunt ab ea.

THRASO.

Perii! quid hoc autem est mali?

Hunc ego nunquam videram etiam. Quidnam hic
properans prosilit?CHAEREA. PARMENO. GNATHO.
THRASO.

CHAEREA.

975 O populares, equis me hodie vivit fortunatior?
Hercle V. 8.

Nemo quisquam: nam in me plane di potestatem
suam omnem

Ostenderunt, cui tam subito tot congruerint com-
moda!

PARMENO.

Quid hic laetus?

CHAEREA.

O mi Parmeno, o mearum voluptatum
omnium

Inventor, inceptor, perfector, scin' me, in quibus
sim gaudiis?

980 Scis Pamphilam meam civem inventam?

PARMENO.

Audivi.

CHAEREA.

Scis sponsam mihi?

PARMENO.

Bene, ita me di ament, factum!

GNATHO.

Audin' tu, hic quid ait?

CHAEREA.

Tum autem Phaedriae,
Meo fratri, gaudeo omnem amorem esse in tran-
quillo: una est domus;
Thais se patri commendavit; in clientelam et
fidem

Nobis dedit se.

PARMENO.

Fratris igitur Thais tota est?

CHAEREA.

Scilicet.

PARMENO.

985 Iam hoc aliud est, quod gaudeamus: miles pelle-
tur foras.

CHAEREA.

Tu, frater, ubiubi est, fac quam primum haec audiat.

PARMENO.

Visam domum.

THRASO.

Numquid, Gnatho, tu dubitas, quin ego nunc perpetuo perierim?

GNATHO.

Sine dubio, opinor.

CHAEREA.

Quid commemorem primum aut laudem maxime?

Illumne, qui consilium dedit, ut facerem, an me, qui id ausus sum

990 Incipere? an fortunam conlaudem, quae gubernatrix fuit,

Quae tot res, tantas, tam opportune in unum conclusit diem,

An patris mei festivitatem et facilitatem? o Iupiter,

Serva, obsecro, haec nobis bona!

PHAEDRIA. PARMENO. CHAEREA.
THRASO. GNATHO.

PHAEDRIA.

Di, vostram fidem! incredibile, Parmeno modo quod narravit! V. 9.

995 Set ubi est frater?

CHAEREA.

Praesto adest.

PHAEDRIA.

Gaudeo.

CHAEREA.

Satis credo. Nihil est Thaïde hac, frater, tua Dignius, quod ametur: ita nostrae omni est faulrix familiae.

PHAEDRIA.

Hui.

Mi illam laudas?

THRASO.

Perii! quanto spe minus, tanto magis amo!
Obsecro, Gnatho, in te spes est!

GNATHO.

Quid vis faciam?

THRASO.

Perfice hoc
1000 Precibus, pretio, in parte ut haeream aliqua tan-
dem apud Thaidem!

GNATHO.

Difficile est!

THRASO.

Si quid collubitum est, novi te. Hoc
si effeceris,
Quodvis donum praemio a me optato, id opta-
tum feres.

GNATHO.

Itane?

THRASO.

Sic erit.

GNATHO.

Si efficio hoc, postulo, ut tua mihi domus
Te praesente absente pateat, invocato ut sit locus,
1005 Semper.

THRASO.

Do fidem, futurum.

GNATHO.

Accingar.

PHAEDRIA.

Quem ego hic audio?

Eho, Thraso,....

THRASO.

Salvete.

PHAEDRIA.

Tu fortasse, quae facta hic sient,

Nescis.

THRASO.

Scio.

PHAEDRIA.

Cur ergo in his te ego conspicio regionibus?

THRASO.

Vobis fretus....

PHAEDRIA.

Scin', quam fretus? Miles, edico tibi:

Si te in platea offendero hac post unquam, quod
dicas mihi:

1010 „Alium quaerebam; — iter hac habui:" periisti!

GNATHO.

Heia, haut sic decet.

PHAEDRIA.

Dictum est.

GNATHO.

Non cognosco vestrum tam superbum.

PHAEDRIA.

Sic erit.

GNATHO.

Prius audite paucis, quod, cum dixerò, si placuerit,

Facitote.

PHAEDRIA.

Audiamus.

GNATHO.

Tu concede paulum istuc, Thraso. —

Principio ego vos credere ambos hoc mihi vehementer volo,

1015 Me, huius quidquid faciam, id facere maxime
causa mea;Verum idem, si vobis prodest, vos non facere,
inscitia est.

PHAEDRIA.

Quid id est?

GNATHO.

Militem ego rivalem recipiundum censeo.

PHAEDRIA.

Hem,

Recipiundum?

GNATHO.

Cogita modo: tu hercle cum illa, Phaedria,
 Et lubenter vivis (etenim bene lubenter victitas),
 1020 Et, quod des, paulum est, necesse est, multum
 accipere Thaidem.

Tuo ut amorī suppeditare possint sine sumtu tuo
 Omnia, magis opportunus nec magis ex usu tuo
 Nemo est: principio et habet quod det, et dat
 nemo largius;

Fatuus est, insulsus, bardus; stertit noctes et
 dies:

1025 Ne istunc metuas ne amet mulier: facile pellas,
 ubi velis.

PHAEDRIA.

Quid agimus?

GNATHO.

Praeterea hoc etiam, quod ego vel
 primum puto:

Accipit homo nemo prorsum melius neque pro-
 lixius.

CHAEREA.

Mirum, ni illoc homine quoquo pacto opus.

PHAEDRIA.

Idem ego arbitror.

GNATHO.

Recte facitis. Vnum etiam hoc vos oro, ut me
 in vestrum gregem

1030 Recipiatis. Sat diu hoc iam saxum volvo.

PHAEDRIA.

Recipimus.

CHAEREA.

Ac lubenter.

GNATHO.

At ego pro istoc, Phaedria, et tu,
 Chaerea,

Hunc comedendum et ebibendum vobis propino.

CHAEREA.

Placet.

PHAEDRIA.

Dignus est.

GNATHO.

Thraso, accede, ubi vis.

THRASO.

Obsecro te, quid agimus?

GNATHO.

Quid? isti te ignorabant; postquam eis mores
ostendi tuos,

1055 Et conlaudavi secundum facta et virtutes tuas,
Impetravi.

THRASO.

Bene fecistis: gratiam habeo maxumam.
Nunquam etiam fui usquam, me omnes quin ama-
rent plurimum.

GNATHO.

Dixin' ego in hoc esse vobis Atticam elegantiam?

PHAEDRIA.

Nil praeter promissum est. Ite hac.

CANTOR.

Vos valete et plaudite.



HEAVTONTIMORVMENOS.



C. SVLPITII APOLLINARIS PERIOCHA IN HEAVTONTIMORVMENON.

In militiam proficisci gnatum Cliniam,
Amantem Antiphilam, compulit durus pater,
Animique sese angebat, facti poenitens.
Mox ut, reversus, clam patrem divortitur
Ad Clitiphonem (is amabat scortum Bacchidem),
Cum arcesseret cupitam Antiphilam Clinia,
Item alius venit Bacchis amica, ac servolae
Habitum gerens Antiphila. Factum id, quo patrem
Suum celaret Clitipho. Hic technis Syri
Decem minas meretriculae aufert a sene.
Antiphila Clitiphonis reperitur soror.
Hanc Clinia, illam Clitipho, uxorem accipit.

P. T E R E N T I
HEAVTONTIMORVMENOS.

GRAECA EST MENANDRV, ACTA LVDIS
MEGALENSIB. L. CORNELIO LENTVLO
L. VALERIO FLACCO AEDILIB. CVRV-
LIB. EGIT AMBIVIVS TVRPPIO. MODOS
FECIT FLACCVS CLAVDI. ACTA PRI-
MVM TIBIIS IMPARIBVS DEINDE DVA-
BVS DEXTRIS. ACTA III. M. IVVENTIO
TI. SEMPRONIO COSS.

DRAMATIS PERSONAE.

CHREMES.
MENEDEMVS.
CLITIPHO.
CLINIA.
SYRVS.
DROMO.
BACCHIS.
ANTIPHILA.
SOSTRATA.
NVTRIX.
PHRYGIA.

P R O L O G V S.

- Ne cui sit vostrum mirum, cur partes seni
Poëta dederit, quae sunt adolescentium,
Id primum dicam; deinde, quod veni, eloquar.
Ex integra graeca integram comoediam
5 Hodie sum acturus, Heautontimorumenon,
Simplex quae ex argumento facta est duplici.
Novam esse ostendi, et, quae esset; nam qui scri-
pserit,
Et cuia graeca sit, ni partem maxumam
Existumarem scire vostrum, id dicerem:
10 Nunc, quamobrem has partes didicerim, paucis
dabo.
Oratorem esse voluit me, non prologum;
Vostrium iudicium fecit, me actorem dedit,
Si hic actor tantum poterit a facundia,
Quantum ille potuit cogitare commode,
15 Qui orationem hanc scripsit, quam dicturus sum.
Nam quod rumores distulerunt malevoli,
Multas contaminasse Graecas, dum facit
Paucas Latinas, factum id esse hic non negat
Neque se pigere et deinde facturum autumat:
20 Habet bonorum exemplum, quo exemplo sibi
Licere id facere, quod illi fecerunt, putat.
Tum, quod malevolus vetus poëta dictitat,
Repente ad studium se adplicasse hunc musicum,
Amicum ingenio fretum, haut natura sua,
25 Arbitrium vostrum, vostra existumatio,

- Valebit. Quare omnes vos oratos volo,
 Ne plus iniquum possit quam aequum oratio.
 Facite aequi sitis! date crescendi copiam,
 Novarum qui spectandi faciunt copiam
 30 Sine vitiis: ne ille pro se dictum existimet,
 Qui nuper fecit servo currenti in via
 Decesse populum. cur insano hic serviat?
 De illius peccatis plura dicet, cum dabit
 Alias novas, nisi finem maledictis facit.
 35 Adeste aequo animo! date potestatem mihi,
 Statariam agere ut liceat per silentium,
 Ne semper servos currens, iratus senex,
 Edax parasitus, sycophanta autem impudens,
 Avarus leno, adsidue agendi sint mihi
 40 Clamore summo, cum labore maximo.
 Mea causa, causam hanc iustam esse, animum in-
 ducite,
 Vt aliqua pars laboris minuatur mihi:
 Nam nunc novas qui scribunt, nil parcunt seni:
 Si quae laboriosa est, ad me curritur;
 45 Si lenis est, ad alium desertur gregem.
 In hac est pura oratio: experimini,
 In utramque partem ingenium quid possit meum.
 Si nunquam avare pretium statui arti meae,
 Et eum esse quaestum in animum induxi maxu-
 mum,
 50 Quam maxime servire vestris commodis,
 Exemplum statuite in me, ut adolescentuli
 Vobis placere studeant potius quam sibi.

CHREMES. MENEDEMVS.

CHREMES.

Quanquam haec inter nos nuper notitia admo-
 dum est, I. 1.
 Inde adeo quod agrum in proximo hic mercatus es,
 Nec

- Nec re fere sane amplius quidquam fuit,
Tamen vel virtus tua me, vel vicinitas,
5 Quod ego in propinqui parte amicitiae puto,
Facit, ut te audacter moneam et familiariter,
Quod mihi videre praeter aetatem tuam
Facere et praeter quam res te adhortatur tua.
Nam, prohi deum atque hominum fidem, quid vis
tibi?
- 10 Quid quaeris? annos sexaginta natus es
Aut plus, ut coniicio; agrum in his regionibus
Meliozem, neque preti maioris, nemo habet;
Servi complures: — proinde quasi nemo siet,
Ita tute attente illorum officia fungere.
- 15 Nunquam tam mane egredior neque tam vesperi
Domum revortor, quin te in fundo conspicer
Fodere aut arare aut aliquid facere denique;
Nullum remittis tempus neque te respicis.
Haec non voluptati esse, satis certo scio.
- 20 At dices enim: Me quantum hic fiat, poenitet. —
Quod in opere faciundo operae consumis tuae,
Si in illis exercendis sumas, plus agas.

MENEDEMVS.

Tantumne ab re tua tibi est oti, Chreme,
Aliena ut cures ea, quae nihil ad te attinent?

CHREMES.

- 25 Homo sum: humani nihil a me alienum puto.
Vel me monere hoc vel percontari puta,
Rectum est? ut faciam, non est? te ut deterream.

MENEDEMVS.

Mihi sic est usus; tibi ut opus facto est, face.

CHREMES.

An cuiquam est usus homini, se ut cruciet?

MENEDEMVS.

Mihi.

CHREMES.

- 30 Si quid laboris, nollem. Set quid istuc mali est?
Quaeso, quid de te tantum meruisti?

L

MENEDEMVS.

Oi, eī!

CHREMES.

Ne lacruma atque istuc, quidquid est, fac me ut
sciam;

Ne retice; ne verere; crede, inquam mihi:
Aut consolando aut consilio aut re iuvero.

MENEDEMVS.

35 Scire hoc vis?

CHREMES.

Hac quidem causa, qua dixi tibi.

MENEDEMVS.

Dicetur.

CHREMES.

At istos rastros interea tamen

Adpone! ne labora!

MENEDEMVS.

Minime.

CHREMES.

Quam rem agis?

MENEDEMVS.

Sine me, vacivom tempus ne quod dem mihi
Laboris.

CHREMES.

Non sinam, inquam.

MENEDEMVS.

Ali non aequom facis.

CHREMES.

40 Hui, tam graves hos, quaeso!

MENEDEMVS.

Sic meritum est ipeum.

CHREMES.

Nunc loquere.

MENEDEMVS.

Filium unicum adolescentulum

Habeo — at quid dixi habere me? imo habui.

Chreme;

Nunc, habeam necne, incertum est.

CHREMES.

Quid ita istuc?

MENEDEMVS.

Scies.

Est e Corintho hic advena anus paupercola;

45 Eius filiam ille amare coepit perditę,

Pro uxore ut haberet iam prope. Haec clam me
omnia.

Vbi rem rescivi, coepi non humanitus,

Neque ut animum decuit aegrotum adolescentuli,

Tractare, set via pro volgata patrum:

50 Quotidie accusabam: Hem, tibine haec diutius

Licere speras facere me vivo patre,

Amicam ut habeas prope iam in uxoris loco?

Erras, si id credis, et me ignoras, Clinia:

Ego te meum esse dici tantisper volo,

55 Dum, quod te dignum est, facies; set si id non
facis,

Ego, quod me in te sit dignum facere, invenero.

Nulla adeo ex re istuc nimio nisi sit otio.

Ego istuc aetatis non operam amori dabam,

Set Asiam propter pauperiem hinc abii atque ibi

60 Simul remque et belli gloriam armis repperi.

Postremo adeo res rediit: adolescentulus

Saepe eadem et graviter audiendo victus est:

Putavit, me et aetate et benevolentia

Plus scire et providere quam se ipsum sibi:

65 In Asiam ad regem militatum abiit, Chreme.

CHREMES.

Quid ais?

MENEDEMVS.

Profectus clam me est; menses tres abest.

CHREMES.

Ambo accusandi; etsi illud inceptum tamen

Pudentis animi est signum et non instrenui.

MENEDEMVS.

Vbi comperi ex iis, qui fuere ei conscii,

70 Domum revortor moestus atque animo fere

- Conturbato atque incerto prae aegritudine.
 Adsido; adcurrunt servi, soccos detrahunt;
 Inde alii festinare, lectos sternere,
 Coenam adparare; pro se quisque sedulo
- 75 Faciebant, quo illam mihi lenirent miseriam.
 Vbi video haec, coepi cogitare: Hem, tot mea
 Solius sint solliciti, me unum ut expleant,
 Ancillae tot me vestiant, sumtus domi
 Tantos faciam ego solus, si gnatum unicum,
- 80 Quem pariter uti his decuit aut etiam amplius,
 Quod illa aetas magis ad utenda haec idonea est,
 Eum ego hinc eieci miserum iniustitia mea?
 Malo quidem me dignum quovis deputem,
 Si id faciam: nam, usque dum ille vitam illam
 colet,
- 85 Patria carens, inops, ob meas iniurias,
 Interea usque illi de me supplicium dabo,
 Laborans, quaerens, parcens, illi serviens.
 Ita facio prorsus, nil relinquo in aedibus,
 Nec vas nec vestimentum; contrasi omnia;
- 90 Ancillas, servos, nisi eos, qui opere rustico
 Faciundo facile sumtum exsercirent suum,
 Omnes produxi ac vendidi; inscripsi illico
 Aedes mercede; quasi talenta ad quindecim
 Coegi; agrum hunc mercatus sum; hic me exerceo:
- 95 Decrevi, tantisper me minus iniuriae,
 Chreme, meo gnato facere, dum sum miser,
 Nec fas esse, ulla me voluptate hic frui,
 Nisi ubi ille huc salvos redierit, meus particeps.
- CHREMES.
- Ingenio te esse in liberos leni puto et
- 100 Illum obsequentem, si quis recte aut commode
 Tractaret; verum neque illum tu satis noveras,
 Nec te ille. Hoc ubi sit, ibi non vere vivitur.
 Tu nunquam illum ostendisti quanti penderes,
 Nec tibi ille est ausus credere, quae est aequom
 patri;
- 105 Quod si esset factum, haec nunquam evenissent tibi.

MENEDEMVS.

Ita res est, fateor; peccatum a me maxume est.

CHREMES.

Menedeme, at portō recte spero, et eum tibi
Salvom adfuturum esse hic confido propediem.

MENEDEMVS.

Vtinam di faxint!

CHREMES.

Facient. Nunc, si commodum est
110 (Dionysia hic sunt hodie), apud me sis volo.

MENEDEMVS.

Non possum.

CHREMES.

Cur non? quaeso, tandem aliquantulum
Tibi parce! idem absens facere te hoc volt filius.

MENEDEMVS.

Non convenit, qui illum ad laborem impellerem,
Nunc me ipsum fugere.

CHREMES.

Siccine est sententia?

MENEDEMVS.

115 Sic.

CHREMES.

Bene vale.

MENEDEMVS.

Et tu.

CHREMES.

Lacrimas excussit mihi,
Miseretque me eius. — Set, diei ut tempus est,
Monere oportet me hunc vicinum Phanium,
Ad coenam ut veniat. Ibo, visam, si domi est. —
Nil opus fuit monitore: iamdudum domi
120 Praesto mi esse aiunt; egomet convivas moror:
Ibo adeo hinc intro. Set quid crepuerunt fores
Hinc a me? quisnam egreditur? huc concessero.

CLITIPHO. CHREMES.

CLITIPHO.

Nihil adhuc est quod vereare, Clinia: haudqua-
quam etiam cessant, I. 2.

Et illam simul cum nuntio tibi hodie ego hic scio
adfuturam:

125 Proin tu sollicitudinem istam falsam, quae te ex-
cruciat, mittas.

CHREMES.

Quicum loquitur filius?

CLITIPHO.

Pater adest, quem volui: adibo. — Pater, oppor-
tune advenis.

CHREMES.

Quid id est?

CLITIPHO.

Hunc Menedemum nosti, nostrum vicinum?

CHREMES.

Probe.

CLITIPHO.

Huic filium scis esse?

CHREMES.

Audivi, in Asia eum esse.

CLITIPHO.

Non, pater;

130 Apud nos est.

CHREMES.

Quid ais?

CLITIPHO.

Advenientem e navi egredientem illico
Abduxi ad coenam; nam mihi cum eo iam inde
usque a pueritia

Semper fuit familiaritas.

CHREMES.

Voluptatem magnam nuntias.

Quam vellem Menedemum invitatum, ut nobiscum
esset, amplius,

Vt hanc laetitiam nec opinanti primus obiicerem
domi.

135 Atque etiam nunc satis tempori est.

CLITIPHO.

Cave faxis: non opus, pater.

CHREMES.

Quapropter?

CLITIPHO.

Quia enim incertum est etiam, quid se
faciat: modo venit;

Timet omnia, patris iram, et animum amicae se
erga ut sit suae;

Eam misere amat, propter eam haec turba atque
abitio evenit.

CHREMES.

Scio.

CLITIPHO.

Nunc servolum ad eam in urbem misit et ego
nostrum una Syrum.

CHREMES.

140 Quid narrat?

CLITIPHO.

Quid ille? miserum se esse.

CHREMES.

Miserum? quem minus credere est?

Quid reliquii est quin habeat, quae quidem in ho-
mine dicuntur bona,

Parentes, patriam incolumem, amicos, genus, cog-
natos, divitias?

At haec perinde sunt, illius ut animus, qui ea
possidet,

Qui uti scit, ei bona, illi, qui non utitur recte,
mala.

CLITIPHO.

145 Imo importunus semper fuit senex ille, et nunc
nil magis

Vereor, quam, ne quid in illum iratus plus satis
faxit, pater.

CHREMES.

Illene? — Set reprimam me: nam metuisse hunc,
illi est utile.

CLITIPHO.

Quid tute tecum?

CHREMES.

Dicam: utut erat, mansum tamen oportuit.
Fortasse aliquanto iniquior erat praeter eius lubi-
dinem?

150 Pateretur: nam quem ferret, si parentem non fer-
ret suum?

Huncine erat aequom ex illius more an illum ex
huius vivere?

Et quod illum insimulat durum, id non est: nam
parentum iniuriae

Huiusmodi sunt ferme, paulo qui est homo tole-
rabilis:

Scortari crebro nolunt, nolunt crebro convi-
varier,

155 Praebent exigue sumtum; atque haec sunt tamen
ad virtutem omnia:

Verum animus ubi semel se cupiditate devinxit
mala,

Necesse est, Clitipho, consilia consequi consimilia.
Scitum est, periculum ex aliis facere, tibi quod ex
usu siet.

CLITIPHO.

Ita credo.

CHREMES.

Ego ibo hinc intro, ut videam coenae
quid nobis siet.

160 Tu, ut tempus est diei, vide sis, ne quo hinc abeas
longius.

CLITIPHO.

Quam iniqui sunt patres in omnes adolescentes
iudices,

Qui aequom esse censent, nos iam a pueris illico
nasci senes,

Neque illarum adfines esse rerum, quas fert adole-
scentia!

Ex sua lubricine moderantur, nunc quae est, non
quae olim fuit.

165 Mihi si unquam filius erit, nae ille facili me ute-
tur patre:

Nam et cognoscendi et ignoscendi dabitur peccati
locus,

Non ut meus, qui mihi per alium ostendit suam
sententiam.

Perii, is mi ubi adbibit plus paulo, sua quae nar-
rat facinora!

Nunc ait: periculum ex aliis facito, tibi quid ex
usu siet,

170 Astutus! Nae ille haud scit, quam mihi nunc surdo
narret fabulam.

Magis nunc me dicta amicae stimulant: „Da mihi!”
atque: „Adfer mihi!”

Cui, quod respondeam, nil habebo, neque me
quisquam est miserior.

Nam hic Clinia, etsi is quoque suarum rerum sat
agitat, tamen

Pudice eductam et artis habet ignarurem mere-
triciae;

175 Mea est potens, procax, magnifica, sumtuosa, no-
bilis;

Tum, quod dem, — recte est („nihil” enim esse,
religio est mihi dicere). —

Hoc ego mali non pridem inveni, neque etiam
dum scit pater.



CLINIA. CLITIPHO.

CLINIA.

Secundae si de amore meo res mi essent, iam-
dudum, scio, II. 1.

Venisset; set vereor, ne mulier, me absente hinc,
corrupta sit.

180 Concurrunt multa, opinionem quae mi hanc ni-
mum exaugeant:

Occasio, locus, aetas, mater, cuius sub imperio
est, mala,

Cui nil iam praeter pretium dulce est.

CLITIPHO.

Clinia,....

CLINIA.

Hei misero mihi!

CLITIPHO.

Etiam caves, ne videat forte hic te a patre ali-
quis exiens?

CLINIA.

' Faciam. Set nescio quid profecto mi animus prae-
sagit mali.

CLITIPHO.

185 Pergisne id prius diiudicare, quam scias, quid re-
siet?

CLINIA.

Si nil mali esset, iam hic adesset.

CLITIPHO.

Iam aderit.

CLINIA.

Quando istuc erit?

CLITIPHO.

Non cogitas, hinc longule esse, et nosti mores
mulierum:

Dum moliantur, dum conantur, annus est.

CLINIA.

O Clitipho.

Timeo.

CLITIPHO.

Respira: eccum Dromonem cum Syro! una
adsunt tibi!

SYRVS. DROMO. CLINIA.
CLITIPHO.

SYRVS.

190 Ain' tu?

DROMO.

Sic est. Verum interea dum sermones
caedimus, II. 2.

Illae sunt relictæ.

CLITIPHO.

Mulier tibi adest. Audin', Clinia?

CLINIA.

Ego vero audio nunc demum et video et valeo,
Cliupho.

SYRVS.

Minime mirum: adeo impeditæ sunt: ancillarum
gregem

Ducunt secum.

CLINIA.

Perii, unde illi sunt ancillæ?

CLITIPHO.

Men' rogas?

SYRVS.

195 Non oportuit relictas, portant quod rerum,....

CLINIA.

Hei mihi!

SYRVS.

Aurum, vestem; et vesperascit; et non noverunt
viam.

Factum a nobis stulte est: abi dum tu, Dromo,
illis obviam!

Propera! quid stas?

CLINIA.

Vae mihi misero! quanta de spe decidi!

CLITIPHO.

Quid istuc? quae res te sollicitat autem?

CLINIA.

Rogitas, quid siet?

200 Viden' ancillas, aurum, vestem, quam ego cum
una ancillula

Hic reliqui? unde esse censes?

CLITIPHO.

Vali, nunc demum intelligo.

SYRVS.

Di boni, quid turbae est! aedes nostrae vix ca-
pient, scio.

Quid comedent! quid ebibent! quid sene erit no-
stro miserius?

Set eccos video, quos volebam.

CLINIA.

O Iupiter, ubinam est fides?

205 Dum ego propter te, errans, patria careo, de-
mens, tu interea loci

Conlocupletasti, Antiphila, te et me in his dese-
ruisti malis,

Propter quam in summa infamia sum et meo pa-
tri minus obsequens,

Cuius nunc pudet me et miseret, qui harum mo-
res cantabat mihi,

Monnisse frustra neque potuisse me unquam ab
hac expellere;

210 Quod iam nunc faciam, tum, cum gratum mi esse
potuit, nolui.

Me miserior nemo!

SYRVS.

Hic de nostris verbis errat videlicet.

Quae hic sumus locuti. — Clinia, aliter tuum amo-
rem atque est accipis:

Nam et vita est eadem et animus te erga idem
ac fuit,

Quantum ex ipsa re coniecturam cepimus.

CLINIA.

215 Quid id obsecro, est? nam mihi nunc nil rerum
omnium est

Quod malim, quam, me hoc falso suspicarier.

SYRVS.

Hoc primum, ut ne quid huius ignores: anus,

Quae dicta ei esse mater antehac, non fuit.

Ea obiit mortem; hoc ipsa in itinere alterae

220 Dum narrat forte audiui.

CLITIPHO.

Quaenam est altera?

SYRVS.

Mane: hoc, quod coepi, primum enarrem, Cli-
tipho;

Post illuc veniam.

CLITIPHO.

Propera.

SYRVS.

Iam primum omnium,

Vbi ventum ad aedes, pulsitat Dromo fores;

Anus quaedam prodit; haec ubi aperuit ostium,

225 Continuo hic se intro coniicit; ego consequor;

Anus foribus obdit pessulum, ad lanam redit.

Hic sciri potuit aut nusquam alibi, Clinia,

Quo studio vitam suam te absente exegerit,

Vbi de improvise est interventum mulieri:

230 Nam ea tum res dedit existumandi copiam

Quotidianae vitae consuetudinem,

Quae, cuiusque ingenium ut sit, declarat maxume.

Texentem telam studiose ipsam offendimus,

Mediocriter vestitam veste lugubri,

235 Eius annis causa, opinor, quae erat mortua,

Sine auro; tum ornatam ita uti quae ornantur
sibi,

Nullaque malaca re expolitam muliebri;

Capillus passus, prodigus, circum caput
Reiectus negligenter.

CLINIA.

Pax, Syre mi, obsecro,

240 Ne me in laetitiam frustra coniicias!

SYRVS.

Anus

Subtremen nebat; praeterea una ancillula
Erat; ea texebat una, pannis obsita,
Neglecta, immunda inlue.

CLITIPHO.

Vera haec, Clinia,

Si sunt, ut credo, quis te fortunatior?

245 Scin' tu hanc, quam dicit sordidatam sordidae?

Magnum hoc quoque signum est, dominam esse
extra noxiam,

Cum negliguntur eius internuntii:

Nam disciplina est eisdem, munerarier

Ancillas primum, ad dominas qui adfectant viam.

CLINIA.

250 Perge, obsecro te, et cave, ne falsam gratiam

Studeas inire. Quid ais, ubi me nominas?

SYRVS.

Vbi dicimus, rediisse te et rogare, uti

Ventret ad te, mulier telam desinit

Continuo et lacrumis opplet os totum, tuo

255 Vt facile scires desiderio id fieri.

CLINIA.

Prae gaudio, ita me di ament, ubi sim, nescio:

Ita timui.

CLITIPHO.

At nil ego esse scibam, Clinia.

Agedum vicissim, Syre, dic, quae illa est altera?

SYRVS.

Adducimus tuam Bacchidem.

CLITIPHO.

Hem, quid? Bacchidem?

260 Eho, scelestes, quo illam adducis?

SYRVS.

Quo illam ego? ad nos scilicet.

CLITIPHO.

Ad patremne?

SYRVS.

Ad eum ipsum.

CLITIPHO.

O hominis impudentem audaciam!

SYRVS.

Heus tu,

Non fit sine periclo facinus magnum nec memorabile.

CLITIPHO.

Hoc vide! in mea vita tu tibi laudem is quaesitum, scelus,

Vbi, si te quid paululum modo fugerit, ego perierim? —

265 Quid illo facias?

SYRVS.

At enim....

CLITIPHO.

Quid enim?

SYRVS.

Si sinis, dico.

CLINIA.

Sine.

CLITIPHO.

Sino.

SYRVS.

Ita res est haec nunc, quasi cum....

CLITIPHO.

Quas, malum, ambages mihi

Narrare occipit?

CLINIA.

Syre, verum hic dicit: mitte; ad rem redi.

SYRVS.

Enimvero reticere nequeo. Multimodis iniurius

Es neque ferri potis es.

СЛІПНО.

Quid id est?

CLINIA.

Audiundum hercle est: tace.

SYRVS.

270 Vis amare; vis potiri; vis, quod des illi, effici;
Tum, esse in potiundo periculum, non vis. Haut
stulte sapis,

Siquidem id sapere est, velle te id, quod non
potest contingere.

Aut haecce cum illis sunt trahenda, aut illa cum
his mittenda sunt:

Harum duarum conditionum nunc utram malis,
vide;

275 Etsi consilium hoc, quod cepi, rectum esse ac
tutum scio;

Nam apud patrem amica tecum ut sine metu sit,
copia est;

Tum, quod illi argentum es pollicitus, eadem hac
inveniam via,

Quod ut efficerem, orando surdas iam aures reddideras mihi.

Quid aliud tibi vis?

СЛІПНО.

Siquidem hoc fit.

SYRVS.

Siquidem, experiundo scies.

CLITIPHO.

280 Age, age, cedo istuc tuum consilium! quid id est?

S Y R V S.

Adsimulabimus,

Tuam amicam huius esse.

CLITIPHO.

Pulchre! cedo, quid hic faciet sua?

Eane quoque dicetur huius, si una haec dedecori
est parum?

Syrus.

Ino ad matrem deducetur.

C L I -

CLITIPHO.

Quid eo?

SYRVS.

Longum est, Clitipho.

Tibi si narrem, quamobrem id faciam; verum
causa est.

CLITIPHO.

Fabulae!

285 Nil satis firmi video, quamobrem accipere hunc
mi expediat metum.

SYRVS.

Mane, aliud habeo, si istuc metuis, quod ambo
confiteamini

Sine periclo esse.

CLITIPHO.

Istiusmodi, obsecro, aliquid reperi.

SYRVS.

Maxume:

Ibo obviam huic; dicam, ut revortatur domum.

CLITIPHO.

Hem,

Quid dixti?

SYRVS.

Ademtum tibi iam faxo omnem metum,
290 In aurem utramvis otiose ut dormias.

CLITIPHO.

Quid ago nunc?

CLINIA.

Tune? quod boni....

CLITIPHO.

Syre, dic modo...! —

Verum.

SYRVS.

Age modo: hodie sero ac nequidquam voles.

CLINIA.

Datur, fruire, dum licet: nam nescias,....

CLITIPHO.

Syre, inquam!

M

SYRVS.

Perge porro; tamen istuc ago.

CLINIA.

295 Eius sit potestas posthac an nunquam tibi.

CLITIPHO.

Verum hercle istuc est. — Syre, Syre, inquam!
heus, heus, Syre!

SYRVS.

Concaluit. — Quid vis?

CLITIPHO.

Redi, redi!

SYRVS.

Adsum: dic, quid est?

Iam hoc quoque negabis tibi placere?

CLITIPHO.

Imo, Syre,

Et me et meum amorem et famam permitto tibi:

300 Tu es iudex: ne quid accusandus sis, vide.

SYRVS.

Ridiculum, te istuc me admonere, Clitipho,

Quasi mea res istic minor agatur, quam tua! Hic

Advorsi si quid nobis forte evenerit,

Tibi erunt parata verba, huic homini verbera.

305 Quapropter haec res ne utiquam neglectu est mihi;

Set istunc exora, ut suam esse adsimulet.

CLINIA.

Scilicet

Facturum me esse: in eum iam res rediit locum,

Necesse uti sit.

CLITIPHO.

Merito te amo, Clinia.

CLINIA.

Verum illa ne quid titubet.

SYRVS.

Perdocta est probe.

CLITIPHO.

310 At hoc demiror, qui tam facile potueris

Persuadere illi, quae solet quos! spernere.

SYRVS.

In tempore ad eam veni, quod rerum omnium
est

Primum: nam quendam miserum offendi ibi mi-
litem

Eius noctem orantem; haec arte tractabat virum,
315 Vt cupidum illius inopia animum incenderet,
Eademque ut esset apud te quam gratissima.
Set heus tu, vide sis, ne quid imprudens ruas!
Patrem novisti, ad has res quam sit perspicax;
Ego te autem novi, quam esse soleas impotens.

320 Inversa verba, eversas cervices tuas,

Gemitus, screatus, tusses, risus, abstine!

CLITIPHO.

Laudabis.

SYRVS.

Vide sis!

CLITIPHO.

Tutemet mirabere.

SYRVS.

Set quam cito sunt consecutae mulieres!

CLITIPHO.

Vbi sunt? — cur retines?

SYRVS.

Iam nunc haec non est tua.

CLITIPHO.

325 Scio, apud patrem; at nunc interim....

SYRVS.

Nihilo magis.

CLITIPHO.

Sine!

SYRVS.

Non sino, inquam.

CLITIPHO.

Quaeso, paulisper!

SYRVS.

Veto.

CLITIPHO.

Saltem salutare!

SYRVS.

Abeas, si sapias.

CLITIPHO.

Eo.

Quid istic?

SYRVS.

Manebit.

CLITIPHO.

O hominem felicem!

SYRVS.

Ambula.

BACCHIS. ANTIPHILA. CLINIA.
SYRVS.

BACCHIS.

Edepol te, mea Antiphila, laudo et fortunatam
iudico, II. 3.

330 Id cum studuisti, illi formae ut mores consimiles
forent;

Minumque, ita me di ament, miror, te sibi quis-
quam si expetit:

Nam mihi, quale ingenium haberes, fuit indicio
oratio;

Et cum egomet nunc mecum in animo vitam tuam
considero

Omniumque adeo vostrarum, volgas quae ab se
segregant,

335 Vos esse istiusmodi et nos non esse, haut mira-
bile est:

Nam expedit bonis esse vobis; nos, quibuscum est
res, non sinunt:

Forma quippe impulsus nostra nos amatores co-
lunt;

Haec ubi immutata est, illi suum animum alio conferunt;

Nisi si prospectum aliquid interea est, desertae vivimus:

340 Vobis cum uno semel ubi aetatem agere decretum est viro,

Cuius mos maxume est consimilis vostrum, hi se ad vos adplicant:

Hoc beneficio utrique utrisque vero devincimini,
Nulla ut unquam amoris vestro incidere possit calamitas.

ANTIPHILA.

Nescio alias; me quidem semper scio fecisse sedulo, ut

345 Ex illius commodi mei compararem commodum.

CLINIA.

Ah!

Ergo, mea Antiphila, tu nunc sola reducem me in patriam facis:

Nam dum absum, mihi labores fuerunt omnes, quos cepi, leves,

Praeterquam, tui carendum quod erat.

SYRVS.

Credo.

CLINIA.

Syre, vix suffero!

Hocce me miserum non licere meo modo ingenium frui?

SYRVS.

350 Imo, ut patrem tuum vidi ex habitu tuo, etiam se durum dabit.

BACCHIS.

Quisnam hic adolescens est, qui intuitur nos?

ANTIPHILA.

Ah, retine me, obsecro!

BACCHIS.

Amabo, quid tibi est?

ANTIPHILA.

Disperii! perii misera!

BACCHIS.

Quid stupes,

Antiphila?

ANTIPHILA.

Videon' Cliniam, annon?

BACCHIS.

Quem vides?

CLINIA.

Salve, anime mi!

ANTIPHILA.

O mi expectate Clinia, salve!

CLINIA.

Vt vales?

ANTIPHILA.

355 Salvom venisse gaudeo.

CLINIA.

Teneone te,

Antiphila, maxume animo exoptatam meo?

SYRVS.

Ite intro: nam vos iamdudum expectat senex.

CHREMES.

Luciscit hoc iam: cesso pultare ostium III. 1.

Vicini, ut primum ex me sciat, sibi filium

360 Rediisse? etsi adolescentem hoc nolle intelligo:

Verum cum videam, miserum hunc tam cruciarier

Eius abitu, celem tam insperatum gaudium,

Cum illi periculi nihil ex indicio siet?

Haud faciam: nam, quod potero, adiutabo senem,

365 Ita ut filium meum amico atque aequali suo

Video inservire et socium esse in negotiis:

Nos quoque senes est aequom senibus obsequi. —

MENEDEMVS. CHREMES.

MENEDEMVS.

Aut ego profecto ingenio egregie ad miseriam III. 2.

Natus sum, aut illud falsum est, quod volgo audio,

370 Die diem adimere aegritudinem hominibus:

Nam mihi quidem quotidie augescit magis

De filio aegritudo, et quanto diutius

Abest, mage cupio tanto et mage desidero.

CHREMES.

Set ipsum foras egressum video: ibo, adloquar.

575 Menedeme, salve! nuntium adporto tibi,

Cuius maxime participem te fieri cupis.

MENEDEMVS.

Num quidnam de gnato meo audisti, Chreme?

CHREMES.

Valet atque...

MENEDEMVS.

Vivit? Vbinam est, quaeso?

CHREMES.

Apud me domi.

MENEDEMVS.

Meus gnatus....

CHREMES.

Sic est.

MENEDEMVS.

Venit?

CHREMES.

Certe.

MENEDEMVS.

Clinia

580 Mens venit?

CHREMES.

Dixi.

MENEDEMVS.

Eamus! duc me ad eum, obsecro!

CHREMES.

Non volt te scire, se redisse, etiam et tuum

Conspectum fugitat: propter peccatum hoc timet,
Tua duritia illa antiqua ne etiam adaucta sit.

MENEDEMVS.

Non tu ei dixisti, ut essem?

CHREMES.

Non.

MENEDEMVS.

Quamobrem, Chreme?

CHREMES.

385 Quia pessume istuc in te atque illum consulis,
Si te tam leni et victo esse animo ostenderis.

MENEDEMVS.

Non possum! satis iam, satis, pater durus fui!

CHREMES.

At

Vehemens utramque in partem, Menedeme, es
nimis

Aut largitate nimia aut parsimonia;

390 In eandem fraudem ex hac re atque illac incides.
Primum olim, potius quam patere filium
Commetare ad mulierculam, quae paululo
Contenta tum erat cuique erant grata omnia,
Proterruisti hinc: ea, coacta, ingratiis

395 Postilla coepit victum volgo quaerere; —
Nunc, cum sine magno intertrimento non potest
Haberī, quidvis dare cupis. Nam, ut tu scias,
Quam ea nunc instructa pulchre ad perniciem siet,
Primum iam ancillas secum adduxit plus decem,
400 Ornatas veste atque auro: satrapa si siet
Amator, nunquam sufferre eius sumtus queat,
Nedum tu possis.

MENEDEMVS.

Estne ea intus?

CHREMES.

Sit, rogas?

Sensi! namque unam ei coenam atque eius co-
mitibus

Dedi, quae si iterum mihi sit danda, actum siet:

405 Nam ut alia omittam, pytissando modo mihi
Quid vini absuñsit: „Sic hoc!” dicens; „Aspe-
rum,

Pater, hoc est; aliud lenius, sodes, vide!” —

Relevi dolia omnia, omnes serias;

Omnes habui sollicitos; atque haec una nox:

410 Quid te futurum censes, quem adsidue exedent?
Sic me di amabunt, ut me tuarum miseritum est,
Menedeme, fortunarum!

MENEDEMVS.

Faciat, quod lubet,

Sumat, consumat, perdat: decretum est pati,

Dum illum modo habeam mecum.

CHREMES.

Si certum est tibi

415 Sic facere, illuc permagni referre arbitror,
Vt ne scientem sentiat te id sibi dare.

MENEDEMVS.

Quid faciam?

CHREMES.

Quidvis potius quam quod cogitas:

Per alium quemvis ut des, falli te sinas

Technis per servolum (etsi subsensi id quoque,

420 Illos ibi esse, id agere inter se clanculum;

Syrus cum vostro consusurrant, conferunt

Consilia ad adolescentes); et tibi perdere

Talentum hoc pacto satius est, quam illo minam.

Non nunc pecunia agitur, set illud, quomodo

425 Minimo periclo demus adolescentulo:

Nam si semel tuum animum ille intellexerit,

Prius proditurum vitam te tuam et prius

Pecuniam omnem quam abs te amittas filium, hui,

Quantam fenestram ad nequitiam ei patefeceris,

430 Tibi autem porro ut non sit suave vivere!

Nam deteriores omnes sumus licentia.

Quodcunque in mentem inciderit, id volet, petet,

Neque id putabit pravomne an rectum siet;

Tu rem perire et ipsum non poteris pati,

435 Dare denegaris: ad illud ibit illico,
 Quo maxime apud te se valere sentiet:
 Abiturum se abs te scilicet minitabitur.

MENEDEMVS.

Videre verum atque ita uti res est dicere.

CHREMES.

Somnum hercle ego hac nocte oculis non vidi
 meis,

440 Dum id quaero, tibi qui filium restituerim. —

MENEDEMVS.

Cedo dextram! porro idem te oro ut facias,
 Chreme.

CHREMES.

Paratus sum.

MENEDEMVS.

Scin', quid nunc facere te volo?

CHREMES.

Dic.

MENEDEMVS.

Quod sensisti, illos me incipere fallere,
 Id ut maturent facere: cupio illi dare,
 445 Quod volt; cupio ipsum iam videre.

CHREMES.

Operam dabo.

Paulum hoc negoti mi obstat: Simus et Crito,
 Vicini nostri lice, ambigunt de finibus;
 Me cepere arbitrum: ibo ac dicam, ut dixeram,
 Operam daturum me, hodie non posse iis dare.
 450 Continuo hic adero.

MENEDEMVS.

Ita quaeso. — Di, vostram fidem!

Ita comparatam esse hominum naturam omnium,
 Aliena ut melius videant et diiudicent,
 Quam sua? an eo sit, quia re in nostra aut gaudio
 Sumus praepediti nimium aut aegritudine?
 455 Hic mihi nunc quanto plus sapit quam egomet
 mihi! —

CHREMES.

Dissolvi me, otiosus operam ut tibi darem.

Syrus adprendendus atque adhortandus mihi.

A me nescio quis exit: concede hinc domum;

Ne nos inter nos congruisse sentiant.

CHREMES. SYRVS.

SYRVS.

460 Hac illac circumcursa, inveniundum es tamen, III. 3.
Argentum! — Intendenda in senem fallacia.

CHREMES.

Num me fefellit, hosce id struere? videlicet

Est Cliniae ille servos tardiusculus:

Idcirco huic nostro tradita est provincia.

SYRVS.

465 Quis hic loquitur? — perii! numnam hic audivit?

CHREMES.

Syre!

SYRVS.

Hem!

CHREMES.

Quid tu istic?

SYRVS.

Recte. Set te demiror, Chreme,

Tam mane, qui heri tantum biberis.

CHREMES.

Nil minus.

SYRVS.

Nil, narras? visa vero est, quod dici solet,

Aquilae senectus.

CHREMES.

Heia!

SYRVS.

Mulier commoda et

470 Faceta haec meretrix....

CHREMES.

Sane quidem.

SYRVS.

Visa est mihi et

Forma quidem hercle luculenta.

CHREMES.

Sic; satis.

SYRVS.

Ita, non ut olim, set uti nunc, sane bonâ;

Minumeque miror, Clinia hanc si deperit.

Set patrem habet quendam avidum misereque ari-
dum,

475 Vicinum hunc. Nostin'?

CHREMES.

At quasi.

SYRVS.

Is nunc divitiis

Abundat, gnatus eius profugit inopia.

Scis esse factum, ut dico?

CHREMES.

Quid ego nesciam?

Hominem pistrino dignum....

SYRVS.

Quem?

CHREMES.

Istunc servolum

Dico adolescentis,....

SYRVS.

Syre, tibi timui male!

CHREMES.

480 Qui passus est, id fieri.

SYRVS.

Quid faceret?

CHREMES.

Rogas?

Aliquid reperiret, fingeret fallacias,

Vnde esset adolescenti, quod amicae daret,

Atque hunc difficilem invitum servaret senem.

SYRVS.

Garris.

CHREMES.

Haec facta ab illo oportebat, Syre.

SYRVS.

485 Eho laudas, quaeso, heros qui fallunt?

CHREMES.

In loco

Ego vero laudo.

SYRVS.

Recte sane.

CHREMES.

Quippequi

Magnarum saepe id remedium aegritudinum est.

Iam primum huic gnatus unicus mansisset doñi....

SYRVS.

Iocone an serio ille haec dicat, nescio,

490 Nisi mihi quidem addit animum, quo lubeat magis.

CHREMES.

Et nunc quid expectat, Syre? an, dum hinc denuo

Abigat, cum tolerare illius sumtus non queat?

Nonne ad senem aliquam fabricam fingit?

SYRVS.

Stolidus est.

CHREMES.

At te adiutare oportet, adolescentuli

495 Causa.

SYRVS.

Facile equidem facere possum, si iubes:

Etenim, quo pacto id fieri soleat, calleo.

CHREMES.

Tanto hercle melior.

SYRVS.

Non est mentiri meum.

CHREMES.

Fac ergo.

SYRVS.

At heus tu, facitodum eadem haec memineris,

Si huius quid forte simile aliquando evenerit,
 500 Humana uti sunt, tuus ut faciat filius.

CHREMES.

Non usus veniet, spero.

SYRVS.

Spero hercle ego quoque,
 Neque eo nunc dico quo quidquam illum sense-
 rim,

Set si quid, ne quid. Quae sit eius aetas, vide,
 Et ne ego te, si usus veniat, magnifice, Chreme,
 505 Tractare possim!

CHREMES.

De istoc, cum usus venerit,
 Videbimus quid opus sit; nunc istuc age. —

SYRVS.

Nunquam commodius quidquam audiui herum
 loqui:

Nunquam malefacere creduam mi impunius
 Licere. — Quisnam a nobis egreditur foras?

CHREMES. CLITIPHO. SYRVS.

CHREMES.

510 Quid istuc, quaeso? qui istic mos est, Clitipho?
 itane fieri oportet? III. 4.

CLITIPHO.

Quid ego feci?

CHREMES.

Vidin' ego te modo manum in sinum
 huic meretrici

Inserere?

SYRVS.

Acta haec res est! perii!

CLITIPHO.

Mene?

CHREMES.

Hisce oculis! ne nega.
Facis adeo indigne iniuriam illi, qui non abstineas
manum:

Nam istaec quidem contumelia est,
515 Hominem amicum recipere ad te atque eius ami-
cam subigitare.

Vel heri in vino quam immodestus fuisti,....

SYRVS.

Factum.

CHREMES.

Quam molestus!
Vt equidem, ita me di ament, metui, quid futu-
rum denique esset!
Novi ego amantes: animum advortunt graviter,
quae non censeas.

CLITIPHO.

At fides mi apud hunc est, nil me istius factu-
rum, pater.

CHREMES.

520 Esto; at certe ut hinc concedas aliquo ab ore eo-
rum aliquantisper:

Multa fert lubido; ea prohibet facere tua prae-
sentia.

De me facio ego coniecturam: nemo amicorum
hodie est,

Apud quem expromere omnia mea occulta, Cliti-
pho, audeam:

Apud alium prohibet dignitas; apud alium ipsius
facti pudet,

525 Ne ineptus, ne protervos, videar. Quod illum fa-
cere credito;

Et nostrum est, intelligere atque, utcunque, ubi-
cunque, opus est, obsequi.

SYRVS.

Quid istic narrat?

CLITIPHO.

Perii!

SYRVS.

Clitipho, haec ego praecipio tibi?
Hominis frugi et temperantis functus officium!

CLITIPHO.

Tace, sodes!

SYRVS.

Recte sane.

CHREMES.

Syre, pudet me.

SYRVS.

Credo, neque id iniuria. Quin
530 Mihi molestum est.

CLITIPHO.

Pergin'?

SYRVS.

Hercle vero. dico, quod videtur.

CLITIPHO.

Nonne accedam ad illos? eho, quaeso!

SYRVS.

Vna accedundi via est....

Actum est! prius hic se indicarit, quam ego ar-
gentum effecero. —

Chreme, vin' tu homini stulto mi auscultare?

CHREMES.

Quid faciam?

SYRVS.

Iube hunc

Abire hinc aliquo.

CLITIPHO.

Quo ego hinc abeam?

SYRVS.

Quo lubet; da illis locum;

535 Abi deambulatum.

CLITIPHO.

Deambulatum? quo?

SYRVS.

Vah, quasi desit locus!

Abi sane istac, istorsum, quo vis.

CHRE-

CHREMES.

Recte dicit; censeo.

CLITIPHO.

Di te eradicent, qui istinc me extrudas, Syre?

SYRVS.

At

Tu pol tibi istas posthac comprimito manus! —

Censen' vero? quid illum porro credis facturum,

Chreme,

540 Nisi eum, quantum tibi opis di dant, servas, castigas, mones?

CHREMES.

Ego istuc curabo.

SYRVS.

Atqui nunc, here, hic tibi adservandus est,...

CHREMES.

Fiet.

SYRVS.

Si sapias: nam mihi iam minus minusque obtemperat.

CHREMES.

Quid tu? ecquid de illo, quod dudum tecum, egisti
etiam, Syre, aut

Reperisti, quod placeat, an nondum etiam?

SYRVS.

De fallacia

545 Dicis? Est inventa nuper quaedam.

CHREMES.

Frugi es! cedo, quid est?

SYRVS.

Dicam; verum, ut aliud ex alio incidit,....

CHREMES.

Quidnam, Syre?

SYRVS.

Pessuma haec est meretrix.

CHREMES.

Ita videtur.

N

SYRVS.

Imo, si scias!

CHREMES.

Vah!

SYRVS.

Hoc vide, quod inceptat facinus! Fuit quaedam
 anus Corinthia

Hic; ei drachmarum haec argenti mille dederat-
 mutuum.

CHREMES.

550 Quid tum?

SYRVS.

Quid? Ea mortua est; est filia ado-
 lescentula;

Ea relicta huic arraboni est pro illo argento.

CHREMES.

Intelligo.

SYRVS.

Hanc secum huc adduxit, eam, quae est nunc apud
 uxorem tuam.

CHREMES.

Quid tum?

SYRVS.

Clinia orat sibi uti nunc det (illam
 illi interim

Praestituram) mille numum; poscit.

CHREMES.

Et exposcet quidem?

SYRVS.

Hui,

555 Dubium id est? Ego sic putavi....

CHREMES.

Quid nunc facere cogitas?

SYRVS.

Egone? ad Menedemum ibo, dicam, hanc esse
 captam e Caria,

Ditem et nobilem; si redierit, magnum inesse in
 eo lucrum.

CHREMES.

Erras.

SYRVS.

Quid ita?

CHREMES.

Pro Menedemo nunc tibi ego respondeo:

Non emo.

SYRVS.

Quid ais? optata loquere!

CHREMES.

Atqui non est opus.

SYRVS.

560 Non opus?

CHREMES.

Non hercle vero.

SYRVS.

Qui istuc, miror.

CHREMES.

Iam scies.

SYRVS.

Mane, mane: quid est, quod tam a nobis graviter
crepuerunt fores?

SOSTRATA. CHREMES. NVTRIX.
SYRVS.

SOSTRATA.

Nisi me animus fallit, hic profecto est anulus,
quem ego suspicor, III. 5.

Is, quicum exposita est gnata.

CHREMES.

Quid volt sibi, Syre, haec oratio?

SOSTRATA.

Quid? isne tibi videtur?

NVTRIX.

Dixi equidem, ubi ostendisti, illico,

565 Eum esse.

SOSTRATA.

At ut satis contemplata modo sis, mea nutrix?

NUTRIX.

Satis.

SOSTRATA.

Abi nunc iam intro atque, illa si iam laverit, mihi
nuntia.

Ego virum hic interea opperibor.

SYRVS.

Te volt: videas, quid velit?

Nescio quid tristis est; non temere est; metuo
quid sit.

CHREMES.

Quid siet?

Nae ista hercle iam magno conatu magnas nugas
dixerit.

SOSTRATA.

570 Ehem, mi vir!

CHREMES.

Ehem, mea uxor!

SOSTRATA.

Te ipsum quaero.

CHREMES.

Loquere, quid velis.

SOSTRATA.

Primum hoc te oro, ne quid credas me advorsum
edictum tuum

Facere esse ausam.

CHREMES.

Vis, me istuc, etsi incredibile est, credere?

Credo.

SYRVS.

Nescio quid peccati portat haec purgatio.

SOSTRATA.

Meministin' me gravidam, et mihi te maximo opere
interminatum,

575 Si puellam parerem, nolle tolli?

CHREMES.

Scio, quid feceris:

Sustulisti.

SYRVS.

Sic si factum est, minor herus damno
auctus est.

SOSTRATA.

Minume; set erat hic Corinthia anus haut impura;
ei dedi

Exponendam.

CHREMES.

O Iupiter, esse tantum in animo in-
scitiam!

SOSTRATA.

Perii, quid ego feci?

CHREMES.

At rogitas?

SOSTRATA.

Si peccavi, mi Chreme,

580 Insciens feci.

CHREMES.

Id quidem ego, si tu neges, certo scio,
Te inscientem et imprudentem dicere ac facere
omnia:Tot peccata in hac re ostendis: nam iam primum,
si meumImperium exsequi voluisses, interemtam oportuit,
Non simulare mortem verbis, re ipsa spem vitae
dare;585 At id omitto: misericordia — animus maternus —
sino:Quam vero abs te bene prospectum est, quod vo-
luisti, cogita:Nempe illi anui prodita abs te filia est planissime,
Per te vel uti quaestum faceret, vel uti veniret
palam.Credo, id cogitasti: quidvis satis est, dum vivat
modo.

590 Quid cum illisce agas, qui neque ius neque bonum atque aequom sciunt?
Melius, peius, prosit, obsit, nil vident nisi quod lubet.

SOSTRATA.

Mi Chreme, peccavi, fateor: vincor. Nunc hoc te obsecro: -

Quanto tu me es annis gravior, tanto es ignoscentior,

Iniustitiae meae ut iustitia tua sit aliquid praesidi!

CHREMES.

595 Scilicet equidem ignoscam istuc factum; verum, Sostrata,

Mala docet mea facilitas te multa. Set istuc, quidquid est,

Qua hoc oceptum est causa, eloquere.

SOSTRATA.

Vt stultae et misere omnes sumus

Religiosae, cum exponendam do illi, de digito anulum

Detraho et eum dico ut una cum puella exponeret,

600 Si moreretur, ne expers esset partis de nostris bonis.

CHREMES.

Istuc recte: conservasti te atque illam.

SOSTRATA.

Hic is anulus.

CHREMES.

Vnde habes?

SOSTRATA.

Quam Bacchis secum adduxit adolescentulam...

SYRVS.

Hem!

CHREMES.

Quid ea narrat?

SOSTRATA.

Ea, lavatum dum it, servandum mihi dedit.

Animum non advorti primum; set postquam ad-
spexi, illico

605 Cognovi, ad te exsilui.

CHREMES.

Quid nunc suspicare aut invenis

De illa?

SOSTRATA.

Nescio, nisi ex ipsa quaeras, unde hunc
habuerit,

Si potis est reperiri.

SYRVS.

Interii! plus spe video, quam volo:

Nostra est, si ita est.

CHREMES.

Vivitne illa, cui tu dederas?

SOSTRATA.

Nescio.

CHREMES.

Quid renunciavit olim?

SOSTRATA.

Fecisse id quod iusseram.

CHREMES.

610 Nomen mulieri cedo quod sit, ut quaeratur.

SOSTRATA.

Philtere.

SYRVS.

Ipsa est! mirum, ni illa salva est et ego perii!

CHREMES.

Sostrata,

Sequere me intro hac.

SOSTRATA.

Vt praeter spem evenit! quam timui male,
Ne nunc animo ita esses duro, ut olim in tollendo,
Chreme!

CHREMES.

Non licet hominem esse saepe ita, ut volt, res si
non sinit;

615 Nunc ita tempus fert, mi ut cupiam filiam; olim
nil minus.

SYRVS.

Nisi me fallit animus, haud multum infortunium
aberit a me,

Ita in angustum hercle oppido nunc meae cogun-
tur copiae, aliqua

Nisi provideo, ne esse amicam hanc gnati rescis-
cat senex.

Nam quod de argento sperem aut posse postulem
me fallere,

620 Nihil est; triumpho, si licet me latere tecto ab-
scedere.

Crucior, bolum mihi tantum ereptum tam desubito
e faucibus!

Quid agam aut quid comminiscar? ratio de inte-
gro ineunda est mihi.

Nil tam difficile est quin quaerendo investigari
possiet.

Quid, si hoc nunc sic incipiam? — Nihil est. —
Quid, si...? Tantundem egero. —

625 At sic, opinor! — Non potest! Ino optume!
euge, habeo optumam!

Retraham hercle, opinor, ad me idem illud fugi-
tivum argentum tamen.

CLINIA. SYRVS.

CLINIA.

Nullum mihi iam posthac potest intervenire tan-
tum, III. 6.

Quod mi aegritudinem adferat: tanta haec laetitia
oborta est.

Patri me dedo nunc iam, ut frugalior sim quam
volt.

SYRVS.

630 Nil me fefellit: cognita est, quantum huius audio
verba.

Istuc tibi ex sententiâ tua obtigisse, laetor.

CLINIA.

O mi Syre, audisti, obsecro?

SYRVS.

Quidni, qui usque una adfuerim?

CLINIA.

Cuinam aequè audisti commode quidquam evenisse?

SYRVS.

Nulli.

CLINIA.

Atque ita me di ament, ut ego nunc non tam
meapte causa

635 Laetor quam illius, quam ego scio esse honore
quovis dignam.

SYRVS.

Ita credo; set nunc, Clinia, age, da te mihi vicissim:

Nam amici quoque est videnda res, in tuto ut
conlocetur,

Ne quid de amica nunc senex.

CLINIA.

O Iupiter,....

SYRVS.

Quiesce.

CLINIA.

Antiphila mea nubit mihi!

SYRVS.

Siccine mi interloquere?

CLINIA.

640 Quid faciam, Syre mi? gaudeo: fer me.

SYRVS.

Fero hercle sane.

CLINIA.

Deorum vitam apti sumus!

SYRVS.

Frustra operam, opinor, sumo.

CLINIA.

Loquere: audio.

SYRVS.

At iam hoc non ages.

CLINIA.

Agam.

SYRVS.

Videndum est inquam,

Amici quoque res, Clinia, tui in tuto ut conlo-
cetur:Nam si nunc a nobis abis et Bacchidem hic re-
linquis,645 Senex resciscet illico, esse amicam Clitiphonis;
Si abduxeris, celabitur itidem ut celata adhuc est.

CLINIA.

At enim istoc nil magis, Syre, est meis nuptiis
advorsum;Nam quo ore appellabo patrem? tenes, quid di-
cam?

SYRVS.

Quidni?

CLINIA.

Quid dicam? quam causam adferam?

SYRVS.

Quin nolo mentiare:

650 Aperte, ita ut se res habet, narrare....

CLINIA.

Quid ais?

SYRVS.

Iubeo:

Illam te amare et velle uxorem; hanc esse Cliti-
phonis....

CLINIA.

Bonam atque iustam rem oppido imperas et factu
facilem.

SYRVS.

Et....

CLINIA.

Scilicet iam me hoc voles patrem exorare
ut celet

Vostrum.

SYRVS.

Imo, uti recta via rem narret ordine omnem.

CLINIA.

Hem!

655 Satin' sanus es aut sobrius? tu quidem illum plane
prodis:

Nam qui ille poterit esse in tuto? dic mihi?

SYRVS.

Huic quidem consilio palmam do, hoc me magni-
fice effero,

Vim qui tantam habeam et potestatem in me tan-
tam astutiae,

Vera dicendo ut eos ambos fallam, ut, cum nar-
ret senex

660 Voster nostro, esse istam amicam gnati, non cre-
dat tamen.

CLINIA.

At enim spem istoc pacto rursus nuptiarum omnem
eripis:

Nam dum amicam hanc meam esse credet, non
committet filiam.

Tu fortasse, me quid fiat, parvi, dum illi con-
sulas.

SYRVS.

Quid, malum? me aetatem censes velle id adsi-
mularier?

665 Vnus est dies, dum argentum eripio: pax! nihil
amplius.

CLINIA.

Tantum sat habes? Quid tum, quaeso, si hoc pa-
ter resciverit?

SYRVS.

Quid, si redeo ad illos, qui aiunt: quid, si nunc
coelum ruat?

CLINIA.

Metuo, quid agam.

SYRVS.

Metuis? quasi non ea potestas sit tua,
Quo velis in tempore ut te exsolvas, rem facias
palam.

CLINIA.

670 Age, age, traducatur Bacchis.

SYRVS.

Optume ipsa exit foras.

BACCHIS. CLINIA. SYRVS.
PHRYGIA. DROMO.

BACCHIS.

Satis pol proterve me Syri promissa huc induxe-
runt, III. 7.

Decem minas quas mihi dare est pollicitus; quod
si is nunc me

Deceperit, saepe, obsecrans me, ut veniat, frustra
veniet,

Aut cum venturam dixero et constituero, cum is
certo

675 Renuntiarit, Clitipho cum in spe pendeat animi,
Decipiam ac non veniam, Syrus tergo mihi poe-
nas pendet.

CLINIA.

Satis scite promittit tibi.

SYRVS.

Atqui tu hanc iocari credis?

Faciet, nisi caveo.

BACCHIS.

Dormiunt: pol ego istos commovebo.

Mea Phrygia, audistin', modo iste homo quam
demonstravit villam

680 Charini....

PHRYGIA.

Audivi.

BACCHIS.

Proxumam esse huic fundo ad dextram?

PHRYGIA.

Memini.

BACCHIS.

Curriculo percurre: apud eum miles Dionysia
agitat.

SYRVS.

Quid inceptat?

BACCHIS.

Dic, me hic oppido esse invitam at-
que adservari;

Verum aliquo pacto verba me his daturam esse
et venturam.

SYRVS.

Perii hercle! Bacchis mane, mane! quo mittis
istam? quaeso,

685 Iube maneat!

BACCHIS.

I.

SYRVS.

Quin est paratum argentum.

BACCHIS.

Quin ego maneo.

SYRVS.

Atqui iam dabitur.

BACCHIS.

Vt lubet. Num ego insto?

SYRVS.

At scin' quid, sodes?

BACCHIS.

Quid?

SYRVS.

Transeundum....

BACCHIS.

Quid?

SYRVS.

Tibi ad Menedemum est et tua pompa
Eo traducenda est.

BACCHIS.

Quam rem agis, scelus?

SYRVS.

Ego? argentum cudo,
Quod tibi dem.

BACCHIS.

Dignam me putas, quam inludas?

SYRVS.

Non est temere.

BACCHIS.

690 Etiamne tecum hic res mihi est?

SYRVS.

Minime; tuum tibi reddo.

BACCHIS.

Eatur. Sequere hac. — Heus, Dromo!

DROMO.

Quis me volt?

SYRVS.

Syrus.

DROMO.

Quid est re?

SYRVS.

Ancillas omnes Bacchidis traduce huc ad vos pro-
pere.

DROMO.

Quamobrem?.

SYRVS.

Ne quaeras. Efferant, quae secum huc
attulerunt.

Sperabit sumtum sibi senex levatum esse harunc
abitu;

695 Nae ille haud scit, hoc paulum lucri quantum illi
damni adportet.

Tu nescis id quod scis, Dromo, si sapias.

DROMO.

Mutum dices.

CHREMES. SYRVS.

CHREMES.

Ita me di amabunt, ut nunc Menedemi vicem IV. I.

Miseret me, tantum devenisse ad eum mali.

Illancne mulierem alere cum illa familia!

700 Etsi scio, hosce aliquot dies non sentiet:

Ita magno fuit ei desiderio filius;

Verum ubi videbit, tantos sibi sumtus domi

Quotidianos fieri nec fieri modum,

Optabit, rursum ut abeat ab se filius.

705 Syrum optume eccum.

SYRVS.

Cesso hunc adoriri?

CHREMES.

Syre!

SYRVS.

Hem,

Ipsum te mihi iamdudum exoptabam dari.

CHREMES.

Videre egisse nescio quid cum sene."

SYRVS.

De illo, quod dudum? dictum ac factum reddidi.

CHREMES.

Bonan' fide?

SYRVS.

Bona.

CHREMES.

Hercle non possum pati,

710 Quin tibi caput demulceam: accede huc, Syre:

Boni tibi aliquid faciam pro ista re, ac lubens.

SYRVS.

At si scias, quam scite in mentem venerit.

CHREMES.

Vah! gloriare, evenisse ex sententia!

SYRVS.

Nondum hercle vero, verum dico,....

CHREMES.

Dic, quid est?

SYRVS.

715 Tui Clitiphonis esse amicam hanc Bacchidem
Menedemo dixit Clinia et ea se gratia
Eam adduxisse, ne tu id persentisceres.

CHREMES.

Probe!

SYRVS.

Dic, sodes!

CHREMES.

Nimium, inquam.

SYRVS.

Imo sic; satis.

Set porro ausculta, quid super fallaciae est:

720 Sese ipse dicet tuam vidisse filiam;

Eius sibi complacitam formam, postquam adspexerit;

Hanc cupere uxorem.

CHREMES.

Modone quae inventa est?

SYRVS.

Eam;

Et quidem iubebit posci.

CHREMES.

Quamobrem istuc, Syre?

Nam prorsus nihil intelligo.

SYRVS.

Vah, tardus es.

CHREMES.

725 Fortasse.

SYRVS.

SYRVS.

Dabitur argentum illi ad nuptias,
Aurum atque vestem qui.... tenesne?

CHREMES.

Comparet?

SYRVS.

Id ipsum.

CHREMES.

At ego neque do neque ei despondeo.

SYRVS.

Nam quamobrem?

CHREMES.

Quamobrem, me rogas? homini....

SYRVS.

Vt lubet.

Non ego dicebam, in perpetuum illam ut ei dares,
730 Verum ut simulares.

CHREMES.

Non meum est simulatio.

Ita tu istaec tua misceto, ne me admisceas.

Ego, cui daturus non sim, ut ei despondeam?

SYRVS.

Credebam.

CHREMES.

Minume.

SYRVS.

Scite poterat fieri,

Et ego hoc quia dudum tu tantopere iusseras
735 Eo coepi.

CHREMES.

Credo.

SYRVS.

Ceterum equidem istuc, Chreme,
Aequi bonique facio.

CHREMES.

Atqui cum maxime
Volo te dare operam ut fiat, verum alia via.

O

SYRVS.

Fiat: quaeratur aliud. Set illud quod tibi
Argentum dixi, quod ista debet Bacchidi,

740 Id nunc reddendum est illi, neque tu scilicet
Eo nunc confugies: „Quid mea? num mihi da-
tum est?

Num iussi? num illa oppignerare filiam
Meam me invito potuit? vere illud, Chreme,
Ius summum saepe summa, dicunt, malitia.

CHREMES.

745 Haut faciam.

SYRVS.

Imo aliis si licet, tibi non licet:
Omnes inlautum id in bene aucta re putent.

CHREMES.

Quin egomet iam ad eam deferam.

SYRVS.

Imo filium

Iube potius.

CHREMES.

Quamobrem?

SYRVS.

Quia enim in hunc suspicio est
Translata amoris.

CHREMES.

Quid tum?

SYRVS.

Quia videbitur

750 Magis verisimile id esse, cum hic illi dabit,
Et simul conficiam facilius ego quod volo.
Ipse adeo adest: abi, effer argentum.

CHREMES.

Efferro.



CLITIPHO. SYRVS.

CLITIPHO.

Nulla est tam facilis res quin difficilis siet, IV. 2.

Quam invitus facias. Vel me haec deambulatio

755 Quam non laboriosa! ad languorem dedit,

Nec quidquam magis nunc metuo quam, ne denuo

Miser aliquo extrudar hinc, ne accedam ad Bac-
chidem. —

Vt te quidem omnes di, deae, quantum est, Syre,

Cum tuo isto invento cunque incepto perduint!

760 Huiusmodi res semper comminiscere,

Vbi me excarnufices.

SYRVS.

In' tute hinc, quo dignus es?

Quam pene tua me perdidit protervitas!

CLITIPHO.

Vellem hercle factum! ita meritus.

SYRVS.

Meritus? quomodo?

CLITIPHO.

Quid igitur tibi vis dicam? abegisti! mihi

765 Amicam adduxti, quam non liceat tangere!

Credendum, ex animo nonnihil me irascier.

SYRVS.

Nae me istuc ex te prius audisse gaudeo,

Quam argentum haberes, quod daturus iam fui.

CLITIPHO.

Iam non sum iratus.

SYRVS.

Set scin', ubi nunc sit tibi

770 Tua Bacchis?

CLITIPHO.

Apud nos.

SYRVS.

Non.

CLITIPHO.

Vbi ergo?

O 2

P. TERENCE

SYRVS.

Apud Cliniam.

CLITIPHO.

Perii!

SYRVS.

Bono animo es: iam argentum ad eam de-
feres,

Quod ei pollicitus.

CLITIPHO.

Garris. Vnde?

SYRVS.

A tuo patre.

CLITIPHO.

Ludis fortasse.

SYRVS.

Ipsa re tu experibere.

CLITIPHO.

Nae ego fortunatus homo sum! deamo te, Syre.

SYRVS.

775 St! pater egreditur. Cave quidquam admiratus sis,
Qua causa id fiat; obsecundato in loco;
Quod imperabit, facito; loquitor paucula.

CHREMES. CLITIPHO. SYRVS.

CHREMES.

Vbi Clitipho nunc?

SYRVS.

Eccum me, inque.

CLITIPHO.

Eccum hic tibi. IV. 3.

CHREMES.

Quid re esset, dixti huic?

SYRVS.

Dixi pleraque omnia.

CHREMES.

780 Cape hoc argentum ac defer.

SYRVS.

I! quid stas, lapis?

Quin accipis?

CLITIPHO.

Cedo sane.

SYRVS.

Sequere hac me ocius.

Tu hic nos, dum eximus, interea opperibere:

Nam nihil est illic quod moremur diutius.

CHREMES.

Minas quidem iam filia a me habet decem,

785 Quas pro alimentis esse nunc duco datas;

Hasce ornamentis consequentur alterae;

Porro haec talenta dotis adposcet duo.

Quam multa iniusta iusta sunt moribus!

Mihi nunc, relictis rebus, inveniundus est

790 Aliquis, labore inventa mea cui dem bona!

MENEDEMVS. CHREMES.

MENEDEMVS.

Multo omnium nunc me fortunatissimum IV. 4.

Factum puto esse, gnate, cum te intelligo

Resipisse.

CHREMES.

Vt errat!

MENEDEMVS.

Te ipsum quaerebam, Chreme:

Serva, quod in te est, filium et me et familiam!

CHREMES.

795 Cedo, quid vis faciam?

MENEDEMVS.

Invenisti hodie filiam.

CHREMES.

Quid tum?

MENEDEMVS.

Hanc uxorem sibi dari volt Clinia.

CHREMES.

Quid tu hominis, quaeso, es?

MENEDEMVS.

Quid id est?

CHREMES.

Iamne oblitus es,

Inter nos quid sit dictum de fallacia,

Vt ea via abs te argentum auferretur?

MENEDEMVS.

Scio.

CHREMES.

800 Ea res nunc agitur ipsa.

MENEDEMVS.

Quid narras, Chreme?

Imo haec quidem, quae apud me est, Clitiphonis
est

Amica.

CHREMES.

Ita aiunt et tu credis omnia;

Et illam aiunt velle uxorem, ut, cum desponderim,
Des, qui aurum ac vestem et alia, quae opus, com-
paret.

MENEDEMVS.

805 Id est profecto! id amicae dabitur!

CHREMES.

Scilicet,

Datum iri.

MENEDEMVS.

Ah, frustra sum igitur gavisus miser!

Quidvis tamen iam malo quam hunc amittere.

Quid nunc renuntiem abs te responsum, Chreme,
Ne sentiat rescisse me atque aegre ferat?

CHREMES.

810 Aegre, Menedeme? nimium illi indulges!

MENEDEMVS.

Sine.

Inceptum est: perforce hoc mihi perpetuum, Chreme.

CHREMES.

Dic convenisse, egisse te de nuptiis.

MENEDEMVS.

Dicam. Quid deinde?

CHREMES.

Me facturum esse omnia;

Generum placere; postremo etiam, si voles,

815 Desponsam quoque esse dicit,....

MENEDEMVS.

Hem, istuc volueram.

CHREMES.

Tanto ocius te ut poscat, et tu, id quod cupis,

Quam ocissime ut des.

MENEDEMVS.

Cupio.

CHREMES.

Nae tu propediem, ut

Istanc rem video, istius obsaturabere.

Set, haec utut sunt, cautim et paulatim dabis,

820 Si sapiēs.

MENEDEMVS.

Faciam.

CHREMES.

Abi intro; vide, quid postulet;

Ego domi ero, si quid me voles.

MENEDEMVS.

Sane volam:

Nam te scientem faciam, quidquid egero.

MENEDEMVS. CHREMES.

MENEDEMVS.

Ego, me non tam astutum ac perspicacem esse,

id certo scio; V. I.

Set hic adiutor meus et monitor et praemonstrator
Chremes

825 Hoc mihi praestat: in me quidvis harum rerum
convenit,

Quae sunt dictae in stultum, caudex, stipes, asinus,
plumbeus;

In illunc nil potest: exsuperat omnia eius astutia.

CHREMES.

Ohe, deos iam desine, uxor, gratulando obtundere,
Gnatam tuam esse inventam, nisi eos tuo ex ingenio iudicas,

830 Nil ut credas intelligere, idem nisi dictum est
centies.

Set interim illi quid iamdudum gnatus cessat cum
Syro?

MENEDEMVS.

Quos cessare homines ais, Chreme?

CHREMES.

Hem, per tempus, Menedeme, advenis:
Dic mihi: Cliniae, quae dixi, nuntiastin?

MENEDEMVS.

Omnia.

CHREMES.

Quid ait?

MENEDEMVS.

Gaudere adeo occepit, quasi qui cupiunt
nuptias.

CHREMES.

835 Ha ha he!

MENEDEMVS.

Quid risisti?

CHREMES.

Servi venire in mentem Syri

Calliditates.

MENEDEMVS.

Itane?

CHREMES.

Voltus quoque hominum fingit scelus.

MENEDEMVS.

Gnatus quod se adsimulat laetum, id dicis?

CHREMES.

Id.

MENEDEMVS.

Idem istuc mihi

Venit in mentem.

CHREMES.

Veterator!

MENEDEMVS.

Mage, si mage noris, putes,

Ita rem esse.

CHREMES.

Ain' tu?

MENEDEMVS.

Quin tu ausculta.

CHREMES.

Mane: prius scire expeto,

840 Quid perdidideris? nam ubi desponsam nuntiasti
filio,Continuo iniecisse verba tibi Dromonem scilicet,
Sponsae vestes, aurum, ancillas opus esse, argen-
tum ut dares.

MENEDEMVS.

Non.

CHREMES.

Quid?

MENEDEMVS.

Non, inquam.

CHREMES.

Neque ipse gnatus?

MENEDEMVS.

Nil prorsus, Chreme;

Magis nunc etiam instare, ut hodie conficerentur
nuptiae.

CHREMES.

845 Mira narras. Quid Syrus meus? ne is quidem
quidquam?

MENEDEMVS.

Nilil.

CHREMES.

Quamobrem, nescio.

MENEDEMVS.

Equidem miror, qui alia tam plane scias.
 Sed ille tuus tuum quoque idem mire finxit fi-
 lium, ut
 Ne paululum quidem suboleat, esse amicam hanc
 Cliniae.

CHREMES.

Quid ais?

MENEDEMVS.

Omitto iam osculari atque amplexari;
 id nil puto.

CHREMES.

850 Quid est, quod amplius simuletur?

MENEDEMVS.

Vah!

CHREMES.

Quid est?

MENEDEMVS.

Audi modo.

Vltimis est mihi conclave in aedibus quoddam
 retro;

Huc est intro lectus latus; vestimentis stratus est.

CHREMES.

Quid, postquam hoc est factum?

MENEDEMVS.

Dictum factum huc abiit Clitipho.

CHREMES.

Solus?

MENEDEMVS.

Solus.

CHREMES.

Timeo.

MENEDEMVS.

Bacchis consecuta est illico.

CHREMES.

855 Sola?

MENEDEMVS.

Sola.

CHREMES.

Perii!

MENEDEMVS.

Vbi abiere intro, operuere ostium.

CHREMES.

Hem,

Clinia haec fieri videbat?

MENEDEMVS.

Quidni? mecum una simul.

CHREMES.

Fili est amica Bacchis, Menedeme! occidi!

MENEDEMVS.

Quamobrem?

CHREMES.

Decem dierum vix mi est familia!

MENEDEMVS.

Qui istuc times, quod operam amico dat suo?

CHREMES.

860 Imo, quod amicae!

MENEDEMVS.

Si dat.

CHREMES.

An dubium id tibi est?

Quenquamne tam animo comi esse aut leni putas,

Qui se vidente amicam patiatur suam....?

MENEDEMVS.

Quidni, quo verba facilius dentur mihi?

CHREMES.

Derides merito. Mihi nunc ego succenseo.

865 Quot res dedere, ubi possem persentiscere!

Nisi lapis eram. Quae vidi! vae misero mihi!

At nae illud haud inultum, si vivo, ferent:

Nam iam....

MENEDEMVS.

Non tu te cohibes? non te respicis?
Non tibi ego exempli satis sum?

CHREMES.

Prae iracundia,

870 Menedeme, non sum apud me.

MENEDEMVS.

Tene istuc loqui?

Nonne id flagitium est, te aliis consilium dare,
Foris sapere, tibi non posse te auxiliarier?

CHREMES.

Quid faciam?

MENEDEMVS.

Id, quod tu me fecisse aibas parum:

Fac, patrem te esse ut sentiat; fac, ut audeat
875 Tibi credere omnia, abs te petere et poscere,
Ne quam aliam quaerat copiam ac te deserat.

CHREMES.

Imo abeat potius malo quovis gentium,
Quam hic per flagitium ad inopiam redigat pa-
trem!

Nam, si illis pergo suppeditare sumtibus,
880 Menedeme, mi illic vero ad rastros res redit!

MENEDEMVS.

Quod incommodi tibi in hac re capies, nisi caves!
Difficilem ostendes te et ignoscas post tamen,
Et id ingratum erit.

CHREMES.

At nescis, quam doleam!

MENEDEMVS.

Vt lubet.

Quid, quod volo, illa ut nubat nostro, nisi quid
est,

885 Quod malis?

CHREMES.

Imo et gener et adfines placent.

MENEDEMVS.

Quid dotis dicam te dixisse filiae? —

Quid obticuisti?

CHREMES.

Dotis?

MENEDEMVS.

Ita.

CHREMES.

Ah...

MENEDEMVS.

Ne quid, Chreme,

Vereare, si quid minus est: nil nos dos movet.

CHREMES.

Duo talenta pro re nostra ego esse decrevi satis;

890 Sed ita dictu est opus, si me vis salvom esse et
rem et filium,

Omnia mea doti dixisse illi me bona.

MENEDEMVS.

Quam rem agis?

CHREMES.

Id mirari te simulato et illum hoc rogitato simul,

Quamobrem id faciam.

MENEDEMVS.

Quin ego vero, quamobrem id facias, nescio.

CHREMES.

Egone? ut illius animum, qui nunc luxuria et la-
scivia

895 Diffluit, retundam et redigam, ut, quo se vortat,
nesciat.

MENEDEMVS.

Quid agis?

CHREMES.

Mitte ac sine me in hac re gerere mihi
morem.

MENEDEMVS.

Sino.

Itane vis?

CHREMES.

Ita.

P. TERENCE

MENEDEMVS.

Fiat.

CHREMES.

Ac iam, ut uxorem arcessat, paret.

Hic, ita ut aequom liberos est, dictis confutabitur;
 Set Syrum....

MENEDEMVS.

Quid enim?

CHREMES.

Ego, si vivo, nae adeo exornatum dabo,
 900 Adeo depexum, ut, dum vivat, meminerit semper
 mei,

Qui sibi me pro deridiculo ac delectamento putat!
 Non, ita me di ament, auderet uni haec vetulae
 mulieri,

Mihi quae fecit. —

CLITIPHO. CHREMES. SYRVS.

CLITIPHO.

Itane tandem, quaeso, est, Menedeme,
 ut pater V. 2.

Tam in brevi spatio omnem de me patris animum
 eiecerit?

905 Quodnam ob facinus? quid ego tantum sceleris
 admisi miser?

Volgo faciunt.

MENEDEMVS.

Scio, tibi esse hoc gravius multo ac durius,
 Cui fit; verum ego haud minus aegre patior idque
 nescio

Nec rationem capio, nisi quod bene tibi ex animo
 volo.

CLITIPHO.

Hic patrem adstare aibas.

SYRVS.

ECCUM.

CHREMES.

Quid me incusas, Clitipho?

910 Quidquid ego huius feci, tibi prospexi et stultitiae
tuae:

Vbi vidi esse omisso te animo, et, suavia in prae-
sentia

Quae essent, prima habere neque consulere in
longitudinem,

Cepi rationem, ut neque egeres neque ut haec
posses perdere.

Vbi, cui decuit primo, tibi non licuit per te mihi
dare,

915 Abii ad proximos tibi, qui erant; eis commisi et
credidi;

Ibi tuae stultitiae semper praesidium erit, Clitipho,
Victus, vestitus, quo in tectum te receptus.

CLITIPHO.

Hei mihi!

CHREMES.

Satius est, quam, te ipso herede, haec possidere
Bacchidem.

SYRVS.

Disperii! scelestus quantas turbas concivi insciens!

CLITIPHO.

920 Emori cupio!

CHREMES.

Prius, quaeso, disce, quid sit vivere;

Vbi scies, si displicebit vita, tum istoc utitor.

SYRVS.

Here, licetne?

CHREMES.

Loquere.

SYRVS.

At tuto?

CHREMES.

Loquere.

SYRVS.

Quae istaec pravitas,
Quaeve amentia est, quod peccavi ego, id obesse
huic?

CHREMES.

Ilicet;

Ne te admisce: nemo accusat, Syre, te, nec tu
aram tibi

925 Nec precatorem pararis.

SYRVS.

Quid agis?

CHREMES.

Nil succenseo

Nec tibi neque huic, nec vos est aequom, quod
facio, mihi. —

SYRVS.

Abiit! rogasse vellem....

CHREMES.

Quid?

SYRVS.

Quid? Vnde peterem mihi cibum:

Ita nos abalienavit. Ibi iam esse ad sororem in-
telligo.

CLITIPHO.

Adeon' rem rediisse, ut periculum mi etiam sit
fame, Syre?

SYRVS.

950 Modo vivere liceat, spes est....

CLITIPHO.

Quae?

SYRVS.

Nos esurituros satis.

CLITIPHO.

Inrides in re tanta neque me quidquam consilio
adiuvas?

SYRVS.

Imo et ibi nunc sum et usque dudum id egi,
dum loquitur pater,

Et,

Et, quantum ego intelligere possum,....

CLITIPHO.

Quid?

SYRVS.

Non aberit longius.

CLITIPHO.

Quid id ergo?

SYRVS.

Sic est: non esse horum te arbitror.

CLITIPHO.

Qui istuc, Syre?

935 Satin' sanus es?

SYRVS.

Ego dicam, quod mi in mentem; tu diiudica:
Dum illis fuisti solus, dum alia nulla delectatio,
Quae propior esset, te indulgebant, tibi dabant;
nunc, filia

Postquam est inventa vera, inventa est causa, qua
te expellerent.

CLITIPHO.

Est verisimile.

SYRVS.

An tam ob peccatum hoc illum esse
iratum putas?

CLITIPHO.

940 Non arbitror.

SYRVS.

Nunc aliud specta: matres omnes filiis
In peccato adiutrices esse, auxilio in patria in-
iuria,

Solent; id non fit.

CLITIPHO.

Verum. Dic ergo, quid nunc faciam, Syre?

SYRVS.

Suspicionem istanc ex illis quaere; rem profer
palam:

Si non est verum, ad misericordiam ambos addu-
ces cito;

P.

945 Aut scibus, cuius sis.

CLITIPHO.

Recte suades: faciam.

SYRVS.

Sat recte hoc mihi
In mentem venit: namque adolescens quam in
spe erit minuma situs,
Tam patris pacem facillume conficiet in leges
suas;
Etsi haud scio, anne uxorem ducat ac Syro nil
gratiae.
Quid hoc autem? foras exit senex: ego fugio: ad-
huc, quod factum est,
950 Miror, non iussisse illico abripi me. Ad hunc nunc
pergam;
Eum mihi precatorem paro: nostro fide nil habeo.

SOSTRATA. CHREMES.

SOSTRATA.

Profecto, nisi caves tu, homo, aliquid gnato con-
ficies mali, V. 3.
Idque adeo miror, qui tibi tam ineptum, mi vir,
quidpiam
Venire in mentem potuerit.

CHREMES.

955 Pergin' esse mulier? ullamne unquam ego rem in
vita mea
Volui, quin tu in ea re mi advorsatrix fueris, So-
strata?
At si iam rogitem, quid est, quod peccem, aut
quamobrem id facias, nescias
Id, quare nunc tam confidenter restas, stulta!

SOSTRATA.

Ego nescio?

CHREMES.

Imo potius quidem quam redeat ad integrum
eadem oratio!

SOSTRATA.

Oh,

960 Iniquos es, qui me tacere de re tanta postules.

CHREMES.

Non postulo: iam loquere; nihilo minus ego hoc
faciam tamen.

SOSTRATA.

Facies?

CHREMES.

Verum.

SOSTRATA.

Non vides, mali quantum excites ex ea re?
Subditum se suspicatur!

CHREMES.

Ain' tu?

SOSTRATA.

Certe, mi vir, inquam.

CHREMES.

Confitere.

SOSTRATA.

Au, obsecro, istuc nostris inimicis siet!
965 Egone confitear, meum non esse filium, qui sit
meus?

CHREMES.

Quid? metuis, ne non, cum velis, convincas, esse
illum tuum?

SOSTRATA.

Quod filia est inventa?

CHREMES.

Non, set, quo magis credendum siet,
Quod est consimilis moribus probe tui:
Nam illi nil viti est relictum, quin id itidem sit
tibi;

970 Tum praeterea talem, nisi tu, nulla pareret filium.

Set ipse egreditur. Quam severus! rem cum videas, censeas.

CLITIPHO. SOSTRATA. CHREMES.

CLITIPHO.

Vnquam si fuit tempus, mater, cum ego voluptati
tibi V. 4.

Fuerim, dictus filius tuus tua voluntate, obsecro,
Eius ut memineris atque inopis nunc te misere-
scat mei,

975 Quod peto et volo, parentes meos ut common-
stres mihi!

SOSTRATA.

Obsecro, mi gnate, in animum ne istuc inducas
tuum,

Alienum esse.

CLITIPHO.

Tuus sum?

SOSTRATA.

Miseram me! hoccine quaesisse, obsecro?
Ita mihi atque huic sis superstes, ex me atque hoc
ut natus es,

Et cave posthac, si me amas, unquam istuc ver-
bum ex te audiam!

CHREMES.

980 At ego, si me metuis, mores cave inesse istos
sentiam.

CLITIPHO.

Quos?

CHREMES.

Si scire vis, ego dicam: gerro, iners, fraus,
helluo,

Ganeo, damnosus. Cetera nostrum te esse credito.

CLITIPHO.

Non sunt haec parentis dicta.

CHREMES.

Non, si ex capite sis meo
Natus, item ut Minervam esse aiunt a Iove, ea
causa magis

985 Patiar, Clitipho, flagitiis tuis me infamem fieri.

SOSTRATA.

Di istaec prohibeant!

CHREMES.

Deos nescio; ego, quod potero, sedulo. —
Quaeris id, quod habes, parentes; quod abest,
non quaeris, patri
Quomodo obsequare et serves, quod labore in-
venerit.

Num mihi per fallacias adducere ante oculos....?
pudet

990 Dicere hac praesente verbum turpe; at te id nullo
modo

Facere puduit!

CLITIPHO.

Eheu, quam ego nunc totus displiceo mihi!
Quam pudet! neque, quod principium capiam ad
placandum, scio.

MENEDEMVS. CHREMES. CLITIPHO. SOSTRATA.

MENEDEMVS.

Enimvero Chremes nimis graviter cruciat adole-
scentulum et V. 5.

Nimis inhumane: exeo ergo, ut pacem conciliem.
Optume

995 Ipsos video.

CHREMES.

Ehem, Menedeme, cur non arcessi iubes
Filiam et, quod dotis dixi, firmas?

SOSTRATA.

Mi vir, te obsecro,

Ne facias!

CLITIPHO.

Pater, obsecro, ut mi ignoscas!

MENEDEMVS.

Da veniam, Chreme!

Sine te exorem!

CHREMES.

Ego mea bona ut dem Bacchidi dono
sciens?

Non faciam!

MENEDEMVS.

At nos non sinemus.

CLITIPHO.

Si me vivom vis, pater,

1000 Ignosce!

SOSTRATA.

Age, Chremes mi!

MENEDEMVS.

Age, quaeso! ne tam offirma te, Chreme!

CHREMES.

Quid istic? video non licere, ut coeperam, hoc
pertendere.

MENEDEMVS.

Facis, ut te decet.

CHREMES.

Ea lege hoc adeo faciam, si id facit,
Quod ego hunc aequom censeo....

CLITIPHO.

Pater, ego omnia faciam: impera.

CHREMES.

Vxorem ut ducas.

CLITIPHO.

Pater....

CHREMES.

Nihil audio.

MENEDEMVS.

Ad me recipio;

1005 Faciet.

CHREMES.

Nil etiam audio ipsum.

CLITIPHO.

Perii!

SOSTRATA.

An dubitas, Clitipho?

CHREMES.

Imo, utrum volt.

MENEDEMVS.

Faciet omnia.

SOSTRATA.

Haec, dum incipias, gravia sunt

Dumque ignores; ubi cognoris, facilia.

CLITIPHO.

Faciam, pater.

CHREMES.

Gnate mi, ego pol tibi dabo illam lepidam, quam
tu facile ames,

Filiam Phanocratae nostri.

CLITIPHO.

Rufamne illam virginem,

1010 Caesiam, sparso ore, adunco naso? non possum,
pater!

CHREMES.

Heia, ut elegans est! credas, animum ibi esse.

SOSTRATA.

Aliam dabo.

CLITIPHO.

Imo, quandoquidem ducendum est, egomet ha-
beo propemodum,

Quam volo,....

CHREMES.

Nunc laudo, gnate.

CLITIPHO.

Archonidae huius filiam.

CHREMES.

Perplacet.

CLITIPHO.

Pater, hoc nunc restat....

CHREMES.

Quid?

CLITIPHO.

Syro ignoscas volo,

1015 Mea quae causa fecit.

CHREMES.

Fiat.

CANTOR.

Vos valetē et plaudite.



A D E L P H I.



C. SVLPITII APOLLINARIS PERIOCHA IN ADELPHOS.

Duos cum haberet Demea adolescentulos,
Dat Micioni fratri adoptandum Aeschinum,
Sed Ctesiphonem retinet. Hunc citharistriae
Lepore captum, sub duro ac tristi patre,
Fratr celabat Aeschinus, famam quoque
Amoris in se transferebat, denique
Fidicinam lenoni eripit. Vitiaverat
Idem Aeschinus civem Atticam pauperculam,
Fidemque dederat, hanc sibi uxorem fore.
Demea iurgare et graviter ferre. Mox tamen,
Vt veritas patefacta est, ducit Aeschinus
Vitiatam, potitur Ctesipho citharistriam.

P. T E R E N T I
A D E L P H I.

ACTA LVDIS FVNEBR. AEMILI PAVLI
QVOS FECERE Q. FABIVS MAX. P.
CORN. AFRICANVS. EGERE L. ATILIVS
PRAENESTINVS MINVTIVS PROTHY-
MVS. MODOS FECIT FLACCVS CLAVDI
TIBIIS SARRANIS. FACTA E GRAECA
MENANDRV L. ANICIO M. CORNELIO
COSS.

DRAMATIS PERSONAE.

MICIO.
DEMEA.
SANNIO.
AESCHINVS.
CTESIPHO.
PARMENO.
SYRVS.
SOSTRATA.
CANTHARA.
GETA.
HEGIO.
DROMO.

P R O L O G V S.

- Postquam poëta sensit, scripturam suam
Iniquos observare, et, adversarios
Peiorem rapere in partem, quam acturi sumus,
Indicio de sese ipse erit, vos iudices,
5 Laudine duci an vitio factum id oporteat.
Synapthnescontes Diphili comoedia est;
Eam Commorientes Plautus fecit fabulam;
In Graeca adolescens est, qui lenoni eripit
Meretricem, in prima fabula; eum Plautus locum
10 Reliquit integrum, eum hic locum sumsit sibi
In Adelphos, verbum de verbo expressum extulit;
Eam nos acturi sumus novam: pernoscite,
Furtumne factum existumetis an locum
Reprehensum, qui praeteritus negligentia est.
15 Nam quod isti dicunt malevoli, homines nobiles
Eum adiutare, adsidueque una scribere,
Quod illi maledictum vehemens esse existumant,
Eam laudem hic ducit maxumam, cum illis placet,
Qui vobis univorsis et populo placent,
20 Quorum opera in bello, in otio, in negotio,
Suo quisque tempore usus sine superbia.
Dehinc, ne expectetis argumentum fabulae,
Senes, qui primi venient, hi partim aperient,
In agendo partim ostendent. Facite aequanimitas
25 Poëtae adaugeat ad scribendum industriam.
-

MICIO.

— Storax! — Non rediit hac nocte a coena Aeschinus I. 1.

Neque servolorum quisquam, qui advorsum ierant.

Profecto hoc vere dicunt: si absis uspiam,
Aut ubi si cesses, evenire satius est,

5 Quae in te uxor dicit et quae in animo cogitat
Irata, quam illa, quae parentes propitii.

Vxor, si cesses, aut te amare cogitat,
Aut tete amari, aut potare atque animo obsequi,
Et tibi bene esse soli, sibi cum sit male;

10 Ego, quia non rediit filius, quae cogito,
Quibus sollicitor rebus, ne aut illiserit,
Aut uspiam nunc ceciderit, aut praefregerit
Aliquid! — Vah, quemquamne hominem in animo
instituere aut

Parare, quod sit carius quam ipse sibi! — Ac
15 Non ex me natus, fratris hic est. Adeo is est
Dissimilis studio: nam inde ab adolescentia
Ego hanc clementem vitam urbanam atque otium
Secutus sum et, quod fortunatum isti putant,
Vxorem nunquam habui; ille contra haec omnia,

20 Ruri agere vitam semper, parce ac duriter
Se habere; uxorem duxit; nati filii
Duo. Inde ego hunc maiorem adoptavi mihi,
Eduxi a parvolo, habui, amavi, pro meo;
In eo me oblecto; solum id est carum mihi.

25 Ille, ut item contra me habeat, facio sedulo:
Do, praetermitto, non necesse habeo, omnia
Pro meo iure agere; postremo, alii clanculum
Patres quae faciunt, quae fert adolescentia,
Ea ne me celet consuefeci filium.

30 Nam qui mentiri aut fallere institerit patrem
Andere, tanto magis audebit ceteros.
Pudore et liberalitate liberos
Retinere satius esse credo quam metu.

- Haec fratri mecum non conveniunt neque placent.
35 Venit ad me saepe clamans: Quid agis, Micio?
Cur perdis adolescentem nobis? cur amat?
Cur potat? cur tu his sumtum rebus suggeris?
Vestitu nimium indulges! nimium ineptus es!
Nimium ipse est durus praeter aequomque et bonum,
40 Et errat longe mea quidem sententia,
Qui imperium credat gravius esse aut stabilius,
Vi quod fit, quam illud, quod amicitia adiungitur.
Mea sic est ratio et sic animum induco meum:
Malo coactus qui suum officium facit,
45 Dum id rescitum iri credit, tantisper cavet,
Si clam fore sperat, rursum ad ingenium redit;
Is, quem beneficio adiungas, ex animo facit,
Studet referre, praesens absens idem erit.
Hoc patrium est, potius consuefacere filium
50 Sua sponte recte facere quam alieno metu;
Hoc pater ac dominus interest; hoc qui nequit,
Fateatur nescire imperare liberis.
Set estne hic ipsus, de quo agebam? et certe is est.
Tristem nescio quid video. Credo, iam, ut solet,
55 Iurgabit.

MICIO. DEMEA.

MICIO.

Salvom te advenire, Demea,
Gaudemus.

DEMEA.

Ehem opportune: te ipsum quaerito. I. 2.

MICIO.

Quid tristis es?

DEMEA.

Rogas me, ubi nobis Aeschinus
Siet, quid ego sim tristis?

MICIO.

Dixin', hoc fore?

— Quid fecit?

DEMEA.

Quid ille fecerit? quem neque pudet
 60 Quidquam nec metuit quenquam neque legem
 putat

Tenere se ullam! Nam illa, quae antehac facta
 sunt,

Omitto; modo quid designavit!

MICIO.

Quidnam id est?

DEMEA.

Fores effregit atque in aedes inruit
 Alienas; ipsū dominum atque omnem familiam
 65 Mulcavit usque ad mortem; eripuit mulierem,
 Quam amabat. Clamant omnes, indignissime
 Factum esse. Hoc advenienti quot mihi, Micio,
 Dixere! in ore est omni populo! denique
 Si conferendum exemplum est, non fratrem videt
 70 Rei dare operam ruri, parcum ac sobrium?
 Nullum huius factum simile! — Haec cum illi,
 Micio,

Dico, tibi dico: tu illum corrumpi sinis.

MICIO.

Homine imperito nunquam quidquam iniustius,
 Qui, nisi quod ipse fecit, nil rectum putat.

DEMEA.

75 Quorsum istuc?

MICIO.

Quia tu, Demea, haec male iudicas.
 Non est flagitium, crede mi, adolescentulum
 Scortari neque potare....

DEMEA.

Non est?

MICIO.

Neque fores
 Effringere. Haec si neque ego neque tu fecimus.
 Non

- Non sivit facere egestas nos; tu nunc tibi
 80 Id laudi duces, quod tum fecisti inopia?
 Iniurium est: nam si esset unde id fieret,
 Faceremus. Et tu illunc tuum, si esses homo,
 Sineres nunc facere, dum per aetatem licet,
 Potius quam, expectatum ubi te eiecisset foras,
 85 Alieniore aetate post faceret tamen.

DEMEA.

Pro Iupiter, tu homo adigis me ad insaniam!
 Non est flagitium, facere haec adolescentulum?

MICIO.

At

- Ausculda, ne me obtundas de hac re saepius;
 Tuum filium dedisti adoptandum mihi:
 90 Is meus est factus: si quid peccat, Demea,
 Mihi peccat, ego illi maxumam partem feram.
 Obsonat? potat? olet unguenta? de meo;
 Amat? dabitur argentum, dum erit commodum;
 Vbi non erit, fortasse excludetur foras.
 95 Fores effregit? restituentur; discidit
 Vestem? resarciatur: est, dīs gratia,
 Et, unde haec fiant, et adhuc non molesta sunt.
 Postremo aut desine aut cedo quemvis arbitrum:
 Te plura in hac re peccare ostendam.

DEMEA.

Hei mihi!

- 100 Pater discere esse ab illis, qui veri sient.

MICIO.

Natura tu illi pater es, consiliis ego.

DEMEA.

Tun' consulis quidquam?

MICIO.

Ah si pergis, abiero.

DEMEA.

Siccine agis?

MICIO.

An ego toties de eadem re audiam?

Q

DEMEA.

Curae est mihi.

MICIO.

Et mihi curae est; verum, Demea,
 105 Curemus aequam uterque partem, tu alterum,
 Ego item alterum: nam ambos curare propemo-
 dum

Reposcere illum est, quem dedisti.

DEMEA.

Ah, Micio,

Irascere? annon credo? repeton', quem dedi?

MICIO.

Mihi sic videtur.

DEMEA.

Quid istic? si istuc tibi placet,

Profundat, perdat, pereat! nihil ad me attinet.

110 Iam si verbum unum posthac....

MICIO.

Rursus, Demea?

DEMEA.

Aegre est: alienus non sum. Si obsto, hem desino.

Vnum vis curem? curo; et est dis gratia,

Cum ita, ut volo, est. Tuus istic ipse sentiet

Posterior.... nolo in illum gravius dicere. —

MICIO.

115 Nec nil neque omnia haec sunt, quae dicit, tamen.

Nonnil molesta haec sunt mihi, set ostendere,

Me aegre pati, illi nolui: nam ita est homo:

Cum plane advorsor sedulo et deterreo,

Tamen vix humane patitur; verum si augeam aut

120 Adiutor etiam sim eius iracundiae,

Insaniam profecto cum illo. Etsi Aeschinus

Nonnullam in hac re nobis facit iniuriam: hic

Quam non amavit meretricem aut cui non dedit

Aliquid? postremo nuper (credo, iam omnium

125 Taedebat) dixit, velle uxorem ducere:

Sperabam, iam deservisse adolescentiam;

Gaudebam; ecce autem de integro. Nisi, quid-
 quid est,

Volo scire atque hominem convenire, si apud forum est.

SANNIO. AESCHINVS.

SANNIO.

Obsecro, populares, ferte misero atque innocenti
auxilium! II. 1.

130 Subvenite inopi!

AESCHINVS.

Otiose nunc iam illico hic consiste. —
Quid respectas? nil pericli est; nunquam, dum
ego adero, hic te tanget.

SANNIO.

Ego illam invitis omnibus....

AESCHINVS.

Quanquam est scelestus, non committet hodie, ut
iterum vapulet.

SANNIO.

Aeschine, audi, ne te ignarum fuisse dicas meo-
rum morum:

135 Leno ego sum.

AESCHINVS.

Scio.

SANNIO.

At ita ut usquam fuit fide quisquam optuma.
Tu quod te posterius purges, nolle mi hanc iniu-
riam
Factam esse, huius non faciam! crede hoc: ego
meum ius persequar,
Neque tu solves verbis unquam, re mihi quod
malefeceris.

Novi ego vestra haec: „nollem factum; iusiuran-
dum dabitur, te esse

140 Indignum indignis;” indignis cum egomet sim
acceptus modis.

AESCHINVS.

Abi praestrenue ac forem aperi!

SANNIO.

Ceterum hoc nihili facis?

AESCHINVS.

I intro nunc iam tu!

SANNIO.

At enim non sinam.

AESCHINVS.

Accede illuc, Parmeno:

Nimium istoc abiisti: hic propter hunc adsiste!
hem, sic volo.Cave nunc iam oculos a meis oculis quoquam de-
moveas tuos, ne145 Mora sit, si innuerim, quin pugnus continuo in
mala haereat.

SANNIO.

Istuc volo ergo ipsum experiri.

AESCHINVS.

Hem, serva! — Omitte mulierem! —

SANNIO.

O miserum facinus!

AESCHINVS.

Nisi caves, geminabit.

SANNIO.

Hei misero mihi!

AESCHINVS.

Non innueram, verum in istam partem peccato
tamen.

I nunc iam!

SANNIO.

Quid hoc re est? regnumne, Aeschine,
hic tu possides?

AESCHINVS.

150 Si possiderem, ornatus esses ex tuis virtutibus.

SANNIO.

Quid tibi re mecum est?

AESCHINVS.

Nil.

SANNIO.

Quid? nostin', qui sim?

AESCHINVS.

Non desidero.

SANNIO.

Tetigin' tui quidquam?

AESCHINVS.

Si attigisses, ferres infortunium.

SANNIO.

Qui tibi magis licet, meam habere, pro qua ego
argentum dedi?

Responde!

AESCHINVS.

Ante aedes non fecisse erit melius hic
convicium:

155 Nam si molestus pergis esse, iam intro abripiere
atque ibi

Vsque ad necem opperiere loris.

SANNIO.

Loris liber?

AESCHINVS.

Sic erit.

SANNIO.

O hominem impurum! hiccine libertatem aiunt
esse aequam omnibus?

AESCHINVS.

Si satis iam debacchatus, leno, es, audi, si vis,
nunc iam.

SANNIO.

Egon' debacchatus sum autem, an tu in me?

AESCHINVS.

Mitte ista atque ad rem redi.

SANNIO.

160 Quam rem? quo redeam?

AESCHINVS.

Iamne me id vis dicere, quod ad te attinet?

SANNIO.

Cupio, aequi modo aliquid.

AESCHINVS.

Vah, leno iniqua me non volt loqui!

SANNIO.

Leno sum, fateor, communis adolescentium per-
niciēs,Pestis, periurus; tamen a me est nulla tibi orta
iniuria.

AESCHINVS.

Nam hercle etiam hoc restat!

SANNIO.

Illuc quaeso redi, quo coepisti, Aeschine.

AESCHINVS.

165 Minis tu illam viginti emisti, quae res tibi vortat
male!

Argenti tantum dabitur.

SANNIO.

Quid, si ego illam nolo vendere?

Coges me?

AESCHINVS.

Minime.

SANNIO.

Namque id metui.

AESCHINVS.

Neque vendundam censeo,

Quae libera est: nam ego liberali illam adsero
causa manu:Nunc vide utrum vis, argentum accipere an cau-
sam meditari tuam?

170 Delibera hoc, dum ego redeo, leno. —

SANNIO.

Proh supreme Iupiter,

Minime miror, qui insanire occipiunt ex iniuria! —

O hominem miserum! plus quingentos colaphos
infregit mihi,Domo me eripuit, verberavit; me invito abduxit
meam;

Ob malefacta haec tantidem emtam postulat sibi
tradier!

175 Verum enim, quando bene promeruit, fiat: suum
— ius postulat:

Age, iam cupio, modo si argentum reddat; set
ego hoc hariolor:

Vbi me dixero dare tanti, testes faciet illico,
Vendidisse me; de argento somnium: „mox!” —
„cras redi!” —

Id quoque possum ferre, modo si reddat; quan-
quam iniurium est;

180 Verum cogito id, quod res est: quando eum quae-
stum occeperis,

Accipiunda et mussitanda iniuria adolescentium
est.

Set nemo dabit! has egomet mecum frustra ratio-
nes puto.

SYRVS. SANNIO.

SYRVS.

Tace: egomet conveniam iam ipsum. Cupide ac-
cipiat faxo atque etiam II. 2.

Bene secum esse dicat actum. — Quid istuc est,
quod te audio

185 Nescio quid concertasse cum hero?

SANNIO.

Nunquam vidi iniquius
Certationem comparatam, quam hodie inter nos
quae fuit:

Ego vapulando, ille verberando, usque ambo de-
fessi sumus.

SYRVS.

Tua culpa.

SANNIO.

Quid agerem?

SYRVS.

Adolescenti morem gestum oportuit.

SANNIO.

Qui potui melius, qui hodie ei usque os prae-bui?

SYRVS.

Age, scis, quid loquar?

190 Pecuniam in loco negligere maxumum interdum
est lucrum.

SANNIO.

Hui!

SYRVS.

Metuisti, si nunc de tuo iure concessisses paulu-
lum, at-que adolescenti esses morigeratus, hominum ho-
mo stultissime,

Ne non tibi istuc feneraret?

SANNIO.

Spem ego pretio non emo.

SYRVS.

Nunquam rem facies. Abi! inescare nescis homi-
nes, Sannio!

SANNIO.

195 Credo istuc esse melius; verum ego nunquam
adeo astutus fuiQuin, quidquid possem, malletm auferre potius in
praesentia.

SYRVS.

Age, novi animum tuum, quasi iam nusquam tibi
sint viginti minae,Dum huic obsequare. — Praeterea autem te aiunt
proficisci Cyprum;....

SANNIO.

Hem!

SYRVS.

Coëmissee, hinc quae illuc veheres, multa; navem
conductam. Hoc, scio,200 Pendet tibi animus. Vbi illinc, spero, redieris tan-
dem, hoc ages.

SANNIO.

Nusquam pedem! — Perii! hercle, hac illi spe
hoc inceperunt!

SYRVS.

Timet:

Inieci scrupulum homini.

SANNIO.

O scelera! illuc vide,
Vt in ipso articulo oppressit! emtae mulieres
Complures et item hinc alia, quae porto Cyprum;
205 Ad mercatum eo nisi venio, damnum maximum
est:

Nunc si hoc omittam ac tum agam, ubi illinc re-
diero,

Nihil est, refrixerit res: „Nunc demum venis?
Cur passus? ubi eras?” — satius ut sit perdere
Quam aut nunc manere tam diu, aut tum persequi.

SYRVS.

210 Iamne enumerasti, ad te quod rediturum putes?

SANNIO.

Hoccine illo dignum est? hoccine incipere Ae-
schinum,

Oppressione ut hanc mi eripere postulet?

SYRVS.

Labascit. — Vnum hoc habeo; vide, si sat pla-
cet;

Potius quam venias in periculum, Sannio,

215 Servesne an perdas totum, dividuum face:

Decem minas conradet alicunde.

SANNIO.

Hei mihi,

Etiam de sorte in dubium nunc venio miser?

Pudet nihil? omnes dentes labefecit mihi;

Praeterea colaphis tuber est totum caput;

220 Etiam insuper defrudet? nusquam abeo!

SYRVS.

Vt lubet.

Numquid vis quin abeam?

SANNIO.

Imo quaeso hercle hoc, Syre,
 Vtut haec sunt acta, potius quam lites sequar,
 Meum mihi reddat, saltem quanti emta est, Syre.
 Scio, te non usum amicitia esse antehac mea:
 225 Memorem me esse atque gratum dices.

SYRVS.

Sedulo

Faciam. Set Ctesiphonem video; laetus est
 De amica.

SANNIO.

Quid, quod te oro?

SYRVS.

Paulisper mane.

CTESIPHO. SYRVS.

CTESIPHO.

Abs quivis homine, cum est opus, beneficium ac-
 cipere gaudeas; II. 3.
 Verum enimvero id demum iuvat, si, quem ae-
 quom est facere, is bene facit.
 230 O frater, frater, quid ego nunc te laudem? satis
 certo scio:
 Nunquam ita magnifice quidquam dicam, id virtus
 quin superet tua;
 Itaque unam hanc rem me habere praeter alias
 praecipuam arbitror:
 Fratrem primarum esse artium homini nemini
 mage principem.

SYRVS.

O Ctesipho!

CTESIPHO.

Eho, Syre, Aeschinus ubi est?

SYRVS.

Ellum te expectat domi.

CTESIPHO.

Hem!

SYRVS.

235 Quid est?

CTESIPHO.

Illius opera nunc, Syre, vivo! Festivom
caput!

Quine omnia sibi postputavit esse meo prae com-
modo,

Maledicta, famam meum amorum, et peccatum in
sese transtulit!

Nil supra pote! set quidnam crepuit foris?

SYRVS.

Mane: ipse exit foras.

AESCHINVS. SANNIO. CTESIPHO.
SYRVS.

AESCHINVS.

Vbi ille est sacrilegus?

SANNIO.

Me quaerit. Num quidnam effert? —
occuldi: II. 4.

240 Nil video.

AESCHINVS.

Ehem opportune! te ipsum quaero.
Quid fit, Ctesipho?

In tuto est omnis res: omitte vero tristitiam tuam.

CTESIPHO.

Ego illam hercle vero omitto, qui quidem fratrem
te habeam. O mi Aeschine,

O mi germane...! At vereor coram in os te lau-
dare amplius,

Ne id adsentandi magis quam quo habeam gra-
tum facere existumes.

AESCHINVS.

245 Age, inepte! quasi non noverimus nos inter nos,
Ctesipho.

Hoc mihi dolet, nos pene sero scisse et in eum
rem locum

Rediisse, ut, si omnes cuperent, nil possent tibi
auxiliari.

CTESIPHO.

Pudebat.

AESCHINVS.

Ah, stultitia est istaec, non pudor. Tam ob
parvolum

Ex patria pene! turpe dictu! deos quaeso, ista
ut prohibeant.

CTESIPHO.

250 Peccavi.

AESCHINVS.

Quid ait tandem nobis Sannio?

SYRVS.

Iam mitis est.

AESCHINVS.

Ego ad forum ibo, ut hunc absolvam; tu intro ad
illam, Ctesipho.

SANNIO.

Syre, insta!

AESCHINVS.

Eamus.

SYRVS.

Namque hic properat in Cyprum.

SANNIO.

Ne tam quidem:

Quamvis etiam maneo otiosus hic.

SYRVS.

Reddetur; ne time.

SANNIO.

At ut omne reddat!

SYRVS.

Omne reddet: tace modo ac sequere hac.

SANNIO.

Sequor.

CTESIPHO.

255 Heus heus, Syre!

SYRVS.

Ehem, quid est?

CTESIPHO.

Hercle, obsecro, hominem istum impurissimum
Quam primum absolvitote, ne, si magis inritatus
siet,

Ad patrem aliqua hoc permanet atque ego tum
perpetuo perierim!

SYRVS.

Non fiet: bono animo es! tu cum illa te intus
oblecta interim

Et lectulos iube sterni nobis et parari cetera;

260 Ego iam, transacta re, convortam me domum cum
obsonio.

CTESIPHO.

Ita quaeso: quando hoc bene successit, hilare
hunc sumamus diem.



SOSTRATA. CANTHARA.

SOSTRATA.

Obsecro, mea nutrix, quid nunc fiet?

CANTHARA.

Quid fiat, rogas? III. I.

Recte edepol spero.

SOSTRATA.

Modo dolores, mea tu, occipiunt
primulum.

CANTHARA.

Tam nunc times quasi nunquam adfueris, nun-
quam tute pepereris.

SOSTRATA.

265 Miseram me! neminem habeo (solae sumus; Geta
autem hic non adest),
Neque nunc quem ad obstetricem mittam, nec qui
arcessat Aeschinum.

CANTHARA.

Pol is quidem iam hic aderit: nam nunquam
unum intermittit diem
Quin semper veniat.

SOSTRATA.

Solus mearum miseriarum est remedium.

CANTHARA.

E re natae melius fieri haud potuit quam factum
est, hera,
270 Quando oblatum est vitium, quod ad illum attinet
potissimum,
Talem, tali ingenio atque animo, natum ex tanta
familia.

SOSTRATA.

Ita pol est, ut dicis. Salvos nobis deos quaeso ut
siet.

GETA. SOSTRATA. CANTHARA.

GETA.

Nunc illud est, quom, si omnia omnes sua con-
silia conferant III. 2.
Atque huic malo salutem quaerant, auxili nihil
adferant,
275 Quod mihi que heraeque filiaeque herili est (vae
misero mihi!):
Tot res repente circumvallant, unde emergi non
potest,
Vis, egestas, iniustitia, solitudo, infamia!
Hoccine seclum? o scelera! o genera sacrilega! o
hominem impium,....

SOSTRATA.

Me miseram, quidnam est, quod sic video timidum et properantem Getam?

GETA.

280 Quem neque fides neque iusiurandum neque ulla
misericordia

Repressit neque reflexit, neque, quod partus instabat prope,

Cui miserae indigniter vi vitium obtulerat!

SOSTRATA.

Non intelligo.

Satis, quae loquitur.

CANTHARA.

Propius, obsecro, accedamus, Sostrata!

GETA.

Ah

Me miserum! vix sum compos animi: ita ardeo iracundia!

285 Nihil est, quod malim, quam illanc totam familiam
dari obviam,

Vt ego iram hanc in eos evomam omnem, dum
aegritudo haec est recens!

Satis mi id habeam supplici, dum illos ulciscar
meo modo.

Seni animam primo exstinguerem ipsi, qui illud
produxit scelus;

Tum autem Syrum impulsorem, vah quibus illum
lacerarem modis!

290 Sublimem medium arriperem et capite pronum in
terram statuerem,

Cerebro viam ut dispergeret;

Adolescenti ipsi eriperem oculos, posthac praecipitem darem;

Ceteros ruerem, agerem, raperem, tunderem, prosternerem.

Set cesso heram hoc malo impertiri propere?

SOSTRATA.

Revocemus. Geta!

GETA.

Hem,

295 Quisquis es, sinè me!

SOSTRATA.

Ego sum Sostrata.

GETA.

Vbinam es? te ipsam quaerito,

Te expeto! oppido opportune te obtulisti mi
obviam,

Hera.

SOSTRATA.

Quid est? quid trepidas?

GETA.

Hei mihi!

SOSTRATA.

Quid festinas, mi Geta?

Animam recipe.

GETA.

Prorsus....

SOSTRATA.

Quid istuc prorsus ergo est?

GETA.

Periimus!

Actum est!

SOSTRATA.

Eloquere, obsecro, ergo, quid sit!

GETA.

Iam....

SOSTRATA.

Quid iam, Geta?

GETA.

300 Aeschinus....

SOSTRATA.

Quid is ergo?

GETA.

Alienus est ab nostra familia.

SOSTRATA.

Hem,

Pe-

Perii! — quare?

GETA.

Amare occepit aliam....

SOSTRATA.

Vae miserae mihi!

GETA.

Neque id occulte fert: ab lenone ipse eripuit
palam.

SOSTRATA.

Satin' hoc certum est?

GETA.

Certum: hisce oculis egomet vidi, Sostrata.

SOSTRATA.

Ah,

Me miseram! quid iam credas, aut cui credas?
nostrumne Aeschinum,

305 Nostrum omnium in quo vitae spes opesque no-
strae omnes sitae,

Qui se sine hac iurabat unum nunquam victurum
diem,

Qui senis in gremio sui positurum puerum dice-
bat patris,

Ita obsecraturum, ut liceret, hanc se uxorem du-
cere?

GETA.

Hera, lacrimas mitte ac potius, quod ad hanc
rem opus est porro, consule,

310 Patiamur an narremus cuiquam.

CANTHARA.

Au, au, mi homo, sanus es?

An proferendum hoc tibi videtur usquam?

GETA.

Mihi quidem non placet:
Nam primum, animo illum alieno a nobis esse,
res ipsa indicat;

Nunc si hoc palam proferimus, ille inficias ibit,
sat scio:

R

Tua fama et gnatae vita in dubium veniet; tum,
si maxume

315 Fateatur, cum amet aliam, non est utile, hanc illi
dari:

Quapropter quoquo tacito pacto est opus.

SOSTRATA.

Ah, minime gentium!

Non faciam!

GETA.

Quid ages?

SOSTRATA.

Proferam.

CANTHARA.

Hem, mea Sostrata, vide, quam rem agas!

SOSTRATA.

Peiore res loco non potis est esse quam in quo
nunc sita est:

Primum indotata est; tum praeterea, quae secunda
ei dos erat,

320 Periit: dari pro virgine nuptum non potest: hoc
reliquom est.

Si inficias ibit, testis mecum est anulus, quem ipse
amiserat.

Postremo, quando conscia ego mihi sum, a me
culpam esse hanc procul,

Neque pretium neque rem ullam intercessisse illa
aut me indignam, Geta,

Experiar!

GETA.

Quid istic? Cedo, ut dicas melius.

SOSTRATA.

Tu quantum potest

325 Abi, Hegioni, cognato huius, omne enarrato or-
dine:

Nam is nostro summus Simulo fuit et nos coluit
maxume.

GETA.

Nam hercle alius nemo respicit nos.

SOSTRATA.

Propere tu, mea Canthara,
Curre, obstetricem arcesse, ut, cum opus sit, ne
in mora nobis siet!

DEMEA.

- Disperii! Ctesiphonem audiui filium III. 3.
 330 Vna adfuisse in raptione cum Aeschino.
 Id misero restat mihi mali, si illum potest,
 Qui alicui re est, etiam meum ad nequitiam addu-
 cere.
 Vbi ego illum quaeram? credo abductum in ga-
 neum
 Aliquo; persuasit ille impurus, sat scio.
 335 Set eccum Syrum ire video: hinc scibo iam, ubi
 siet.
 Atqui hercle hic de grege illo est: si me senserit
 Eum quaeritare, nunquam dicet carnufex:
 Non ostendam, id me velle.

SYRVS. DEMEA.

SYRVS.

Omnem rem modo seni, III. 4.

- Quo pacto haberet, enarramus ordine;
 540 Nil vidi quidquam laetius....

DEMEA.

Proh Iupiter,
 Hominis stultitiam!

SYRVS.

Conlaudavit filium;
 Mihi, qui id dedissem consili, egit gratias;....

DEMEA.

Disrumpor!

SYRVS.

Argentum adnumeravit illico;
 Dedit praeterea in sumtum dimidium minae;
 345 Id distributum sane est ex sententia.

DEMEA.

Hem

Huic mandes, si quid recte curatum velis!

SYRVS.

Ehem, Demea, haut adspexeram te; quid agitur?

DEMEA.

Quid agatur? vostram nequeo mirari satis
 Rationem.

SYRVS.

Est hercle inepta, ne dicam dolo, et
 350 Absurda. — Pisces ceteros purga, Dromo!
 Congrum istum maxumum in aqua sinito ludere
 Tantisper! ubi ego rediero, exossabitur;
 Prius nolo.

DEMEA.

Haecceine flagitia....

SYRVS.

Mihi quidem non placent,
 Et clamo saepe. — Salsamenta haec, Stephanio,
 355 Fac macerentur pulchre!

DEMEA.

Di, vostram fidem,
 Studione vero id sibi habet an laudi putat
 Fore, gnatum si perdiderit? vae misero mihi!
 Videre videor iam diem illum, cum hic egens
 Profugiet aliquo militatum.

SYRVS.

O Demea,

360 Istuc est sapere, non quod ante pedes modo est
 Videre, set etiam illa, quae futura sunt,
 Prospicere.

DEMEA.

Quid? istaec iam penes vos psaltria est?

SYRVS.

Ellam intus.

DEMEA.

Eho, domin' habiturus?

SYRVS.

Credo, ut est

Dementia.

DEMEA.

Haecce fieri!

SYRVS.

Inepta lenitas

365 Patris! facultas prava!

DEMEA.

Me fratris quidem

Pudet pigetque.

SYRVS.

Nimum inter vos, Demea (ac
Non, quod ades praesens, dico hoc), pernimum
interest.

Tu quantus quantus nil nisi sapientia es;

Ille somnium! Tun' sineres vero illunc tuum

370 Facere haec?

DEMEA.

Sinerem illum aut non sex totis mensibus
Prius olfecissem quam ille quidquam coeperet?

SYRVS.

Vigilantiam tuam tu mihi?

DEMEA.

Sic sit modo

Vt nunc est, quaeso!

SYRVS.

Vt quisque suum volt esse, ita est.

DEMEA.

Quid eum? vidistin' hodie?

SYRVS.

Tuumne filium?

DEMEA.

375 Abigam hinc rus.

SYRVS.

Iam dudum aliquid ruri agere arbitror.

DEMEA.

Satin' scis, ibi esse?

SYRVS.

Oh, quem egomet produxi,....

DEMEA.

Optume est:

Metui, ne haereret hic.

SYRVS.

Atque iratum admodum.

DEMEA.

Quid autem?

SYRVS.

Adortus iurgio est fratrem ad forum

De psaltria hac.

DEMEA.

Ain' vero?

SYRVS.

Vah, nil reticuit!

380 Nam ut numerabatur forte argentum, intervenit
 Homo de improvise, coepit clamare: o Aeschine,
 Haecine flagitia facere te? haec te admittere
 Indigna genere nostro?...

DEMEA.

Oh, lacrumo gaudio!

SYRVS.

Non tu hic argentum perdis, sed vitam tuam.

DEMEA.

385 Salvos sit! spero, est similis maiorum suum.

SYRVS.

Hui!

DEMEA.

Syre, praeceptorum plenus istorum ille.

SYRVS.

Pheu,

Domi habuit, unde disceret!

DEMEA.

Fit sedulo;

Nil praetermitto; consuefacio; denique

Inspicere, tanquam in speculum, in vitas omnium

390 lubeo atque ex aliis sumere exemplum sibi:

„Hoc facito!”

SYRVS.

Recte sane.

DEMEA.

„Hoc fugito!”

SYRVS.

Callide.

DEMEA.

„Hoc laudi est.”

SYRVS.

Istaec res est.

DEMEA.

„Hoc vitio datur.”

SYRVS.

Probissume.

DEMEA.

Porro autem....

SYRVS.

Non hercle otium est

Nunc mi auscultandi: pisces ex sententia

395 Nactus sum; hi mihi ne corrumpantur, cautio est:

Nam id nobis tam flagitium est quam illa, o De-
mea,

Non facere vobis, modo quae dixi; et quod
queo,

Conservis ad eundem istunc praecipio modum:

„Hoc salsum est; hoc adustum est; hoc lautum
est parum!

400 Illud recte est! iterum sic memento!” sedulo

Moneo, quae possum pro mea sapientia;

Postremo, tanquam in speculum, in patinas, De-
mea,

Inspicere inbeo et moneo, quid facto usus sit.
 Inepta haec esse, nos quae facimus, sentio;
 405 Verum, quid facias? ut homo est, ita morem geras.
 Numquid vis?

DEMEA.

Mentem vobis meliorem dari.

SYRVS.

Tu rus hinc ibis?

DEMEA.

Recta.

SYRVS.

Nam quid tu hic agas,
 Vbi, si quid bene praecipias, nemo obtemperat?

DEMEA.

Ego vero hinc abeo, quando is, quamobrem huc
 veneram,

410 Rus abiit: illum unum curo, ille ad me attinet:
 Quando ita volt frater; de istoc ipse viderit.
 Set quis illic est, procul quem video? estne Hegio,
 Tribulis noster? satis si cerno, is hercle. Vah,
 Homo amicus nobis iam inde a puero! Di boni,
 415 Nae illiusmodi iam magna nobis civium
 Penuria est antiqua virtute ac fide!
 Haud cito mali quid ortum ex hoc sit publice!
 Quam gaudeo, ubi etiam huius generis reliquias
 Restare video! vivere etiam nunc lubet!
 420 Opperiar hominem hic, ut salutem et conloquar.

HEGIO. GETA. DEMEA.

HEGIO.

Pro di immortales, facinus indignum, Geta, III. 5.
 Quod narras!

GETA.

Sic est factum.

HEGIO.

Ex illan' familia

Tam inliberale facinus ortum esse? o Aeschine,
Pol haud paternum istuc dedisti!

DEMEA.

Videlicet

425 De psaltria hoc audivit; id illi nunc dolet
Alieno, patruus nihili pendit. Hei mihi!
Vtinam hic adesset alicubi atque audiret haec!

HEGIO.

Nisi facient, quod illos aequom est, haut sic au-
ferent.

GETA.

In te spes omnis, Hegio, nobis sita est:

430 Te solum habemus: tu es patronus, tu pater:
Tibi ille moriens nos commendavit senex:
Si deseris tu, periimus.

HEGIO.

Cave dixeris:

Nec faciam neque me sat pie posse arbitror.

DEMEA.

Adibo. Salvere Hegionem plurimum

435 Iubeo.

HEGIO.

Oh, te quaerebam ipsum; salve, Demea.

DEMEA.

Quid autem?

HEGIO.

Maior filius tuus Aeschinus,
Quem fratri adoptandum abdidisti, neque boni
Neque liberalis functus officium est viri.

DEMEA.

Quid istuc?

HEGIO.

440 Nostrum amicum noras Simulum et
Aequalem?

DEMEA.

Quidni?

HEGIO.

Filiam eius virginem

Vitiavit.

DEMEA.

Hem!

HEGIO.

Mane: nondum audisti, Demea,
Quod est gravissimum.

DEMEA.

An quid etiam est amplius?

HEGIO.

Vero amplius: nam hoc quidem ferundum aliquo
modo est:

Persuasit nox, amor, vinum, adolescentia:

445 Humanum est; ubi istud factum, ad matrem vir-
ginis

Venit ipse ultro, lacrimans, orans, obsecrans,

Fidem dans, iurans, se illam ducturum domum:

Ignotum est, tacitum est, creditum est. Virgo ex eo

Compressu gravida facta est; mensis decimus est:

450 Bonus vir nobis psaltriam, si dis placet,

Paravit, quicum vivat, illam deserit!

DEMEA.

Pro certon' tu istaec dicis?

HEGIO.

Mater virginis

In medio est, ipsa virgo, res ipsa, hic Geta

Praeterea, ut captus servolorum est, non malus

455 Neque iners ad illas, solus qui omnem familiam

Sustentat; hunc abduce, vinci, quaere rem.

GETA.

Imo hercle extorque, nisi ita factum est, Demea;

Postremo non negabit: coram ipsum cedo.

DEMEA.

Pudet; nec, quid agam, nec, quid huic respon-
deam,

460 Scio.

PAMPHILA.

Miseram me! differor doloribus!

Iuno Lucina, fer opem! serva me, obsecro!

HEGIO.

Hem!

Numnam illa, quaeso, parturit?

GETA.

Certe, Hegio.

HEGIO.

Hem!

Illaec fidem nunc vostram implorat, Demea.

Quod ius vos cogit, id voluntate impetret.

465 Haec primum ut fiant, deos quaeso, ut vobis decet;

Sin aliter animus voster est, ego, Demea,

Vi summa defendam hanc atque illum mortuum.

Cognatus mihi erat; una a pueris parvolis

Sumus educti; una semper militiae et domi

470 Fuimus; paupertatem una pertulimus gravem:

Quapropter nitar, faciam, experiar, denique

Animam relinquam potius quam illas deseram!

Quid mihi respondes?

DEMEA.

Fratrem conveniam, Hegio.

HEGIO.

Set, Demea, hoc tu facito cum animo cogites:

475 Quam vos facillume agitis, quam estis maxime

Potentes, dites, fortunati, nobiles,

Tam maxime vos aequo animo aequa noscere

Oportet, si vos vultis perhiberi probos.

DEMEA.

Redito: fient, quae aequom fieri est, omnia.

HEGIO.

480 Decet te facere. Geta, duc me intro ad Sostratam.

DEMEA.

Non me indicente haec fiunt. Vtinam hoc sit modo

Defunctum! verum nimia illaec licentia

Profecto evadet in aliquod magnum malum.

Ibo, requiram fratrem, ut in eum haec evomam.

HEGIO.

485 Bono animo fac sis, Sostrata, et istam, quod
potes,

Fac consolere; ego Micionem, si ad forum est,
Conveniam atque, ut res gesta est, narrabo or-
dine.

Si est, ut suum facturum officium siet,
Faciatur; sin aliter de hac re est eius sententia,
490 Respondeat mihi, ut, quid agam, quam primum
sciam.

CTESIPHO. SYRVS.

CTESIPHO.

Ain', patrem hinc abisse rus?

SYRVS.

Iamdudum....

CTESIPHO.

Dic sodes!

SYRVS.

Apud villam est; IV. 1.

Nunc cum maxime operis aliquid facere credo.

CTESIPHO.

Vtinam quidem!

Quod cum salute eius fiat, ita se defetigarit ve-
lim,

Vt triduo hoc perpetuo prorsum e lecto nequeat
surgere.

SYRVS.

495 Ita fiat et istoc, si quid potis est, rectius!

CTESIPHO.

Ita: nam hunc diem

Nimis misere cupio, ut coepi, perpetuum in lae-
titia degere;

Et illud rus nulla alia causa ita male odi,

Nisi quia prope est. Quodsi longius abesset,

Nox prius oppressisset illic quam huc revorti pos-
set iterum;

500 Nunc, ubi me illic non videbit, iam huc recurret,
sat scio,

Rogitabit me, ubi fuerim, quem ego toto non
vidi die.

Quid dicam?

SYRVS.

Nilne in mentem?

CTESIPHO.

Nusquam quidquam.

SYRVS.

Tanto nequior.

Cliens, amicus, hospes nemo est vobis?

CTESIPHO.

Sunt; quid postea?

SYRVS.

Hisce opera ut data sit.

CTESIPHO.

Quae non data sit? non potest fieri.

SYRVS.

Potest.

CTESIPHO.

505 Interdiu; set si hic pernocto, causae quid dicam,
Syre?

SYRVS.

Vah, quam vellem etiam noctu amicis operam mos
esset dari!

Quin tu otiosus es: ego illius sensum pulchre
calleo;

Cum fervit maxume, tam placidum quam oleum
reddo.

CTESIPHO.

Quomodo?

SYRVS.

Laudarier te audit lubenter: facio te apud illum
deum,

510 Virtutes narro....

CTESIPHO.

Meas?

SYRVS.

Tuas: homini illico lacrumae cadunt,
Quasi puero, gaudio. Hem tibi autem....

CTESIPHO.

Quidnam est?

SYRVS.

Lupus in fabula!

CTESIPHO.

Paterne?

SYRVS.

Is ipsus.

CTESIPHO.

Syre, quid agimus?

SYRVS.

Fuge modo intro; ego videro.

CTESIPHO.

Si quid rogabit, nusquam tu me! audistin'?

SYRVS.

Potin', ut desinas?

DEMEA. CTESIPHO. SYRVS.

DEMEA.

Nae ego homo infelix! primum fratrem nusquam
invenio gentium; IV. 2.

515 Praeterea autem, dum illum quaero, a villa mer-
cenarium

Vidi; negat is, filium esse ruri, nec, quid agam,
scio.

CTESIPHO.

Syre,....

SYRVS.

Quid est?

CTESIPHO.

Men' quaerit?

SYRVS.

Verum.

CTESIPHO.

Perii!

SYRVS.

Quin tu animo bono es.

DEMEA.

Quid hoc, malum, infelicitatis? nequeo sat discernere,

Nisi me credo huic esse natum re, ferundis miseris:

520 Primus sentio mala nostra, primus rescisco, omnia;
Primus porro obnuntio; aegre solus, si quid sit, fero.

SYRVS.

Rideo hunc: se primum ait scire, is solus nescit omnia.

DEMEA.

Nunc redeo: si frater forte redierit, viso.

CTESIPHO.

Syre,

Obsecro, vide, ne ille huc prorsus se inruat!

SYRVS.

Etiam taces?

525 Ego cavebo.

CTESIPHO.

Nunquam hercle hodie ego istuc committam tibi:

Nam me iam aliquo in cellam cum illa concludam; id tutissimum est.

SYRVS.

Age; tamen ego hunc amovebo. —

DEMEA.

Set eccum sceleratum Syrum!

SYRVS.

Non hercle hic quidem durare quisquam, si sic fit, potest!

Scire equidem volo, quot mihi sint domini! quae haec est miseria?

DEMEA.

530 Quid ille gannit? quid volt? — Quid ais, bone
vir? est frater domi?

SYRVS.

Quid, malum, boni mihi narras? Equidem perii!

DEMEA.

Quid tibi est?

SYRVS.

Rogitas? Ctesipho me pugnis miserum et istam
psaltriam

Vsque occidit.

DEMEA.

Hem, quid narras?

SYRVS.

Hem vide, labrum ut discidit!

DEMEA.

Quamobrem?

SYRVS.

Me impulsore hanc entam esse ait.

DEMEA.

Non tu eum rus hinc modo

535 Produxeris aibas?

SYRVS.

Factum; verum venit post insaniens;
Nil pepercit. Non puduisse verberare hominem
senem,
Quem ego puerum modo tantillum in manibus
gestavi meis!

DEMEA.

Laudo, Ctesipho: patrissas! abi: virum te indico.

SYRVS.

Laudas? nae ille continebit posthac, si sapiet,
manus.

DEMEA.

540 Fortiter!

SYRVS.

Perquam, quia miseram mulierem et me
servolum,

Qui

Qui referire non audebam, vicit! hui perfortiter!

DEMEA.

Melius non potuit: idem quod ego sensit, te esse
huic re caput.

Set estne frater intus?

SYRVS.

Non est.

DEMEA.

Vbi illum quaeram, cogito.

SYRVS.

Scio, ubi siet; verum hodie nunquam monstrabo.

DEMEA.

Hem, quid ais?

SYRVS.

Ita.

DEMEA.

545 Diminuetur tibi quidem iam cerebrum.

SYRVS.

At nomen nescio

Illius hominis, set locum novi, ubi sit.

DEMEA.

Dic ergo locum.

SYRVS.

Nostin' porticum ad macellum hac deorsum?

DEMEA.

Quidni noverim?

SYRVS.

Praeterito hac recta platea sursus. Vbi eo veneris,
Clivos deorsum vorsum est; hac te praecipitato;

postea

550 Est ad hanc manum sacellum; ibi angiportum pro-
pter est,

Illi, ubi etiam caprificus magna est.

DEMEA.

Novi.

SYRVS.

Hac pergito.

DEMEA.

Id quidem angiportum non est pervium.

SYRVS.

Verum hercle! vah,
Censen' hominem me esse? erravi: in porticum
rursus redi;

Sane multo propius hac, et minor ibi est erratio.
555 Scin' Cratini huius ditis aedes?

DEMEA.

Scio.

SYRVS.

Vbi eas praeterieris,
Ad sinistram hac recta platea; ubi ad Dianae ve-
neris,
Ito ad dextram: priusquam ad portam venias, apud
ipsum lacum
Est pistrilla et exadvorsum fabrica; ibi est.

DEMEA.

Quid ibi facit?

SYRVS.

Lectulos in sole ilignis pedibus faciundos dedit,
560 Vbi potetis vos.

DEMEA.

Bene sane. Set cesso ad eum pergere?

SYRVS.

I sane: ego te exercebo hodie, ut dignus es, sili-
cernium! —

Aeschinus odiose cessat: prandium corrumpitur;
Ctesipho autem in amore est totus; ego tam pro-
spiciam mihi:

Nam iam adibo atque unum quidquid, quod qui-
dem erit bellissimum,
565 Carpani et sorbillans paulatim cyathos producam
diem.

MICIO. HEGIO.

MICIO.

Ego in hac re nil reperio, quamobrem lauder
tantopere, Hegio: IV. 3.

Meum officium facio: quod peccatum a nobis or-
tum est, corrigo;

Nisi si me in illo credidisti esse hominum numero,
qui ita putant:

Sibi fieri ultro iniuriam, si, quam fecere, expostu-
les,

570 Et ultro accusant, id quia non est a me factum,
agis gratias.

HEGIO.

Ah minime: nunquam te aliter atque es in ani-
mum induxi meum.

Set quaeso, ut una mecum ad matrem virginis eas,
Micio,

Atque istaec eadem, mihi quae dixi, tute dicas
mulieri:

Suspicionem hanc fratrem propter, eius esse illam
psaltriam.

MICIO.

575 Si ita aequom censes aut ita opus est facto, eamus.

HEGIO.

Bene facis:

Nam et illi iam animum relevaris, quae dolore
ac miseria

Tabescit, et tuo officio fueris functus. Set si ali-
ter putas,

Egomet narrabo, quae mihi dixisti.

MICIO.

Imo ego ibo.

HEGIO.

Bene facis:

Omnes, quâs res sunt minus secundae, mage sunt,
nescio quomodo,

580 Suspiciosi, ad contumeliam omnia accipiunt magis,
 Propter suam impotentiam se credunt intercludier:
 Quapropter te ipsum purgare ipsis coram placabilius est.

MICIO.

Et recte et verum dicis.

HEGIO.

Sequere me ergo hac intro.

MICIO.

Maxume.

AESCHINVS.

Discrucior animi!

IV. 4.

585 Hoccine mihi mali de improvise obitici
 Tantum ut neque, quid me, nec, quid agam, certum siet!
 Membra debilia sunt, animus obstupidus est,
 Pectori consili nil quit consistere! —
 Vah, quomodo me ex hac expediam turba nunc?
 tanta incidit

590 Suspicio, neque illa immerito, de me: emisse hanc
 psaltriam

Mihi me, credit Sostrata; anus id fecit indicium
 mihi.

Namque hinc ea ut erat missa forte, ubi vidi ego
 illanc, illico

Accedo, rogit: Pamphila quid agat? iam partus
 adsiet?

Eone obstetricem arcessat? illa exclamat: abi, abi
 iam, Aeschine:

575 Satis dedisti verba! sat adhuc tua nos frustrata
 est fides! — Hem

Quid istuc, obsecro, inquam, est? — Valeas! habeam illam, quae placet! —

Sensi illico, id illas suspicari, set me reprehendi
tamen,

Ne quid de fratre garrulae illi dicerem, ut fieret
palam.

Nunc quid faciam? dicam, fratris esse hanc, quod
minume est opus

600 Vsquam efferri? Ac mitto; fieri potis est ut ne
qua exeat:

Ipsam id metuo ut credant; tot concurrunt veri-
similia:

Egomet rapui; ipse egomet solvi argentum; ad me
abducta est domum.

Haec adeo mea culpa fateor fieri. Non me hanc
rem patri,

Vtut erat gesta, indicasse! exorasset, ut eam du-
cerem.

605 Cessatum usque adhuc est: nunc porro, Aeschine,
expergiscere!

Nunc hoc primum: ad illas ibo, ut purgem me.
Accedam ad fores. —

Perii! horresco semper, ubi pultare hasce occipio
miser. —

Heus heus! Aeschinus ego sum: aperite aliquis
actutum ostium! —

Prodit nescio quis: concedam huc.

MICIO. AESCHINVS.

MICIO.

Ita uti dixi, Sostrata, IV. 5.

610 Facito; ego Aeschinum conveniam, ut, quomodo
acta haec sunt, sciat.

Set quis ostium hoc pultavit?

AESCHINVS.

Pater hercle est; perii!

MICIO.

Aeschine,....

AESCHINVS.

Huic

Quid hic negoti est?

MICIO.

Tune has pepulisti fores? —

Tacet. Quin ludo hunc aliquantisper? melius est:
Quandoquidem hoc nunquam mi ipse voluit cre-
dere.

615 Nil mihi respondes?

AESCHINVS.

Non equidem istas, quod sciam....

MICIO.

Ita? nam mirabar, quid hic negoti esset tibi. —
Erubuit: salva res est.

AESCHINVS.

Dic sodes, pater,

Tibi vero quid istic est re?

MICIO.

Nil mihi quidem:

Amicus quidam me a foro abduxit modo

620 Huc advocatum sibi.

AESCHINVS.

Quid?

MICIO.

Ego dicam tibi.

Habitant hic quaedam mulieres pauperculae....

AESCHINVS.

Vt opinor.

MICIO.

Has non nosse te, certo scio:

Neque enim diu huc migrarunt.

AESCHINVS.

Quid tum postea?

MICIO.

Virgo cum matre.

AESCHINVS.

Perge.

MICIO.

Haec virgo orba est patre;

625 Hic meus amicus genere est illi proximus:

Huic leges cogunt nubere hanc....

AESCHINVS.

Perii!

MICIO.

Quid est?

AESCHINVS.

Nil; recte; perge.

MICIO.

Is venit, ut secum avehat:

Nam Mileti habitat.

AESCHINVS.

Hem, utne secum virginem...?

MICIO.

Sic est.

AESCHINVS.

Miletum usque, obsecro?

MICIO.

Ita.

AESCHINVS.

Animo male est! —

630 Quid ipsae? quid agunt?

MICIO.

Quid illas censes? nihil enim.

Commenta mater est, esse ex alio viro

Nescio quo puerum natum (neque enim nominat);

Priorem esse illum; non oportere huic dari.

AESCHINVS.

Eho, nonne haec iuste tibi videtur poscere?

MICIO.

635 Non.

AESCHINVS.

Obsecro, non? an illanc abducet, pater?

MICIO.

Quidni illam abducatur?

AESCHINVS.

Factum a vobis duriter
Immisericorditerque atque etiam, si est, pater,
Dicendum magis aperte, inliberaliter!

MICIO.

Quamobrem?

AESCHINVS.

Rogas? quid illi tandem creditis
640 Fore animi misero, qui illa consuevit prior,
Qui infelix haud scio an illam misere et nunc
amat,
Cum hanc sibi videbit praesens praesentem eripi,
Abduci ab oculis? facinus indignum, pater!

MICIO.

Qua ratione istuc? quis despondit? quis dedit?
645 Cui quando nupsit? auctor his rebus quis est?
Condixit alieno?

AESCHINVS.

An sedere virginem
Domi oportuit tam grandem, dum cognatus hinc
Illinc veniret, expectantem? — Haec, mi pater,
Te dicere aequum fuit et id defendere.

MICIO.

650 Ridiculum! advorsusne illum causam dicerem,
Cui veneram advocatus? set quid id, Aeschine,
Nostra? quid nobis cum illis? abeamus. — Quid
est?
Quid lacrimas?

AESCHINVS.

Pater, obsecro, ausculta!

MICIO.

Aeschine, audiui omnia,
Ut sient: nam te amo; quo magis, quae agis, sunt
curae mihi.

AESCHINVS.

655 Ita velim me promerentem ames, dum vivas, mi
pater,
Vt, me hoc delictum admisisse in me, id mihi
vehementer dolet
Et me tui pudet.

Micio.

Credo hercle: nam novi ingenium tuum
id vereor, ne tu indiligens nimium sies.
Undem civitate te arbitrare vivere?

660 Virginem vitiasti, quam te ius non fuerat tangere;
Iam id peccatum primum magnum, at humanum
est tamen: boni

Fecerunt item alii saepe. At postquam id evenit,
cedo,

Numquid circumspexisti aut numquid tute prospexisti
tibi,

Quid fieret, qua fieret? si te mi ipsum puduit di-
cere,

665 Qua resciscerem? Haec dum dubitas, menses abie-
runt decem:

Prodidisti et illam miseram et gnatum, quod quidem in te fuit.

Quid? credebas, dormienti haec tibi confecturos
deos,

Et illam sine tua opera in cubiculum iri deductum
tuum?

Nolim ceterarum rerum te socordem eodem modo. —

670 Bono animo es: uxorem hanc duces.

AESCHINVS.

Hem, pater....

Micio.

Bono animo es, inquam.

AESCHINVS.

Obsecro, num ludis tu nunc me?

Micio.

Ego te? quamobrem?

AESCHINVS.

Nescio;

Nisi quam misere hoc esse cupio verum, eo vereor
magis.

MICIO.

Abi domum ac deos comprecare, ut uxorem ar-
cessas! abi!

AESCHINVS.

Quid? iam uxorem?

MICIO.

Iam.

AESCHINVS.

Iam?

MICIO.

Iam quantum potest.

AESCHINVS.

Di me, pater,

675 Omnes oderint, ni mage te quam oculos nunc
ego amo meos.

MICIO.

Quid? quam illam?

AESCHINVS.

Aequè.

MICIO.

Perbenigne.

AESCHINVS.

Quid? ubi ille est Milesius?

MICIO.

Abiit, periit, navem ascendit. Set cur cessas?

AESCHINVS.

Abi, pater:

Tu deos potius comprecare: nam tibi eos certo
scio,

Quo vir melior multo es quam ego, obtempera-
turos magis.

MICIO.

680 Ego eo intro, ut, quae opus, parentur; tu fac ut
dixi, si sapis.

AESCHINVS.

Quid hoc est negoti? hoc est patrem esse, aut
hoc est filium esse?

Si frater aut sodalis esset, qui mage morem gereret?

Hic non amandus, hicne non gestandus in sinu
est? hem!

Itaque adeo magnam mi iniicit sua commoditate
curam,

685 Ne imprudens faciam forte, quod nolit; sciens
cavebo.

Set cesso ire intro, ne morae meis nuptiis ego-
met sim?

DEMEA.

Defessus sum ambulando. Vt, Syre, te cum tua IV. 6.

Monstratione magnus perdat Iupiter!

Perreptavi usque omne oppidum, ad portam, ad
lacum,

690 Quo non? neque ulla fabrica erat nec fratrem homo
Vidisse se aibat quisquam. Nunc vero domi
Certum obsidere est usque donec redierit.

MICIO. DEMA.

MICIO.

Ibo, illis dicam, nullam esse in nobis moram. IV. 7.

DEMEA.

Set eccum ipsum. Te iamdudum quaero, Micio.

MICIO.

695 Quidnam?

DEMEA.

Fero alia flagitia ad te ingentia

Boni illius adolescentis....

MICIO.

Ecce autem!

DEMEA.

Nova,

Capitalia.

MICIO.

Ohe, iam....

DEMEA.

At nescis, qui vir sit.

MICIO.

Scio.

DEMEA.

Ah stulte, tu de psaltria me somnias

Agere: hoc peccatum in virginem est civem!

MICIO.

Scio.

DEMEA.

700 Eho, scis et patere?

MICIO.

Quidni patiar? dic mihi.

DEMEA.

Non clamas? non insanis?

MICIO.

Non.

DEMEA.

Malim quidem!

Puer natus.

MICIO.

Di bene vortant!

DEMEA.

Virgo nihil habet,....

MICIO.

Audivi.

DEMEA.

Et ducenda indotata est.

MICIO.

Scilicet.

DEMEA.

Quid nunc futurum est?

MICIO.

Id enim, quod res ipsa fert:

705 Illinc huc transferetur virgo.

DEMEA.

O Iupiter,

Istoccine pacto oportet?

MICIO.

Quid faciam amplius?

DEMEA.

Quid facias? si non re ipsa istuc tibi dolet,
Simulare certe est hominis.

MICIO.

Quin iam virginem

Despondi; res composita est; fiunt nuptiae;

710 Demsi metum omnem. Haec mage sunt hominis.

DEMEA.

Ceterum

Placet tibi factum, Micio?

MICIO.

Non, si queam

Mutare; nunc cum non queo, animo aequo fero.

Ita vita est hominum quasi cum ludas tesseris,

Si illud, quod maxume opus est iactu, non cadit,

715 Illud, quod cecidit forte, ad artem ut corrigas.

DEMEA.

Corrector! nempe tua arte viginti minae

Pro psaltria periere, quae quantum potest

Aliquo abicienda est, si non pretio, gratiis.

MICIO.

Neque est neque illam sane studeo vendere.

DEMEA.

720 Quid ea igitur facies?

MICIO.

Domi erit.

DEMEA.

Proh divom fidem,

Meretrix et mater familias una in domo!

MICIO.

Cur non?

DEMEA.

Sanumne credis te esse?

MICIO.

Equidem arbitror.

DEMEA.

Ita me di ament, ut video tuam ego ineptiam,
Facturum credo, ut habeas, quicum cantites.

MICIO.

725 Cur non?

DEMEA.

Et nova nupta eadem haec discet;...

MICIO.

Scilicet.

DEMEA.

Tu inter eas restim ductans saltabis.

MICIO.

Probe.

Et tute nobiscum una, si opus sit.

DEMEA.

Hei mihi,

Non te haec pudent?

MICIO.

Iam vero omitte, o Demea,

Tuam istanc iracundiam atque, ita uti decet,

730 Hilarum ac lubentem fac te gnati in nuptiis.

Ego hos conveniam; post huc redeo.

DEMEA.

O Iupiter,

Hancine vitam! hoscine mores! hanc dementiam!

Sine dote veniet uxor; intus psaltria est;

Domus sumtuosa; adolescens luxu perditus;

735 Senex delirans; — ipsa, si cupiat, Salus

Salvare prorsus non potest hanc familiam.



SYRVS. DEMEA.

SYRVS.

Edepol, Syrisce, te curasti molliter, IV. 8.

Lauteque munus administrasti tuum:

Abi! — Sic, postquam intus sum omnium rerum
satur,

740 Prodeambulare huc lubitum est.

DEMEA.

Illuc sis vide

Exemplum disciplinae!

SYRVS.

Ecce autem adest senex

Hic noster. — Quid fit? quid tu es tristis?

DEMEA.

Oh, scelus!

SYRVS.

Ohe, nam tu verba fundes hic sapientia?

DEMEA.

Nam meus tu si esses,....

SYRVS.

Dis quidem esses, Demea,

745 Ac rem tuam constabilisses.

DEMEA.

Exemplo omnibus

Curarem ut esses.

SYRVS.

Quamobrem? quid feci?

DEMEA.

Rogas?

In ipsa turba atque in peccato maxumo,

Quod vix sedatum satis est, potasti, scelus,

Quasi re bene gesta!

SYRVS.

Sane nollem huc exitum.



DROMO. SYRVS. DEMEA.

DROMO.

750 Hens, Syre, rogat te Ctesipho, ut redeas.

SYRVS.

Abi. IV. 9.

DEMEA.

Quid Ctesiphonem hic narrat?

SYRVS.

Nil.

DEMEA.

Eho, carnufex,

Est Ctesipho intus?

SYRVS.

Non est.

DEMEA.

Cur hic nominat?

SYRVS.

Est alius quidam, parasitaster paululus;
Nostin'?

DEMEA.

Iam scibo.

SYRVS.

Quid agis? quo abis?

DEMEA.

Mitte me!

SYRVS.

755 Noli, inquam.

DEMEA.

Non manum abstines, mastigia?

An tibi iam mavis cerebrum dispergam hic?

SYRVS.

Abit. —

Edepol commissatorem haut sane commodum,
Praesertim Ctesiphoni! quid ego nunc agam,

Nisi,

Nisi, dum haec silescent turbae, interea in angulum

760 Aliquo abeam atque edormiscam hoc villi? sic agam.

MICIO. DEMEA.

MICIO.

Parata a nobis sunt, ut dixi, Sostrata: V. r.
Vbi vis.... Quisnam a me pepulit tam graviter fores?

DEMEA.

Hei mihi, quid faciam? quid agam? quid clamem aut querar?

O coelum! o terra! o maria Neptuni!

MICIO.

Hem tibi!

765 Rescivit omnem rem: id nunc clamat scilicet;
Paratae lites: succurrendum est.

DEMEA.

Eccum adest

Communis corruptela nostrum liberum!

MICIO.

Tandem reprime iracundiam atque ad te redi.

DEMEA.

Repressi, redii, mitto maledicta omnia:

770 Rem ipsam putemus. Dictum inter nos hoc fuit
(Ex te adeo est ortum), ne tu curares meum
Neve ego tuum? responde.

MICIO.

Factum est; non nego.

DEMEA.

Cur meus nunc apud te potat? cur recipis meum?
Cur emis amicam, Micio? numquid minus

775 Mi idem ius tecum ais esse, quod mecum est tibi?

T

Quando ego tuum non curo, ne cura meum!

MICIO.

Non aequom dicis....

DEMEA.

Non?

MICIO.

Nam vetus verbum hoc quidem est:
Communia esse amicorum inter se omnia.

DEMEA.

Facete! nunc demum istaec nata oratio est?

MICIO.

- 780 Ausculta paucis, nisi molestum est, Demea.
Principio, si id te mordet, sumtum filii
Quem faciunt, quaeso hoc facito tecum cogites:
Tu illos duo olim pro re tollebas tua,
Quod satis putabas tua bona ambobus fore,
785 Et me tum uxorem credidisti scilicet
Ducturum: — eandem rationem antiquam obtine:
Conserva, quaere, parce, fac quam plurimum
Illis relinquo, gloriamque istanc tibi;
Quae mea praeter spem evenere, utantur sine:
790 De summa nil decedet; quod hinc accesserit,
In lucro id deputato esse omne. Haec si voles
In animo vera cogitare, Demea,
Mihî, tibi, illis demseris molestiam.

DEMEA.

Mitto rem; consuetudinem ipsorum....

MICIO.

Mane:

- 795 Scio; istuc ibam. Multa in homine, Demea,
Signa insunt, quibus ex coniectura facile fit,
Duo idem cum faciunt, saepe ut possis dicere:
Huic licet impune facere hoc, illi non licet,
Non quo dissimilis res sit, sed quo is, qui facit.
800 Quae ego in illis esse video, ut confidam, ita fore
Ut volumus: video eos sapere intelligere in loco et
Vereri, interdum amare: scires liberum
Ingenium atque animum: quovis illos tu die

Reducas. At enim metuas, ne ab re sint tamen

805 Omissiores paulo: o noster Demea,
Ad omnia alia aetate sapimus rectius;
Vnum senectus vitium hoc adfert hominibus:
Attentiores sumus ad rem omnes quam sat est;
Quod illos sat acuet aetas.

DEMEA.

Ne nimium modo

810 Bonae tuae istae nos rationes, Micio,
Et tuus iste animus aequos subvortat!

MICIO.

Tace:

Non fiet. Mitte iam istaec; da te hodie mihi;
Expurge frontem!

DEMEA.

Tempus ita fert scilicet:

Faciendum est. Ceterum rus cras cum filio

815 Primo cum luci....

MICIO.

Imo de nocte censeo;

Hodie modo hilarum te face.

DEMEA.

Et istam psaltriam

Una illuc mecum hinc abstraham.

MICIO.

Pugnaveris:

Eo pacto prorsum illi adligaris filium.

Modo facito ut illam serves.

DEMEA.

Ego istuc videro; et

820 Illi favillae plena fumi ac pollinis
Coquendo sit faxo et molendo; praeterhac
Meridie ipso stipulam faciam ut colligat;
Tam excoctam reddam atque atram quam carbo
est.

MICIO.

Places;

Nunc mihi videre sapere; atque equidem filium

825 Tum, etiamsi nolit, cogam ut cum illa una cubet.

DEMEA.

Derides? Fortunatus, qui animo isto sies!

Ego sentio.

MICIO.

Ah, pergisne?

DEMEA.

Iamiam desino.

MICIO.

I ergo intro, et, cui res, ei re hunc sumamus
diem! —

DEMEA.

Nunquam ita quisquam bene subducta ratione
ad vitam fuit,

830 Quin res, aetas, usus, semper aliquid adportet
novi,

Aliquid moneat, illa ut, quae te scire credas, ne-
scias,

Et, quae tibi putaris prima, in experiundo ut re-
pudies.

Quod nunc mi evenit: nam ego vitam duram,
quam vixi usque adhuc,

Prope decurso spatio mitto. Id quamobrem? re
ipsa repperi,

835 Facilitate nihil esse homini melius neque cle-
mentia.

Verum id esse, ex me atque ex fratre cuivis facile
est noscere.

Ille suam egit semper vitam in otio, in conviviis,
Clemens, placidus, nulli laedere os, adridere
omnibus;

Sibi vixit, sibi sumtum fecit: omnes benedicunt,
amant;

840 Ego ille agrestis, saevos, tristis, parcus, truculen-
tus, tenax,

Duxi uxorem: quam ibi misera vidi! nati filii:

Alia cura! Heia autem, dum studeo, illis ut quam
plurimum

Facerem, contrivi in quaerundo vitam quasi totam meam:

Nunc, exacta aetate, hoc fructi pro labore ab eis fero,

845 Odium; ille alter sine labore patria potitur comoda:

Illum amant, me fugitant; illi credunt consilia omnia,

Illum diligunt, apud illum sunt ambo; ego desertus sum;

Illum, ut vivat, optant; meam autem mortem expectant scilicet:

Ita eos, meo labore eductos maxumo, hic fecit suos

850 Paulo sumtu; miseriam omnem ego capio, hic potitur gaudia:

Age nunc iam experiamur porro contra, ecquid ego possiem

Blande dicere aut benigne facere, quando hic provocat.

Ego quoque a meis me amari et magni pendere postulo:

Si id fit dando atque obsequendo, non posteriores feram.

855 Deerit? id mea minime refert, qui sum natus maxumus.

SYRVS. DEMEA.

SYRVS.

Heus, Demea, rogat frater, ne abeas longius. V. 2.

DEMEA.

Quis homo? o Syre noster, salve! quid fit? quid agitur?

SYRVS.

Recte.

DEMEA.

Optume est. — Iam tria nunc haec primum addidi

Praeter naturam: „o noster!“ „quid fit?“ „quid agitur?“ —

860 Servom haud inliberalem praebes te, et tibi
Lubens bene faxim.

SYRVS.

Gratiam habeo.

DEMEA.

Atqui, Syre, hoc

Verum esse, ipsa re propediem experibere.

GETA. DEMEA.

GETA.

Hera, ego hinc ad hos provisam, quam mox virginem V. 3.

Arcessant. Set eccum Demeam. Salvos sies.

DEMEA.

865 Oh, qui vocare?

GETA.

Geta.

DEMEA.

Geta, hominem maxumi

Preti te esse, hodie iudicavi animo meo:

Nam is mihi profecto est servos spectatus satis,

Cui dominus curae est, ut tibi sensi, Geta;

Et tibi ob eam rem, siquid usus venerit,

870 Lubens bene faxim. — Meditor esse adfabilis,
Et bene procedit.

GETA.

Bonus es, cum haec existumas.

DEMEA.

Plebem paulatim primum facio meam.

AESCHINVS. DEMEA. SYRVS.
GETA.

AESCHINVS.

Occidunt, dum nimis sanctas nuptias student: V. 4.
In adparando totum consumunt diem.

DEMEA.

875 Quid agitur, Aeschine?

AESCHINVS.

Hem, pater mi, tu hic eras?

DEMEA.

Tuus hercle vero et animo et natura pater,
Qui te amat plus quam hosce oculos. Set cur non
domum

Vxorem arcessis?

AESCHINVS.

Cupio; verum hoc mihi morae est,
Tibicina, et hymenaeum qui cantent.

DEMEA.

Eho

880 Vin' tu huic seni auscultare?

AESCHINVS.

Quid?

DEMEA.

Missa haec face,
Hymenaeum, turbas, lampadas, tibicinas,
Atque hanc in horto maceriam iube dirui
Quantum potest; hac transfer; unam fac domum;
Traduce et matrem et familiam omnem ad nos.

AESCHINVS.

Placet,

885 Pater lepidissime.

DEMEA.

— Euge, iam lepidus vocor!
Fratri aedes fient perviae; turbam domum
Adducet; sumtum amittet multum; quid mea?
Ego lepidus! in eo gratiam! — Iube! — Nunc iam

Disnumeret ille Babylo viginti minas! —
 890 Syre, cessas ire ac facere?

SYRVS.

Quid ego?

DEMEA.

Dirue! —

Tu illas abi et traduce.

GETA.

Di tibi, Demea,
 Bene faciant, cum te video nostrae familiae
 Tam ex animo factum velle!

DEMEA.

Dignos arbitror. —

Quid tu ais?

AESCHINVS.

Sic opinor.

DEMEA.

Multo est rectius
 895 Quam illanc puerperam hac nunc duci per viam
 Aegrotam.

AESCHINVS.

Nil enim melius vidi, mi pater.

DEMEA.

Sic soleo. Set eccum Micio egreditur foras.

MICIO. DEMEA. AESCHINVS.

MICIO.

Iubet frater? ubi is est? — Tun' iubes hoc, De-
 mea? V. 5.

DEMEA.

Ego vero iubeo et hac re et aliis omnibus
 900 Quam maxume unam facere nos hanc familiam,
 Colere, adiuvare, adiungere.

AESCHINVS.

Ita quaeso, pater.

MICIO.

Haut aliter censeo.

DEMEA.

Imo hercle ita nobis decet.

Primum huius uxori est mater....

MICIO.

Est. Quid postea?

DEMEA.

Proba et modesta,....

MICIO.

Ita aiunt.

DEMEA.

Natu grandior;....

MICIO.

905 Scio.

DEMEA.

Parere iamdiu haec per annos non potest,
Nec, qui eam respiciat, quisquam est; sola est.

MICIO.

Quam hic rem agit?

DEMEA.

Hanc te aequom est ducere; te, operam, ut fiat
dare.

MICIO.

Me ducere autem?

DEMEA.

Te.

MICIO.

Me?

DEMEA.

Te, inquam.

MICIO.

Ineptis.

DEMEA.

Si tu sis homo,

Hic faciat.

AESCHINVS.

Mi pater!

Micio.

Quid? tu, Aeschine, huic auscultas?

Demea.

Nihil agis:

910 Fieri aliter non potest.

Micio.

Deliras.

Aeschinus.

Sine te exorem, mi pater!

Micio.

Insanis? aufer!

Demea.

A'ge, da veniam filio.

Micio.

Satin' sanus es?

Novus maritus ego anno demum quinto et sexa-
gesimoFiam atque anum decrepitam ducam? idne estis
auctores mihi?

Aeschinus.

Fac: promisi illis.

Micio.

Promisti autem? de te largitor, puer!

Demea.

915 Age! quid, si quid te maius oret?

Micio,

Quasi non hoc sit maxumum!

Demea.

Da veniam!

Aeschinus.

Ne gravare!

Demea.

Fac! promitte!

Micio.

Non omittitis?

Aeschinus.

Non, nisi te exorem.

MICIO.

Vis est haec quidem.

DEMEA.

Age prolixè, Micio.

MICIO.

Etsi hoc mihi pravom, ineptum, absurdum atque
alienum a vita mea

Videtur, si vos tantopere istuc voltis, fiat!

DEMEA.

Bene facis;....

AESCHINVS.

920 Merito te deamo.

DEMEA.

Verum....

MICIO.

Quid?

DEMEA.

Ego dicam, hoc cum sit, quod volo.

MICIO.

Quid nunc, quod restat?

DEMEA.

Hegio cognatus his est proximus,
Adfinis nobis, pauper: bene nos aliquid facere illi,
debet.

MICIO.

Quid facere?

DEMEA.

Agelli est hic sub urbe paulum, quod
locitas foras;

Huic demus, qui fruatur.

MICIO.

Paulum id autem?

DEMEA.

Si multum est, tamen

925 Faciundum est: huic pro patre est, bonus est,
noster est: recte datur.

Postremo nunc meum illud verbum facio, quod
tu, Micio,

Bene et sapienter dixi dudum: vitium commune
omnium est,

Quod nimium ad rem in senecta attenti sumus.
hanc maculam nos decet

Effugere: dictum est vere et re ipsa fieri oportet,
Micio.

MICIO.

930 Quid istie? dabitur quidem, quando hic volt.

AESCHINVS.

Mi pater!

DEMEA.

Nunc tu mihi

Frater es germanus pariter animo ac corpore.

MICIO.

Gaudeo.

DEMEA.

Suo sibi gladio hunc iugulo.

SYRVS. DEMEA. MICIO.

AESCHINVS.

SYRVS.

Factum est, quod iussisti, Demea. V. 6.

DEMEA.

Frugi homo es. Ego edepol hodie mea quidem
sententia,

Liberum Syrum fieri, aequom iudico.

MICIO.

Istunc liberum?

935 Quodnam ob factum?

DEMEA.

Multa.

SYRVS.

O noster Demea, edepol vir bonus!

Ego istos vobis usque a pueris curavi ambos se-
dulo,

Docui, monui, bene praecepi semper, quae potui,
omnia.

DEMEA.

Res adparet; et quidem porro haec, obsonare
cum fide,

Scortum adducere, adparare de die convivium,

940 Non mediocris hominis haec sunt officia....

SYRVS.

O lepidum caput!

DEMEA.

Postremo hodie in psalteria ista emunda hic adiu-
tor fuit;

Hic curavit: prodesse aequom est: alii meliores
erunt;

Denique hic volt fieri.

MICIO.

Vin' tu hoc fieri?

AESCHINVS.

Cupio.

MICIO.

Si quidem

Tu vis, Syre, eho huc accede ad me! — liber
esto.

SYRVS.

Bene facis.

945 Omnibus gratiam habeo et seorsum tibi praeterea,
Demea.

DEMEA.

Gaudeo.

AESCHINVS.

Et ego.

SYRVS.

Cedo, uti iam hoc perpetuum fiat
gaudium,

Phrygiam ut una mecum videam liberam, uxorem
meam.

DEMEA.

Optumam quidem mulierem.

SYRVS.

Et quidem tuo nēpoti, huius filio,
Hodie prima mammam dedit haec.

DEMEA.

Hercle vero serio,
950 Si quidem prima dedit, haud dubium est quin emitti
aequom siet.

MICIO.

Ob eam rem?

DEMEA.

Ob eam. Postremo a me argentum,
quanti est, sumito.

SYRVS.

Di tibi, Demea, omnia omnes semper optata offe-
rant!

MICIO.

Syre, processisti hodie pulchre.

DEMEA.

Si quidem porro, Micio,
Tuum tu officium facies atque huic aliquid pau-
lum prae manu
955 Dederis, unde utatur: reddet tibi cito.

MICIO.

Istoc vilius.

DEMEA.

Frugi homo est.

SYRVS.

Reddam hercle: da modo!

AESCHINVS.

Age, pater.

MICIO.

Post consulam.

DEMEA.

Faciet.

SYRVS.

O vir optume!

AESCHINVS.

O pater mi festivissime!

MICIO.

Quid istuc? quae res tam repente mōres mutavit
tuos?

Quod prolubium, quae istaec subita est largitas?

DEMEA.

Dicam tibi:

960 Id ut ostenderem, quod te isti facilem et festivom
putant,

Id non fieri ex vera vita neque adeo ex aequo et
bono,

Fieri adsentando, indulgendo, largiendo, Micio.

Nunc adeo, si ob eam rem vobis mea vita invisā,
Aeschine, est,

Quia non iusta, iniusta, prorsus omnia omnino
obsequor,

965 Missa facio: effundite, emite, facite, quod vobis
lubet;

Set si id vultis potius, quae vos propter adole-
scentiam

Minus videtis, magis impense cupitis, consulitis
parum,

Haec reprehendere et corrigere quem, obsecun-
dare in loco,

Ecce me qui id faciam vobis.

AESCHINVS.

Tibi, pater, permittimus:

970 Plus scis, quid facto opus est. Set de fratre quid
fiet?

DEMEA.

Sino

Habeat; finem in istac faciat.

MICIO.

Istuc recte.

CANTOR.

Plaudite.









83873

Terence

Comoediae; ed. by Bothe. Vol. 1.

LL

T316Bot

**University of Toronto
Library**

**DO NOT
REMOVE
THE
CARD
FROM
THIS
POCKET**

Acme Library Card Pocket
LOWE-MARTIN CO. LIMITED

